

總目

行政組織第一

開放盟旗羣臺第二

招墾第三

設治第四

軍屯第五

清丈第六

優待蒙旗第七

墾荒指南第八

牧畜指南第九

雜錄第十

墾政輯覽

察哈爾全區
墾務總局編

清丈第六 (下)

墾務總局呈都統據張北墾務局局長呈請檢發戈重三部照及判

結情形以憑遵辦文

五年五月三日

據張北墾務局局長吳恩溥呈稱案據張北縣四台民人戈廷鎮稟稱竊
身父戈重三於光緒二十九年由推廣墾務局承領四台包山荒地二十
六頃當領部照五張業已在張北縣升科有案後因四鄰侵佔致起糾葛
身父將部照呈驗因糾葛未清身父被押冤死獄中今四鄰因身父亡故
羣起覬覦之心爾侵我佔以致身原領荒地二十六頃畝數不足惟身地
既領部照又經升科有糧無地情實難甘爲此叩懇局長派委清丈劃清
四至賞還部照以清糾葛而恤孤寡實爲德便等情據此查戈廷鎮之父
戈重三於前清光緒二十九年由推廣墾務局承領四台包山荒地二十
六頃領有部照五張當在張北縣升科納糧後因地畝糾葛戈重三將部

照呈驗案未清結戈重三被押致死獄中職局查戈重三所領地畝既有部照又復升科自應實地勘丈以昭核實况該民人承領地畝升科有年理應查照墾務定章原墾原領現在戈重三被押身死地畝糾葛仍未清結請將戈重三呈驗原照令發如果畝分四至相符職局方可入手清丈除一面咨會張北縣查明戈重三升科糧額外理合呈請總辦鑒核俯賜將戈重三前呈部照五張令發到局以憑清丈而清糾葛等情查民國三年二月察汗托羅蓋參領控告戈重三霸佔地畝案內曾由前局長將該民戶部照等件呈送鈞署發審在案茲據該局呈請前來理合轉呈鈞署令將民戶戈重三部照五張檢還並將判結情形抄發到局以憑轉令遵辦謹呈

墾務總局指令張北墾務局據呈三翼馬廠地畝應否歸局辦理等

情仰卽查明辦理文

五年五月三日

呈悉查三翼馬廠地畝糾葛係前任局長未結懸案疊經派員查辦迄未解決故發照一層終焉擱置茲據呈稱等情已令科檢齊該廠地畝糾葛各卷隨令發交該局仰卽切實查明遵章辦理并將辦理情形隨時具報此令

墾務總局令沽源縣知事遵照都統令文迅速訊結阿嘉呼圖倉與和親王府地畝糾葛一案文

五年五月五日

案奉都統令開據阿嘉呼圖克圖倉達喇嘛遣抱告傅善庭稟稱竊於四月二十日由章嘉倉科爾落扎普轉奉貴都統令文內開據墾務局呈據沽源縣知事呈卑倉與和親王府地畝糾葛一案卑倉久未到沽源縣候審各節誦讀之頃實深詫異查卑倉於五年一月遣抱告傅善庭呈奉貴都統批示自行到縣投審卑倉當卽遣抱告傅善庭攜帶印據於四月初三日至沽源縣候審初五日投呈初六日堂訊一次並當堂呈遞印圖三

紙均經該縣留堂在案初十日堂訊一次詎和親王府遣抱告德麟呂學端等言詞無理已極並無印據橫行狡展亦不呈驗圖冊該縣知事及帮審員亦不令伊將圖冊呈驗尤屬莫知其用心似此情節離奇顯有違司法程序訴訟人更何所遵循觀此問官所訊情節殊與貴都統體恤卑倉之德意相左卑倉遂於四月十三日令抱告回倉實不忍以上賞牧廠及阿嘉呼圖克圖倉僧衆養命之源斷送於奸滑侵佔之手卑倉正擬將種種違法各節提出控告請求貴都統秉公維持適奉令以卑倉未赴沽源縣候審見責不知該縣呈墾務局及墾務局轉呈貴都統之公文辦於何日行於何時其中日期乖錯難保無別項情節應請查核等情據此查此案前據該總局轉據沽源縣呈報到署當經指令並令行該倉在案茲據前情究竟該縣曾否集訊何以早稟兩相歧異除批仍着該倉迅赴沽源縣候訊外合亟令仰該總局立令該縣秉公訊辦毋得稍涉偏私致干查

究並將先後集訊該案情形呈報備查切切此令等因奉此查此案疊經令行該縣迅卽秉公訊辦乃積延日久迄未審結殊屬延宕茲奉前因如果該抱告傳善庭所稟各節屬實該知事及帮審員殊爲非是合亟嚴令該縣立卽傳集兩造詳訊確情驗明證據秉公判結毋得稍涉偏私再事玩延致干查究並將先後集訊此案情形呈報本總局以憑轉呈備查勿誤勿延仍轉行該墾務局知照切切此令

墾務總局呈都統據豐鎮墾務局局長坐辦呈稱民人郭如忠徐三等地畝轆轤業經審判具結完案文

五年五月八日

據豐鎮墾務局局長賀澎坐辦邊度春呈稱查民人郭如忠徐三等承買正紅旗三蘇木忽力素台等處遺荒一案迭據該民人稟請咨旗拉丈俾繳荒價以清轆轤復據該旗佐領轅克巴圖爾稟請另行查辦拉丈以分隨缺遺荒等情各在案民國四年十一月復准豐鎮縣公署咨開案查正

紅旗三蘇木民人郭如忠等承買地畝與該蘇木專達兵丁等糾葛一案當經傳訊未結茲據該佐領復呈前情相應咨請貴局查照希將民人徐三等所買地畝究係隨缺抑屬遺荒調查明晰咨覆過縣以憑核判等因准此當令職局高等調查員易薩圖施仁壽於清丈該蘇木隨缺時會同該旗總管妥爲理處茲據該員等函稱竊查正紅旗三蘇木前任佐領轅克巴圖孔督合賁等將該蘇木忽力素台並八印溝及補紅袋山後等處共地二十六頃先典後賣與民人郭如忠徐三等嗣經本蘇木專達兵丁等指爲隨缺硬將伊八印溝耕開地十三頃霸歸隨缺彼此興訟歷年未能訊結一案此次委員等馳抵三蘇木遂將孟總管邀至並傳到該蘇木官兵等及郭如忠徐三前來與孟總管會審多次兩造口供與歷年訴訟大概相同當判決無論隨缺空閒一律拉丈如果隨缺地不敷原數卽勒令郭如忠等將現在所佔忽力素台及補紅袋山後共地一十三頃如數

退還該蘇木收回果丈出隨缺有餘亦須令該蘇木官兵等將八印溝霸回之地一十三頃退還郭如忠等承領押荒兩造均各遵斷各無異說出具切結畫押另存一面由委員等劃界開繩勘丈共丈出隨缺地一百頃零四十九畝一分四釐除該蘇木隨缺六十五頃牧廠一十二頃外應餘地二十三頃四十九畝一分四釐又墳地二段一段二十七畝一段四畝復查郭如忠等現佔之地一十三頃此次清丈共丈出一十六頃一十六畝九分兩處統共丈出餘地三十九頃九十七畝零四釐查此案業已判決在先理應令該蘇木官兵等將八印溝原霸之地一十三頃退歸郭如忠等認墾不料該官兵等老幼百餘口一再哀求以蒙人生計無出若一旦將地退還均不能生活等語所有餘地二十三頃四十九畝一分四釐又墳地兩段共三十一畝情願自行押荒升科至郭如忠等因興訟多年爭執未已况此次均經判決各無異說伊等安能退讓連日會同孟總管

研訊再四始行就範令該蘇木官兵退出八頃歸郭如忠等承領讓該官兵等多認墾五頃方纔和平了結當卽飭令兩造出具甘結三紙送呈查核等情前來理合據實呈請總辦鑒核俯准銷案等情據此查郭如忠等地畝糾葛一案纏訟多年久懸未結該局長此次派員會同孟總管詳加審訊判決完案辦理亦屬平允自應准予銷案除指令外理合呈請都統鑒核備案謹呈

都統令據正紅旗總管抄送該旗額設官兵旗佐缺地牧廠原案仰

該總局轉令豐鎮縣局遵照前令查核辦理文

(原案附)五年五月十七日

據正紅旗總管呈稱前奉令開仰將從前欽差大臣貽穀撥給各旗官兵隨缺田地牧場游牧頃畝數目原定章程應卽查明呈報以便令發墾務局遵辦其正紅鑲紅旗業將隨缺地牧場游牧細數四至繪圖貼說造冊具報前來毋庸再行具報等因奉此遵查檔案光緒二十九年三月十八

日奉欽差督辦墾務大臣兵部侍郎貽察哈爾都統奎副都統魁會札內開爲札飭事查本欽差大臣都統副都統籌辦察哈爾左右兩翼墾務當經先後奏明撥留各蒙旗公共牧場並官弁兵丁等隨缺田地等因在案查現正開辦墾務之際所有各旗荒地熟田均已派員一律分勘丈量此項牧地缺地亦應核定章程分令撥留惟各佐官弁兵丁詳細數目並各佐未墾之地若干屢令該旗尙未查明呈報不得不先行分別估計酌定其世襲各員應照雙城堡烏魯木齊兩處辦法毋庸給予產田並左翼四旗各佐官兵等現無數目難以約計田地俟呈報核定時再行札飭該局旗遵行外應將撥給察哈爾左右兩翼八旗牧場缺地擬定章程粘單札到該旗迅速會同該局卽將牧地缺地按照現定大概數目先行撥留先儘所墾之地丈放毋得延緩俟由八旗將官弁兵丁詳細數目並未墾之地若干呈報到時核定確數具奏奉旨後再行飭知敬謹遵辦等因札到

在案又於二十九年九月十六日接奉撥給察哈爾八旗各官兵等缺地
牧場游牧按照烏魯木齊成案擬定章程粘單札開爲札飭事本都統副
都統前因察哈爾左右兩翼墾務現正暢辦之時當將各旗應留牧地缺
地各項酌定大概數目先行通飭遵行辦理在案現各局清丈將次完竣
約計所得地畝數目並各旗大小佐若干及每佐大小官弁兵丁若干亦
由各該旗呈報前來自應詳加查核擬定章程業於本年八月二十日具
奏奉硃批着照所請該衙門知道欽此欽遵除將原奏鈔札各局查照外
查此次奏定牧場缺地各項新章較前次札飭略有增加合亟再行札飭
一俟札到該旗卽行敬謹遵辦等因奉此遵將額設各官兵旗佐缺地牧
場游牧頃畝數目並原定章程照鈔蓋用總管印信一併呈報都署懇請
轉發墾務總局備查外其額設官兵旗佐隨缺田地數目及旗佐牧場游
牧數目四至形勢繪圖貼說留填漢字空造具清冊前已呈報合并陳明

附鈔原案等情據此查此案前據該局呈請飭送當經指令並令行遵送在案茲據前情除指令外合將原案一扣鈔發該局仰卽查核擬辦可也此令

附原案

粘單附

欽差督辦蒙旗墾務理藩院尙書銜新授綏遠城將軍貽察哈爾都統奎副都統魁爲札飭事照得本大臣都統副都統等前因察哈爾左右兩翼墾務現正暢辦之際當將各旗應留牧地缺地各項酌定大概數目先行通飭遵照辦理在案現在各局清丈將次完竣約略所得地數並每旗大小佐若干每佐大小官弁兵丁若干亦據各該旗具報前來白應詳加查核擬定章程業於本年八月二十日具奏奉硃批着照所請該衙門知道欽此欽遵除將原摺鈔札各該局查照外查此次奏定牧場各項缺地新章較前次札飭略有加增合亟再行札飭一俟札到

該旗卽行敬謹遵辦可也須至札者

附粘單

一留給公共牧場每整佐酌留十二頃半佐半中之半佐減給一半計每佐各六頃惟牧場與墾種之地不同不可不分別良莠亦不拘定一處但擇水草合宜或附近蒙村截長補短按足數撥給如本佐之地業已墾竣或不足定給之數卽在旁近各佐另劃補給以免偏向並俟兩翼地畝丈竣時其餘寒涼瘠劣不堪耕種之地在於何旗界內亦給歸何旗留給

一留給隨缺田地援照吉林烏魯木齊奏給缺地成案酌量稍有增加總管每員給地八百畝正參領每員給地六百畝副參領每員給地五百畝整佐領每員給地四百畝半佐半中之半佐領每員給地三百畝滿蒙理刑官每員給地二百五十畝總管以下整佐前鋒校每

員給地二百五十畝筆帖式及額設捕盜官每員給地二百畝半佐半中之半佐領下前鋒校護軍校每員給地二百畝筆帖式及額設捕盜官每員給地一百五十畝各佐額設兵丁有大小錢糧之別今留給缺地亦應分別辦理馬兵每名給地一百畝步兵每名給地六十畝各捕盜兵如係額設者每名亦給地六十畝非額設者不在此例

一各佐官兵缺地應由各本佐劃留但此內有地業已私自放竣無地可給者倘由別佐補給則有餘地之佐反給人地以致公司放地減少若許卽該佐少得若許四分費之利無地者早得盜賣之價且又同享養贍之地綜觀層次殊非公平不得量爲裁減稍爲科罰此項無地之佐按照現定應給各項缺地數目減半補給並將有地之佐先儘本佐官兵缺地牧場留給完竣時再將所餘之地分撥以免

喧賓奪主之嫌如備撥之地仍不足由升科四釐項下抵補按每畝應給若干照正賦一分四釐核算倘地未放竣所餘之地不足原定缺地之數尙欠若干亦由另租項下減半抵補譬如尙欠十畝補給五畝之租餘仿此於薄罰之中仍寓體恤之意

一撥給各項缺地以資該官兵等永久養贍將來生計全賴此焉若不預爲防範難免該官兵等復仍私賣撥留後應由察哈爾都統衙門查照備案並由各該旗將撥留數目細冊送呈本大臣處蓋用關防札飭各旗存儲遇有官員遷調時將此項缺地列入交代項內毋稍含混再缺地撥給該官兵等或本人耕種或招佃分收均聽其自便但不得私行售賣無論官兵如有私行盜賣盜典以及長租未賣所賣田地有無一經都統衙門查出或因他發覺官則參處兵則斥革其私賣之人亦同私買者一併懲辦並將原地追出歸旗如此嚴爲

防範俾可永遠遵守

一公共牧地並隨缺田地施惠蒙旗不爲不厚業由本大臣奏請恩施免其押荒升科

一世職官一項襲階不等多寡無定原不計缺未便一律給予產田應俟墾務辦竣於各該旗應得四分辦公費內如有餘存每旗千兩由墾務局就近移交地方官發商生息將按年所得息銀由地方官查取該旗世職官員數目並孤寡蒙人戶數若干均勻給予作爲幫貼以後人數加增亦但以此項分給

一召廟祀田務須確查舊有頃畝若干有無別項轆轤由公局辦清仍執原業惟勘丈臨時需費應照章交一半荒價以資公用再升科業經奏請豁免所有年年租項俾資養贍查凡勅建召廟均有舊祀田產自可毋庸再行撥給如無祀田召廟體查情形應酌給田地者隨

時呈明辦理

一另行劃留之地比照軍政操練教場各地隨時體察情形呈明辦理

一總管印房係閣旗辦公聚處參領理刑官及各該佐派出當差弁兵等亦在此居住且每年合操兵丁均集教場亦應寬留核計長二里即可足設但地方形勢不同恐其有碍莫若核定畝數所有總管衙門及參領佐領理刑官住處共留地十五頃以作操練教場並弁兵等支搭帳房之用

一總管印房當差弁兵既多且領餉會操人馬亦夥必須需用牧地茲除本佐公共牧場外再給十頃作爲總管各官並當差弁兵等牧場其地先儘山坡低窪不堪耕種之地撥給

一小台站等處除哈克諾爾各台仍照舊案辦理其餘每台各給地三十頃由公司放墾候升科時每畝收取水草銀一分二釐共計銀三

十六兩由台站弁兵前赴地方官署領取倘該台附近周圍地畝業已放竣卽由台站四面地方劃撥三十頃令原種地戶照交水草銀一分二釐其四釐另租概行免納

都統布告清理兩翼牧場辦法文

五年五月十七日

照得兩翼牧場清丈事宜業經劃歸本都統接管從前設立之兩翼清丈處已經令行取銷茲於閃電河馬政局設立兩翼牧場清丈行局委任前代理涼城縣知事林茂亭爲該局局長此次丈放場地凡辨別等則計算弓口升科年限以及登記發照一切事宜并帶徵丈費及照費註冊火耗等費悉按本區現行墾務章程辦理所收各種欸目全數填載照內用昭大信遇有兩翼地畝糾葛訟案並得遵照本區呈奉明令批准地畝訴訟專歸行政官廳審理之定例由該管局長就近秉公審理隨時呈報查核俾免久懸各安生理合亟布告俾衆週知仰該牧場內墾戶軍民人等一

體凜遵勿違此布

墾務總局呈都統據沽源縣知事呈覆民人夏廣榮與劉廷旺地畝

糾葛一案請查核備案文

五年五月二十一日

案奉鈞署第一千二百二十一號令開據沽源縣民人夏廣榮稟稱與劉

廷旺地畝糾葛一案奉令查該民人稟陳各節情詞閃爍本難盡信惟案

關控訴局委虛實均應澈究除批掛發外合亟令仰該總局即便查明核

辦可也此令等因奉此當由本總局令行沽源縣知事暨墾務局局長逐

一確切查明據實呈覆以憑轉呈核辦各在案茲據代理沽源縣知事黃

凌雲呈稱遵查此案於民國四年十一月一日據夏廣榮之弟夏廣興赴

案狀稱竊小的家早有承墾德公府廠地領有部照爲憑緣當招墾之初

民識未開率皆觀望是以當時無論何人領地較原領加多藉廣招徠不

獨小的地爲然凡有早領廠地之家率多如斯溯自去歲經墾務局派員

來地清丈小的知地有餘當經約計畝數報明墾務局有案嗣後不知因何停繩未丈查墾務章程第一章第五條內開如有地戶自行呈報餘地若干毫不隱瞞勘丈無異者准將補交餘地之價減免二成用示優異又第二章第五條清丈時丈出餘地按照現定章程交納押荒發給憑照永遠爲業又第七條所丈出餘地應補交押荒酌量體恤寬予日限以兩個月爲期等語現小的承領之地於舊曆八月二十三日經墾務局派委員清丈丈出餘地六頃與身上年報明之數不相上下卽不敢妄冀減免二成亦應遵章歸身補交押荒領照管業乃劉三暗與局委不知如何撥弄竟不容身補交押荒於繩丈之日挖掘壑界並於次日將身所種成熟之莠麥小麥蕎麥莞豆等田禾收去七頃之多當時既有局委跟隨身亦不敢攔阻似此違章強收田禾實於公理難容殊不知各戶照外餘地家家皆有何以別家餘地原墾原種惟將身家餘地硬行收回卽不容身補繳

押荒亦應將已熟田禾歸身收割方爲至理今伊膽敢強取實與強盜無異欺身懦弱更可想見請咨請照章原墾原種等情到縣正在咨查傳訊間卽准墾務局咨開爲咨請事據繩丈員韓慶嶽稟稱前於九月二十八日奉令赴王大人廟丈地丈得夏廣榮之地九頃五十二畝而此地與端木金之地相毗連被夏廣榮侵佔其地二頃二十二畝則端木金抗言不讓委員與牌頭劉廷旺從中說和乃將伊所侵之地如數退於端木金承領當按夏廣榮原照三頃五十畝如數丈足其下餘之地三頃八十畝抗不承領反以委員爲冒充委員開導數次而堅不情理不得已始將所餘之地放歸公正堂劉廷旺承領迄今月餘而反逞刁賴似此等奸民若不破其狡詐之行轉恐效尤者日多則於墾務前途大有關礙爲此據情實陳伏乞局長鑒核施行等情據此擬合咨請希卽查照迅傳嚴辦以儆刁風而重墾政實紉公誼等因准此旋據原役傳到原被人證等審訊據證

人南文明等供稱墾務局委員清丈丈至夏廣興地內適有蒙古人端木金以夏廣興侵佔伊地請求丈量挖界委員丈出夏廣興侵佔端木金地二頃二十二畝令夏廣興退還端木金承領端木金卽向夏廣興分收歷年租粒經伊等理處以上年地內所種莠麥均歸端木金收割完事而端木金距家寫遠卽將此地莠麥賣與劉廷旺收割其餘夏廣興地內丈出餘地夏廣興不肯領受經委員放給劉廷旺承領屬實劉廷旺供亦相同質之夏廣興詞甚狡展未結夏廣興因此懷恨墾務局主使縣屬地戶李春等聚衆抗違阻撓墾務經墾務局查知請縣究辦將其傳案飭押旋因悔過取保釋放迨傳到端木金供亦與南文明等無異此案事實旣明供證亦確劉廷旺收割莠麥買自端木金實無多收情事未便因夏廣興一人刁狡懸案不結當卽依法核判清丈委員遵照墾務章程將夏廣興丈出餘地既不承領轉招劉廷旺承領核與定章第二章第五條並無不合

惟夏廣興承墾此地究係多年不無微利可圖一旦歸爲劉廷旺承領亦未免向隅判令劉廷旺仍將此項餘地退還原主夏廣興承領以符墾務章程原墾原領之條件斷結在案今蒙令查前因理合將判斷情形據實呈覆總辦查核至夏廣榮原稟內稱局中用項民墊有千餘元之多一節縣署無案可稽卽查夏廣興控縣初狀亦未提及其爲捏造無疑合併聲明等情前來理合呈覆都統鑒核備案謹呈

墾務總局令豐鎮縣

知事

案奉都署發交正紅旗總管抄送該旗額

設官兵旗佐缺地牧廠原案令該縣局遵照前令查核辦理文

五年

五月二十二日

案查右翼正紅旗地畝前奉都統令委委員易薩圖前往稟承該知事局長會同該旗總管核實清丈凡各蘇木所有隨缺地畝以及牧廠均以執有印文冊據爲憑由該委員按其應得之數核實丈撥由該縣局發給淨

條暫行收執並由該旗將印文冊據送交本總局查驗確實換給部照免繳地價俾令管業由都統及總局分令遵照並令發該旗隨缺地畝圖說各在案茲奉都署將該旗總管鈔送額設各官兵旗佐缺地牧廠游牧數目並原定章程鈔發到局並奉令查核擬辦等因合亟鈔發原案令仰該縣局遵照都統及本總局歷次令文詳細查核丈撥給照俾資管業並轉令該易委員知照此令

墾務總局令兩翼牧場清丈行局發給清理兩翼馬場辦法及普通

墾務章程仰卽參酌辦理文

五年五月二十四日

案查本總局核擬清理兩翼馬場辦法十一條業經開單呈請都統鑒核奉都署令開據呈清理兩翼馬場地畝辦法清單井井有條應准試辦惟查該辦法第五條提成充作經費爲陸軍部核訂兩翼牧場清丈章程所無如無滯碍應准照辦其兩翼牧場清丈章程及本區普通墾務章程應

詳加參酌於所呈辦法清單無抵觸時均准適用摺存等因奉此合將清理兩翼馬場辦法陸軍部核定兩翼牧場清丈章程暨本區通行墾務章程表簿一并令發該局仰該局長參酌辦理如有意義不明及或有滯碍抵觸之處准由該局長隨時呈候本總局令遵仰卽遵照此令

墾務總局呈都統據沽源縣知事呈覆鎮國公毓璋與阿嘉胡圖克

圖兩造屢次抗傳不到請鑒核備案文

五年五月二十四日

案據代理沽源縣知事黃凌雲呈稱民國五年五月八日奉鈞局令開案奉都統令據阿嘉胡圖克圖倉達喇嘛遣抱告傳善庭稟稱各情據此查此案前據該總局轉據沽源縣呈報到署當經批示並令行該倉在案茲據前情究竟該縣曾否集訊何以呈稟兩相歧異除批仍着該倉迅赴沽源縣候訊合亟令仰該總局立令該縣秉公訊辦毋得稍涉偏私致干查究並將先後集訊該案情形呈報備查切切此令等因奉此此案疊經令

行該縣迅卽秉公訊辦乃積延日久迄未審結殊屬延宕茲奉前因如果該抱告傳善庭所稟各節屬實該知事及幫審員殊爲非是合亟嚴令該縣立卽傳集兩造詳訊確情驗明證據秉公判結毋得稍涉偏私再事玩延致干查究並將先後集訊此案情形呈報本總局以憑轉呈備查勿誤勿延仍轉行該縣墾務局知照切切此令等因蒙此遵查此案於民國四年十月二十九日奉令傳集兩造原主秉公訊判呈報當卽出票查傳而原被竟視縣票如具文並不赴案聽審迭次嚴催僅據和親王府派三等護衛德麟暨呂學端等到案該原告阿嘉胡圖克圖倉商卓特巴業禧敦魯布仍然置若罔聞懸案日久不得一訊知事因審理案件責有攸歸未便任其久延於本年三月三十日呈請轉飭來案以憑訊判該原告始於四月五日遣抱告傳善庭狀請訊判卽於六日開庭審理復於十日繼續審訊無如兩造均未呈驗印文圖冊證據均未確鑿彼此各執一詞孰虛

孰實無憑研究因此未能判決當庭諭令回取圖冊呈候驗明訊判而原被兩造竟如黃鶴一去不返知事審理案件不敢不積極進行有虧職守此案積延日久迄未審結乃係原被告不肯赴案有意延宕以致拖延未結去年查丈時兩造均願到上級公署涉訟曾經勘丈員詳明轉呈在案該原被意存上理視知事公署輕若鴻羽故敢屢次抗傳不到迨經呈請轉飭不得已遣抱告赴案一次聊塞其責知事欲令到案聽訊難如挾泰山以超北海何能速結茲蒙令催除飭嚴催原被到案外擬合具文呈請鈞局查核並請俟該原被遞稟時嚴令攜帶印文圖冊赴縣投訊以憑集案訊判實爲公便等情前來除由本總局指令該知事仍飭差嚴催原被告到案秉公審訊具覆外理合據情呈覆都統鑒核備案謹呈

墾務總局令兩翼牧場清丈行局將張相臣王汝勤地畝糾葛暨佃

戶私買僞照霸產抗租等情查辦具覆文

五年五月二十七日

案奉都署令開案准陸軍部咨開前據兩翼牧場場長苑尙品電稱清丈原以熟地範圍但一溝一區各墾戶擇其肥沃已開十分之四五其餘荒地擬一律清丈歸該墾戶繳價承領請示遵等因現又據呈稱共丈得私墾地二百九十九頃五十六畝七分限一個月內繳價領照共應得銀二萬三千六百二十元零五角一分五釐請頒照以憑填給收欸現在節屆冬至冰雪在地擬卽停丈各等因前來除令知該場長外相應鈔錄原電原呈一併咨行查照辦理計鈔單等因復據領荒職員王汝勤張相臣等遣抱告人王興邦傅化南呈稱竊職員張相臣王汝勤於民國二年二月間承領和親王府所設放荒興隆地局荒地四十頃三年春招張繼榮張致榮于連于福等四人墾種言明二人分糧業主二成墾戶八成三年秋間分得雜糧二十石毫無異說四年秋應分糧石現經遣人前往分糧張繼榮等不特不肯照分竟稱伊等已在陸軍部兩翼牧場領有執照地係

伊等所有一再理論伊係承墾佃戶前已分糧何得狡賴詎該佃戶等串同一氣不認交租更敢蠻橫萬狀思欲動武所遣分糧之人未敢與較而職員等現又遠在滇邊不得親到理論萬出無奈只有遣抱跪訴懇恩飭傳驗照訊究以事昭雪查職等所買之地原係由興隆地局承領今該局由兩翼牧場接管職等承領之後卽遵示換有兩翼牧場之陸軍部照據興隆地局兩翼牧場皆有存根可查並有原放及接管該荒人員可證人證物證確實完全該佃戶所稱領有之照據所遣分糧人訪聞係由前已鎗斃舞弊局役黃振標手所賄買惟伊之照紙未經查驗是否黃振標盜照填賣抑或贗造僞照之處尙難查悉總之職等承領該地有照有案該佃戶等承種業已交糧一次萬無已地而肯納租外人及已經納租業主未售之地而爲佃戶置有之理此顯然可見者且職萬里從征盡力國事而不暇何能遣抱遽爭民荒是職之血產爲佃戶霸佔萬分冤抑不問可

知我都統明鑒萬里覆盆所在遣王興邦傅化南爲代訴人赴轅呼籲務懇准予飭傳質證俾血產不至爲土豪強霸物歸原主實感仁恩於罔極抱告人王興邦等住本口東紳店被告人張繼榮等住沽源縣高家山于連等住沽源縣文鐵爐等情先後到署查兩翼牧場牧政暨清丈事宜業經本署接管原擬於牧政範圍內添設丈地處所嗣因另組機關動則需欸浩繁於國家財政恐滋耗費莫如委交該局代爲經理尙屬便利爲此檢同陸軍部兩翼牧場試辦清丈章程並細則一本令行該局仰卽遵照進行調查前兩翼牧場已丈各荒有無弊竇有則詳明整理無則均生效力如有需欸之處准由收項支報但凡清丈該場荒地收支一切欸項務須直接本署辦理與他處毫無關涉至該職員王汝勤張相臣呈控佃戶張繼榮張致榮于連于福等霸產抗租一案並仰該局派員查訊明晰秉公妥爲處理以重荒務而免軼軻切切此令正籌辦間復奉都統令開據

張九卿王汝勤電稱民國二年領口北和親王府興隆局地惟六面井荒地四十頃領有地照三年春招張繼榮等四人墾種秋間二八分糧二十石本年派人點收四年糧租張繼榮等抗不肯交據云伊在兩翼牧場領有執照地爲己有茲接派員函稱前情查汝勤等領地有照有案且已收糧一次張繼榮等豈有己地而肯納租外人又豈有已經納租私領執照之理請令下墾務局澈底查明據實核辦等情據此查墾戶承佃抗不交租藉詞狡賴殊屬不法已極合亟令仰該總局迅卽澈底查明從嚴懲辦呈覆備核此令等因奉此合亟令仰該局長將張相臣王汝勤等地畝轉囑暨佃戶私買僞照霸產抗租情節秉公遵章辦理並將辦理情形呈覆候核切切勿延再前兩翼牧場已丈各荒應卽一併切實查明有無弊竇核擬呈覆除兩翼牧場清丈章程已由本總局另文令發外並抄發原電原呈暨右翼丈過地畝一覽表以備查核仰卽遵照辦理此令

墾務總局令

左翼 右翼 牧場 清丈 總行 局

會同詳查該廠情形核擬辦理繪

圖具覆文

五年六月二日

案據左右翼總管會呈稱竊查兩翼牧場自前清光緒三十二年以後歷年民人私墾雖屢經呈報禁止並經本翼各旗官長禁止驅逐無如該民人等恃頑不諳公理晝逐夜來迄未能禁侵越無已於是兩翼廠境漸形褊促殊於牧政大有妨礙近奉令開兩翼清丈處取銷歸墾務局辦理惟思清丈兩翼開墾之地自須先將界址範圍勘準以上年所立碑界爲外界限凡碑界以內開墾之地荒場以外自應歸墾務局清丈辦理自荒場以外毗連熟地邊界另立界限爲內界於以築立墩碑俾能永禁私越開墾否則但能清丈究難禁止越墾倘不另立內界則頑民依然越墾終難免交涉衝突恐於蒙漢之間感情乖離難期裕如總管等爲有益公家起見奚敢安於緘默爲此具陳伏乞鈞鑒核奪辦理等情據此除令

兩翼 總管 啟

場清丈行局局長會同該總管等核擬辦理繪圖具復外合亟令仰該局

管等會同該總管等詳查該場情形核擬辦理繪圖具覆勿延此令

涼城縣知事呈查勘毓楓地段並糾葛情形文 五年六月二日

案奉鈞局令開據清室恂勤郡王鑲藍旗四族宗室毓楓委任代理人朱博川稟稱毓楓之祖永住向在涼城縣大海灘七家廟地方有祭田馬廠一處內有故塋寢廟其地東至洋皮溝西至大西溝約計二十三里北至松公大山南至山坡約計十二里有該處地痞張萬儀擅自拆毀寢廟佔馬廠迭經呈控有卷可查懇請令知涼城縣知事局長檢查原案派委督同代理人指明四至另行清丈放墾照章升科計附粘宗人府原咨一紙並收租底冊一本串票根據一本等情前來查接管卷內於民國三年十一月前墾務總局奉前察哈爾都統何令知准內務部咨同前因並經前察哈爾都統何令委鑲紅旗總管涼城縣知事速即訂期會同前往調

案確切查明據實呈覆以憑轉咨勿延等因在案該總管知事是否查明呈覆無案可稽茲據該宗室毓楓復行稟稱等情除由本總局批示稟件均悉業由本總局抄錄原稟暨原粘宗人府咨文令知涼城縣知事暨墾務局局長查明具覆遵章辦理矣收租底冊串票根據一併發縣仰卽前赴該縣局聽候核辦可也此批掛發外合亟抄錄原稟暨原抄粘宗人府咨文一紙並將原呈底冊一本串票根據一本發縣查收令知該知事局長確切查明遵照定章切實辦理據實呈覆勿延此令原抄粘宗人府咨文各一件等因奉此知事遵卽選派第三股書記會同局委陳盡孝前往諭令督同代理人指界詳爲查勘去後茲據該書記稟稱奉令查明該宗室代理人朱博川所指該地四界內地面甚小並無墳塋寢廟其間只有索關營石合器小營子嶋鵠太等村訪問所指四界內之地究竟實有若干據各村鄉約云除去山石道路不堪耕種外能種之地不過二十餘頃

又云能種者已由該王府牧丁補英布達二仔等起租每畝收租錢二十文收竣後該牧丁等與該王府均分約地十三四頃又由會安寺收租者約計七八頃所收之租與該牧丁該王府無涉該代理人朱博川所持之串票根據亦有十八沙湖等村之地其地在羊皮溝之東並不在該代理此次所報四界之內刻已查明此項租地約八十餘頃原係甯公地民人耕種除完糧外每畝由牧丁達二仔等收租錢十文所收之租聞亦與該王府均分近據民人聲言其地多爲山水冲壞有租而無地現有願意清丈者至該代理所言大海灘七家廟兩處距此等地有四五十里之遠不知何以拉扯在所報四界內理合將查明地界緣由繪圖呈請鑒核等情前來知事會同墾務局局長覆核無異自應派員查照該王府所報四界內之地遵章丈放一律升科起租惟查該四界外十八沙湖等村尙有該宗室租地約八十餘頃該地佃戶除交租外均已升科納糧在案此次應

如何辦理知事未敢擅專除由局檢同地圖會呈請示外理合具文呈覆
鈞核施行再該府前與縣民張萬儀涉訟原案於郭前知事任內奉令詳
查經郭知事令據承辦五股書記稟稱此案原卷早經焚失無存知事奉
令查辦此案面詢承辦書記據稱此案原卷實已焚化無存合併聲明謹
呈

墾務總局令兩翼牧場清丈行局清理兩翼牧場辦法一案奉令應

准試辦文

五年六月四日

案查清理兩翼牧場辦法業由本總局開單呈請都統鑒核備案並抄錄
條文令發該局遵照辦理在案茲奉令開據呈暨擬訂清理兩翼牧場辦
法已悉應准試辦此令等因奉此合亟令仰該局知照此令

墾務總局指令豐鎮墾務局據呈會審判結郝昇上訴梁國興藉委

苛斂一案呈請核銷文

五年六月九日

呈悉查此案既經該縣局會同訊明委員等自備火食並未歛用民錢清丈地畝亦無以少報多以多報少情事該民郝昇捏詞誣控卽應究辦以儆刁風惟據稱鄉愚無知業已知過從寬免究取結完案應卽照准其丈出荒地三十畝仍勒限該民呈繳荒價毋任拖延俟該價繳清再給部照執業除函致審判處外卽轉咨該縣知事一並知照此令

墾務總局指令沽源墾務局據呈酌擬清丈黑河卯正汎地辦法及

先派員清丈文

五年六月九日

呈件均悉查此案前奉都署令開僅據該世管佐領等稟稱祖遺產業歷年在縣完納旗糧民國報稅印契已成爲各人私產等語是否屬實未據該縣聲叙明晰有無蒙混情弊尙難懸揣指令該縣查明原案逕呈本總局核奪擬辦在案茲據呈稱此地業主原係該佐領等祖產究竟何所依據曾否呈驗龍票及有無確實證據未據聲明至所擬辦法完糧之地不

收地價丈出餘荒分別等則繳價領照事屬可行惟發照應交原墾民戶收執以符定章該佐領等不得從中阻撓至代交地價一節易滋流弊且核與定章不符應另行妥擬辦法呈候覈奪至脂粉地畝如果證據確實准如所擬辦理仰卽查照抄件存此令

墾務總局指令涼城縣知事呈查勘毓楓地段並糾葛情形文

五年六月

十三日

呈悉查此案前據該縣墾務局呈覆業由本總局詳細批示印發在案仰卽咨調遵照辦理可也此令

墾務總局指令沽源墾務局據呈奉令丈量禮王府養贍地浮多三

十頃文

五年六月十六日

呈悉據稱核實丈出禮王府地浮多三十頃應卽照章繳價領照俾資管業至原有養贍地一百頃候另案令知其羊腸小河據稱不在該府養贍

地段之內查原函聲稱小河兩旁俱係草灘長十五里寬五六里不等爲該府牧牲之地究竟小河兩旁有無私墾地畝如查有私墾仍應照章繳價領照管業以符定章仰該局遵照查明具覆以憑核奪並將此令轉行該縣知事知照此令

墾務總局呈都統奉令檢抄榮奎馬廠原案請咨部核奪文

五月十六

案奉鈞令准財政部咨開據正黃旗滿洲寶山佐領下人清昌長子金海以祖遺荒產承繼有案並上年稟蒙前都統溥批准飭廳清查指界過半懇請轉令察哈爾墾務總局繼續清界等情併抄附張家口廳簽發差票暨呈廳備案指界節略清摺具稟到部查此案上年曾據察哈爾墾務總辦呈覆據稱張北縣知事呈稱遵查前清光緒二十六年五月二十一日奉直隸口北道道憲鍾札開張家口廳知悉案查旗人清昌稟請查勘京

鑲黃旗蒙古已故世襲男爵榮奎馬廠荒地一案昨准察哈爾都統將接准兵部轉准鑲黃蒙古旗分咨文一件錄送到道當因該男爵榮奎既經本旗佐領報稱絕嗣並無承襲之人是該男爵馬廠確屬絕產自應照例歸官經理旗人清昌係屬異姓斷難任其覬覦冒繼妄爭業經本道咨明察哈爾都統立案不行以杜爭端並札行該廳遵照在案惟男爵榮奎既已故絕所有該爵馬廠應得私租自應按照並無地主之例解交天津海防支應局兌收以充軍餉等因復查榮奎馬廠係坐落縣屬白廟子灘於光緒七八並十五六等年經押荒局按無主官荒先後共放過地八百五十三頃三十六畝散給民戶耕種已交押荒領有部照按年交納糧銀所征私租銀兩按年解交天津海防支應局兌收充餉所有毗連白廟子灘之紅骨勒圖卽黑沙圖等處經口北道道憲鍾於光緒二十五六等年奏設押荒局未經收完此地又於二十九年經墾務大臣貽設立墾務總局

將此地接續放完共地六百頃有奇招民開墾早已繳納押荒承領部照所有征起私租銀兩亦解交直隸財政總匯處並直隸行政公署各在案自上年七月張北縣劃歸察哈爾行政區域奉令將徵起各項私租銀兩均解交察哈爾財政分廳亦在案再查縣屬境內並無有金海祖遺荒地茲奉前因擬合查案具文呈請查核轉覆等情前來查金海祖遺荒地既據該知事呈稱該縣境內並無此項荒地則金海稟稱劃清地址等情似無庸議等情當經本部轉咨值年旗衙門查照令遵在案茲據金海稟稱清昌於宣統三年七月間曾奉察哈爾都統溥飭廳清查並將指界大略情形呈廳備案各等語本部無案可稽除咨行值年旗衙門外相應抄錄原稟咨行查核卽希檢抄原案說明詳情咨部核奪可也附抄件等因准此查清昌地畝卷宗業於上年四月間發交該前局存查有案茲准前因合亟抄錄附件令發該總局仰卽詳細查明檢抄原案說明詳情具覆到

署以憑咨部核奪可也切切此令等因奉此查此案於民國四年七月奉財政部令知當由本總局令行該縣知事暨墾務局局長遵令詳查具覆嗣據該縣局先後呈覆到局由本總局據情呈覆財政部並奉批在案茲奉前因查接管卷宗光緒三十一年八月經前任都統誠批示卷查前因該旗人屢請清查伊姑夫鑲黃旗蒙古已故男爵榮奎馬廠以繼榮奎家祠祭費業經口北道照覆榮奎馬廠確屬絕產清昌係屬異姓斷難任其冒繼妄爭該男爵馬廠原續開墾共地八百五十餘頃未必尙有餘荒卽使有之無主之地例應歸公立案不行等因在案今該旗人又復來轅瀆控實屬無理取鬧不准並斥仍錄批札飭張理廳墾務局遵照宣統三年四月經前任都統溥札飭張理廳札開查此案雖經前口北道批駁既准正黃滿鑲黃蒙二旗咨覆清昌承奉祠堂屬實而前口北道亦未將此節提及今既據該旗人稟明前情此項馬廠現在究竟有無餘荒有無私墾

非先行飭廳確地查明不足以折服其心合亟照會原圖札飭札到該廳立即按照原圖界址確切詳查該廠何年開墾若干何人承種若干領有執照者若干其他有無餘荒仰卽繪圖貼說詳候核奪勿得違延切切此札嗣因該廳詳覆含混批開查此案僅據旗人稱以協同差人詢問據鄉約稱有新舊地約一千九百餘頃云云而該廳已否遵照前批查清界址未據聲叙殊難照准此繳各在案民國元年九月復經前任都統何令行張理廳查覆該廳是否查覆無案可稽是此案雖歷經前任都統令查在案究竟該廠是否金海祖遺暨該地究有若干終未能水落石出除由本總局再令該管縣局確實查覆外理合檢抄原案呈請都統咨部核奪謹呈

都統令准內務總長咨奉申令清丈各節應分別從緩辦理文

五年
六月

案准內務總長咨開本年五月二十四日奉申令前以中國田賦不均久多弊累令設全國經界局於京師辦理清丈以資整頓復由部呈擬調查田畝整頓賦額八條先從近畿各地試辦以次推及各省原不欲以利民之政轉爲厲民嗣據河南官紳呈稱辦理諸多弊竇曾令行緩辦其他各省舉辦清賦地方間有因從事丈量滋生事端亦交令轉行該省體察情形酌量緩辦現在各處民生彫敝水旱洊臻兵燹紛陳閭閻重困方拊循休養之不暇若再於原安里井之衆因此而稍有擾動其何以保固邦本康乂庶民本大總統每一念及爲之寢饋不安愆焉如擣著內務財政兩部卽將近畿清丈及清查田畝各事宜暫行停止各省有奉前令舉辦清丈清釐田賦者一律從緩辦理並各轉令所屬官吏撰示宣布以安人心仍將遵辦情形詳晰具覆用副中央體恤民艱之至意等因奉此除分咨外相應恭錄申令咨請查照並希將辦理情形報部以便查考等因准此

除分行外合亟令仰該總辦迅卽遵照出示宣布以安人心並將辦理情形隨時呈報以憑咨部備查切速此令

舉務總局指令多倫舉務局呈復查明德公府收租養贍各地情形

文五年六月二十六日

呈悉查私放盜賣豐奉明令禁止此項德公王府廠地應由該局會同縣知事照左列各款再行詳查具復仰卽查照並轉咨該知事知照此令

一該府廠地是否上賞有無龍票冊據應由該縣舉務局會銜詢問明飭令呈驗

一該府廠地四至以內就面積估計究有若干頃畝應將四至查明並將概數呈報

一該府賞給牧丁開墾之地僅由該府發給執照未足以爲憑信應詳查縣署檔案有無上憲札飭准予照墾及該府呈報發給牧丁招佃

開墾卷宗

一該廠地據牧丁聲稱開墾一百四十四頃究竟是否僅開此數此外有無盜墾情事應一律詳查會銜具覆

墾務總局令涼城縣

知事 局長

按照朱博川所稟各節查明具覆文

五年六月

二十九日

案據宗室毓楓代理人朱博川稟稱竊代表於陽歷二月以宗室毓楓之祖永住遺有涼城縣大海灘七家廟地方墳塋祭田馬廠地畝一處約計山前後之地一千餘頃稟請照章丈放以裕國帑等情稟蒙總辦批令涼城縣及墾務局切實查核丈放併飭代表迅赴該縣指交地址聽候辦理等因代表於三月初間奉批赴涼具稟投到候至四月十六日始蒙縣墾務局派涼城縣人學堂學生陳繼孝偕同代表赴七家廟山前後地方勸查地至當由代表督同包衣達色祥鄉約佃戶墓丁引導前往自該地山

前西南界板城村繞行山後地內鷓鴣臺十八沙湖羊皮溝等村行至山後地東界復由山後東界起行查山前東界茉莉溝王子墳七家廟等處至山前西界之羊包溝止歷歷指清界至隨同去員驗收至於去員沿途宿尖悉在佃戶家往返六七日到處調查並無糾葛衝突情事於四月二十二日驗畢回縣代表卽面見該局長諮詢驗收地至情形據局長面諭七家廟山後地畝併無糾葛照章丈放惟七家廟山前塋地縣署所存卷內原呈地圖及普前任勘繪之圖一併失去雖經指交地至奈地圖無存礙難查丈令代表速繪全圖以免隱漏伏思原呈地圖被縣署銷毀惟有回京赴該宗室王府原管地畝圖冊處檢查原圖照式詳繪嗣將地圖繪妥呈局該局長仍面諭聽候丈放詎守候月餘竟無丈放消息亦未見該局批示代表只可請求局長該局長忽變前言面稱據勘丈員陳繼孝報告稟內聲叙所指界內並無七家廟及墳塋等語卽此亦應傳知或宣布

批示不宜待稟見詢問始言業據情呈覆矣兩次言語矛盾其中情形誠難測度况所委之陳繼孝一味偏私捏稟何可憑信蓋以陳繼孝係涼城縣土著之民學堂學生與墾務毫無知識敢爲斷言而陳繼孝與地痞張耀庭之子係屬同學人所共知且陳繼孝爲七家廟住戶張耀庭在曾前縣任內堂訊時亦曾供有陳姓毀墳霸地之事係屬此案從犯若派此人爲勘驗委員誠不足以昭公允而服人心陳委員稟諒由縣墾務局覆文聲叙無敢贅述謹將原稟所關於捏誣者爲總辦臚列陳之

一陳繼孝原稟所稱界內並無七家廟墳塋也查七家廟爲該王府之家廟修築於滿漢山之上山前卽羊包溝茉莉溝王子墳等處山後卽爲羊皮溝十八沙湖嶋鵝臺等村相隔嶺前嶺後僅八里之路陳繼孝稟稱相距四五十里竟敢如此妄謬其捏稟者一也

二陳繼孝原稟所稱索鬧營嶋鵝臺等村之地除山石道路外可耕種

者不過二十餘頃所稱更屬虛誕查索鬧營石合氣小營子鷓鴣臺紅廟十八沙湖小沿口一帶十餘村莊如可以耕種者僅二十餘頃此十餘村之戶口卽不予王府納租亦不能生活矣何況復稱其地多爲山水冲壞與納租之外而又行完糧言不近情妄謬已極其捏稟者二也

三陳繼孝原稟既稱不過二十餘頃後又稱委員查明此項租地八十餘頃一稟之內前後言詞數目不符究竟地畝若干一概茫然其捏稟者三也

四陳繼孝原稟稱每畝收租十文及二十文與墓丁勻分也此言更屬格外生枝有意破壞查陳繼孝既爲墾務委員只應查驗所報之地有無糾葛情事方爲正當職務若收租若干如何勻分該員不宜過問乃均以無涉之詞妄加於報告稟內顯見假公濟私其捏稟者四

也

五陳繼孝原稟稱有租有糧無地多有願意清丈者此稟對於墾務有莫大之影響查所稱爲有糧者係前清乾隆年間王府派包衣達長恒長介會同右衛官署招民墾種諭明每畝王府收租錢十文外再繳糧錢數文並無押荒領價併諭明准民耕種不准轉賞所以向無官契嗣後該佃私相授受稱之爲推字者是也若地鄰之鄭王府松公府亦屬此等辦法惟二府之租隨糧代征蓋因無墳墓墓丁故也確有可稽之事實而陳繼孝不爲調查惟朦混捏造而曰有糧蠱惑聽聞至於清丈一節自代表抵縣之後各佃中人與代表婉商願輸洋兩千元以免清丈有說合劉姓楊姓等可證代表伏思當此國家庫欸奇絀之日萬不敢貪圖私利辜負優待之恩且對各佃宣講墾務查丈辦法一經丈割所輸押荒有限卽屬爾等世業宣講之餘無

不權從是以力請丈放而陳繼孝喪心病狂無端造謠其捏稟者五也

據以上捏稟情形其爲地痞張耀庭之黨羽賄串之私不言可喻且現時復煽惑各佃力抗局丈幸各佃先知此次辦法不致盲從而陳繼孝實爲涼城墾務之蝨賊該局長理宜加察另派幹員復勘以昭公愼乃竟以陳繼孝一面偏私之詞相沿捏覆所以含糊批詞抄粘代表每行質問則又以縣署爲支吾地步默窺其態度更有不敢臆度者未思該宗室據有此地無論收租若干亦屬恒產豈樂於丈放失此百年不敗之業惟念優待有條呈請丈放國家有數萬元之收入當此之時不無小補且將來國課亦屬增加卽無人呈報亦當切實調查整頓一切庶不負我總辦委任之至意如因私廢公扶同隱匿此風一長墾務前途何堪設想代表實爲國家收入起見不知冒昧并繪圖說懇請總辦俯

准派員下縣復勘以昭公允而重墾務如所稟不實情甘認罪計呈地
圖一張批詞一紙等情前來查此案前據該縣局呈覆業由本總局批
示遵辦在案據稟前情除批示外合亟抄繪原圖令仰該知事會同該
墾務局局長按照稟內所指各節詳細查明具覆該勘丈員陳繼孝如
有嫌疑關係當該局委派之時應聲明回避如查該員實係偏私捏稟
及實有賄串煽惑情事立即按照考成條例撤差究辦以重墾務而服
人心如所稟不實例應反坐仰卽遵照秉公辦理迅速具覆勿延此令

墾務總局令

候補縣知事劉景南
沾源縣知事黃凌雲

迅將夏廣榮控訴劉三一案澈底

清查文

五年七月十二日

查夏廣榮稟訴劉三一案前據

沾源縣

知事呈覆判斷各情當經本總局

轉呈都統備核在案現在該民戶夏廣榮復向都署稟控奉令卽派專員
會縣澈查秉公處判等因茲查有本區候補知事劉景南堪以派往查辦

每日支給川資辦公雜用等費共額三元按日計支除分令外合亟令

該候補知事劉馳赴沽源會同縣知事黃凌雲南切實查究秉公判結并仰

將判結情形具覆候核以憑轉呈此令

墾務總局令豐鎮縣局知事迅將王建勳地畝案件秉公判結具覆文

五年七月十三日

案據豐鎮縣領戶王建勳等稟稱緣生父王政於光緒三十三年立名三多堂旱稟綏遠墾務大臣案下認領正紅旗混托胡蘇木八凍花梁草荒二十頃准於承領在案迨至三十四年冬季派希委員勘丈清楚繪圖指界此地高山石岑又無點水不堪久耕之地按作下地每畝荒銀三錢共合荒銀六百兩綏遠有案豐縣第一科案存收欠荒銀冊但此地土脈不肥所以不能急速召民認墾完荒民國三年共交過兩頃七十五畝換出荒條縣照民國四年生招民墾備納荒銀之際突有教民趙得功率領蒙

人士不凍等手持洋槍將耕牛九頭刁去又割去生菜籽數十石畏其兇惡不敢辨言是以呈稟總局豐鎮舉務局蒙豐鎮舉務局批令譚委員施委員李委員會同正紅旗總管正副參領堂訊棒責蒙人飭交原牛又飭同本蘇木佐領指地分界令生當時同委員蒙員就挖壕暫限生一月急速交下欠荒價備欸之際不料趙得功呈生縣署朦朧催荒委員王中秀前任袁知事不論曲直顛倒是非既是伊地因何交牛受責生以寒困之人不能親赴前月呈稟批歸豐鎮縣知事舉務局長至今未蒙堂訊生手執兩頃七十五畝照不能耕種一畝年年升科而趙得功與蒙人私買一不交荒二不升科年年霸種獲利一則目無法紀二則欺生孤單情迫無奈敬呈恩准施行等情前來查此案前經知事袁樹滋委員王中秀會同審訊未將此案判結致該民戶等一再上訴疊經本總局批令在案乃事隔數月之久尙未據該知事暨該前任局長辦理具覆致該民戶等上控

不休案幾盈尺殊屬不合合再令仰該局知事會同迅將此案秉公辦結具覆勿再延緩以清訟累仰即遵照此令

墾務總局批劉雲漢稟懇再澈查已丈熟地照章批價文十五年七月十四日

稟悉查該廠地畝本總局案准該義烈公希璋正式印文轉令該縣局遵章開丈所有丈地發欸及一切辦法均遵照大總統批准定章認真

辦理如有地痞土棍朦混舞弊藉端招搖情事嚴密查訪依法懲治并准該義烈公函覆劉雲漢屢次所具之稟均非希璋令伊代遞劉雲漢恃有本府一紙印諭隨自命為總辦如再赴局具稟均作無效等語復據該縣局呈稱劉雲漢尋覓無蹤想係情虛脫逃等情各在案乃劉雲漢猶不安本分復以扯雜之詞來局稟控着不准行仰仍投赴沽源歸案候審倘再逗遛鑽竄及查有藉端招搖情事本總局定行交縣押解沽源依法懲辦決不寬容仰即知照此批

墾務總局呈都統據豐鎮縣知事查覆侯萬昇地畝糾葛各情並本

局指令呈請備案文

五年七月十六日

本年五月二十五日案奉鈞令內開據民人侯萬昇王耀勳等稟稱緣有民人楊標於光緒二十八年由鑲藍旗十二蘇木章蓋阿木各巴字手認買到陶林縣新豐村河溝荒地一段以作牧畜草廠共作地價銀九百五十兩銀地兩交有約爲憑二十九年經墾務局清界東西約十里有餘南北約三里之寬沙石城灘俱在其內按照四至報部升科錢糧押荒按四十二畝交納所有部照臨審呈驗此楊標買地之情形也民國二年民等朋夥段善崇溫有連田萬信侯仁祥張金楊保與張鳳翔等將楊標新豐村之草廠地悉數認買共作十股該張鳳翔承領七釐五毫有約爲證本擬按股均分不料民國三年未及均分而張鳳翔卽起不良之意勾結劉喜煥郝廷魁等又向十二蘇木章蓋刀不動行賄詭串將民等買到楊標

新豐村已升科之地原地原界復作約據盜買民等於去年七八月間具情呈訴陶林縣案下當蒙前任劉知事判決地歸民等管業該張鳳翔盜買一節作爲罷論有判決書可證隨稟呈閱此張鳳翔向十二蘇木盜買未遂之情形也本年陰歷二月間陶林墾務局侯譚兩委員親到民村令與支備公館以備勘丈地畝迨委員到地僅勘丈一日共費民等之錢一百八十餘千文有花費賬簿爲憑勘丈之後民等向王局長領取通知書以便備價承領餘荒而王局長并不發給通知書民等細詢其故始知於去年陰歷十二月間有墾務局李科長並未赴地勘丈畝數亦未到地觀看上中下則卽將民等之地按以三十頃之數認與張鳳翔其間有無情賄民等不敢妄言祈查自明此張鳳翔向墾務局冒領之情形也竊思民等之地以四至言約有一百餘頃其間除沙石城灘而外堪以耕種者不過五六十頃以錢糧四十二畝計固屬地多糧少大不相符但該地北界

灰騰梁地氣極寒禾苗不熟堪以作收廠不堪以作禾田民等愛地如金因於本年陶林縣結訟以後歸村開墾七八頃略試耕種今經墾務局勘丈有餘民等情甘照章繳價承領餘荒並查墾務局宣告四鄉所云凡勘丈餘荒在原主執照四至內者仍歸原主認領如原主無力認領由本局另招民戶局章俱在紙墨未乾民等之地未經勘丈李科長卽認與張鳳翔既經勘丈王局長又不發給通知書其情安在民等不解尤可異者民等到局領地該王局長聲言令民等按四十二畝收領其餘地畝悉爲局長所有該民等卽欲備價認領亦萬難允准民等無知未識告示故紙耶局章兒戲耶勘丈地畝私事耶不然何視張鳳翔如親屬視民等如仇人民等冤抑莫名情出無奈祇得懇請都統恩施格外照章究辦施行附判決書一冊等情據此除批示外合將原判決書命發該總局卽查核辦理可也此令等因奉此復據該民人等稟同前因當由本總局令行該縣

知事暨該舉務局局長澈底查明據實呈覆各在案茲據代理陶林縣知事蹇乃榮呈稱查侯萬昇等與張鳳翔等所控爭之地原因一段土地而有兩個所有權第侯萬昇等取得在先張鳳翔取得在後前任劉知事判歸侯萬昇等白屬正當第張鳳翔後買之契約雖歸無效尙未註銷此去年九月間事其中原委王局長當然不知自去冬清丈以來勘出餘荒原業主多覬覦觀望不肯承領苟有請領者該局長卽大加歡迎張鳳翔乘此機會挾其未註銷之契約而肆其愚弄之手段來局請勘希圖備價承領該局長卽派李科長下鄉勘丈按照原約四至共丈出餘荒三十頃是時侯萬昇既未提出抗議該局長又不確知原判當於本年一月七日發給通知書被其冒領自是實在情形非故違定章大翻前案亦非圖收私賄致成左袒據侯萬昇等稟稱未經勘丈李科長卽認與張鳳翔既經勘丈王局長又不發給通知書似不無疑義但李科長是否勘丈王局長曾

否拒絕現已時過境遷無從查考調閱黎務局暨縣署卷宗該侯萬昇等並未聲明異議又無確實證據詞出一面殊難憑信又據該侯萬昇等稟稱該地以四至言約有一百頃除沙石城灘外堪以耕種者五六十頃李科長竟以三十頃之數認與張鳳翔等語查此地堪以耕種者是否有五六十頃抑僅三十頃非澈底清丈不能得真實之數惟當茲溽暑禾苗滿地且大雨時行其勢礙難清丈若欲覆勘須待秋後實行至侯譚二委員下鄉清丈每日花費至一百八十千之多查委員勘地民戶爭先供給希圖減少餘荒曲徇情面則緘默無言認真辦理卽大生怨讟藉端構陷此亦事所恒有據以上所陳各節委係實情緣奉令查理合具文呈覆查核施行等情前來當由本總局指令呈悉此案既經前任劉知事正當判決該局局長當丈放該地之時若會同該局坐辦詳查原案當不至受人愚弄既據該知事查覆該前任局長非故違定章大翻前案亦非圖收私賄

致成左袒該前任局長王毓麟應准從寬免議至該地戶張鳳翔既係冒領應將原發通知書及與該旗章蓋私立契約追回註銷將該地撤回歸原業主繳價承領該旗十二蘇木章蓋與該地戶張鳳翔勾通作弊擅將官地私相授受致業經判決之案又復纏訟不休應傳案訊究卽按盜賣官物之例從嚴罰辦以示懲戒再此地既有糾葛復據該民人等屢次稟請丈量與普通應行停丈之地自係不同仍着該知事會同該局局長迅速遴派妥員核實覆勘以清積案勿再延緩致增訟累至各局勘丈員書及夫役人等赴地勘丈均由各該局發給薪工飯食不容少有勒索定章所載何等嚴重若民戶供給委員希圖減少餘荒此等弊端尤應厲禁俟譚兩委員下鄉清丈每日花費民戶之錢至一百八十千之多實屬不知自愛應將該委員等立即撤差歸案傳訊依法究辦勿得瞻徇情面致干未便除由本總局呈覆都統查核並令該局局長遵照外卽查照辦理

具覆此令印發外理合呈請都統鑒核示遵謹呈

墾務總局指令陶林縣知事據呈查覆侯萬昇等因地上控一案請

鑒核文

五年七月十六日

呈悉此案既經前任劉知事正當判決該局長當丈放該地之時若會同該局坐辦詳查原案當不至受其欺蒙既據該知事查覆該前任局長非故違定章大翻前案亦非圖收私賄致成左袒該前任局長王毓麟應准從寬免議該民戶張鳳翔既係冒領應將原發通知書及與該旗章蓋私立契約追回註銷將該地撤回歸原業主繳價承領該旗十二蘇木章蓋與該地戶張鳳翔勾通作弊擅將官地私相授受致業將判決之案又復纏訟不休應卽傳案訊究按照盜賣官物之例從嚴罰辦以示懲戒再此地既有糾葛復據該民人等屢次稟請丈量與普通應行停丈之地自係不同仍着該知事會同該局局長迅速遴派妥員核實覆勘以清積案勿

再延緩致增訟累至各局勘丈員書及夫役人等赴地勘丈均由各該局發給薪工飯食不容稍有勒索定章所載何等嚴重若民戶供給委員希圖減少餘荒此等弊端尤應厲禁俟譚兩委員下鄉清丈每日花費民戶之錢至一百八十吊之多實屬不知自愛應將該委員等立即撤差歸案傳訊依法究辦勿得瞻徇情面致干未便除由本總局呈覆都統備案查核並令該局局長遵照外仰卽查照辦理呈覆核奪此令

墾務總局指令沽源墾務局據呈請將陸軍部牧廠劃去各牌地畝

仍歸沽局清丈請示辦理文

五年七月十八日

呈悉查兩翼牧場清丈行局業經設立所有該牧場界限以內之地應歸該行局自行丈放以清權限所請由該局就近清丈之處碍難照准至該場界外之地凡與界內糾葛不清者自應與該行局會同辦理仰卽遵照此令

墾務總局指令沽源縣知事據呈鎮國公毓璋與阿嘉呼圖克圖地

畝糾葛一案請示遵行文

五年七月十八日

呈悉據稱原告屢傳不到被告稟請判決仰該知事再行予限票傳原告
携帶圖冊到案秉公審判如原告逾限不到案即應按律缺席判決並
將判決情形呈報都署及本總局備案既據逕呈仍候都統令遵可也此
令

兩翼牧場清丈行局函陳左翼蒙員驕詐各節文

(王丙甲原呈附)五年七月二十三號

局長於本月十八日帶同員司前往左翼劃界業經呈報在案是日在西
新營子與左翼蒙員聚齊會商遵照都統所畫之藍線爲標準各無異議
薩總管即於當日回旗局長意謂兩方既已議妥故於次日留下勘丈員
王丙甲劉宗淮會同該翼翼長協領照圖劃分局長即由西新營子逕赴
沽源縣詢問催繳欠欸情形據黃知事云已將牌頭各戶傳到縣署令行

赴局繳欸領照正在辦文咨覆局長就便在沽源面諭牌頭各戶迅速赴局繳欸以便發給印照各該戶等均乞寬限於陰曆七月初一日到局呈繳局長於二十一日先行回局擬過數日再赴右翼會同總管議劃界限不意將到局中據王丙甲等報告云蒙員非常驕詐不惟不願劃給夾荒且已墾之地又勒令劃歸牧場等情據此局長復派辦事員周鴻賓前赴左翼與薩總管商議辦理日前在口會議奉都統於圖上親書劃界呈復後再作規定以局長之見暫時不必與其爭持俟將地界劃竣局長照所劃情形呈請示遵再萬君廷獻派來各人均已接洽深悉其中情形似此劃分則萬君所領之地無處放給左翼之地將來非都統作主嚴令再劃不可所有王丙甲等報告謹先呈請鈞鑒餘再爲續稟肅此敬請崇安

附王丙甲原呈

竊員等於本月十八日隨同局長赴左翼勘劃界址遵卽於十九日員

等與該翼長協領會同實地分劃由二十里腦包起奉諭遵照都統所
圈圖內藍線栽標挖壕分劃清楚奈劃至恩蓋山梁後有白塔營子民
戶常富英熟地一段內築房院二所約地三頃上下考之圖內正在都
統所圈藍線中間惟該民戶常富英外出未經傳到詢問據地戶許海
聲稱深知該處之地有部照二張一張係山梁前之地原數八十三畝
一張係山梁後之地原數二頃俱由前清光緒二十九年領得並求限
期十五日轉知常富英携照一准到局呈驗等語查該地有無部照尙
在兩可而該翼蒙員竟不顧有無部照堅執劃入牧場之內員等實不
敢作主照劃故同該蒙員議將該民戶之地俟驗明有無部照再行規
定以免日後糾葛該蒙員堅不認可究竟此地如何劃分員等未敢擅
專理合呈請局長鑒核示遵再自二十里腦包至蕪菜溝約計有三十
餘里劃入清丈界內之地並無一隴夾荒合併聲明謹呈

都統令據牛羊羣總管呈請設立石誌劃分圈佔地界酌擬辦法文

五年七月二十四日

案查接管卷內據管理三旗達哩崗崖牛羊羣總管卓特巴札普呈稱案查陸軍部兩翼牧羣前查勘其游牧繪圖設立石誌圈佔本屬正白牛羊羣游牧南界及鑲黃牛羣新撥游牧南界當由本處呈蒙都統咨行陸軍部准復稱俟兩翼牧場場長到任由雙方派員劃分等因在案迄今二年有餘仍行遲延且疊次呈請迅卽劃分而該羣至今含混遲誤理合再行呈報懇祈迅速令催並一面令行現在勘丈兩翼牧場游牧委員等按照舊圖查勘劃斷以免彼得我失伏乞鑒核施行等情據此查此項圈佔地界應如何劃分之處合亟令仰該總辦統籌全局酌擬辦法具報以憑核辦切切此令

墾務總局令豐鎮縣

知事局長

派員丈放正紅旗六七兩蘇木荒地文

五年

八月一日

案查正紅旗六七兩蘇木界址業由本總局呈請前都統張照會四子札薩克旗王暨令知該正紅旗總管訂期派員攜帶圖冊會同劃分並由本總局令知該知事局長於劃分之日派員前往認真監視呈報備查各在案現值停丈之際該旗劃界事宜亟應籌備進行仰由該縣局咨行該旗總管妥商辦理凡六七兩蘇木界內生荒仰由該局派員核實丈量編號繪圖呈報備查所需欸項准由該局撙節開支於所收丈費項下核實報銷仰卽遵照辦理此令

舉務總局令兩翼牧場清丈行局奉都統令據王丙甲呈陳兩翼清丈辦法妥議具復文

(原呈附) 五年八月三日

案奉都統令開案據兩翼牧場清丈行局清丈委員王丙甲呈陳兩翼清丈辦法可收鉅欸以資牧政等情據此查所陳各節不無可採惟所稱本

署直接辦理一節似難收劃一之效爲此合亟抄錄原呈令仰該總辦統籌全局詳議具復以憑核辦等因奉此該委員呈陳各節是否確有把握殊難懸忖除由本總局準情度理逐條簽註據實呈覆都統外查文內有可收六十萬元有餘而無不足之說合亟抄錄原呈令仰該局長查核實在情形詳議具復以憑核復切切此令

附王丙甲原呈

竊委員前供差墾務總局丈放馬羣此次奉兩翼牧場清丈行局局長林茂亭特調來閃辦理清丈以資熟手隨行來局後復奉面諭從事清丈須先實地調查庶地畝多寡地質高下公放私墾詳爲預計則將來應收欸項若干方有把握仰查竣具報備案以爲估計張本等因奉此委員遵卽前往查勘詳細訪詢就中所得情形其清丈辦法應行整頓大綱有三不揣驽昧敢爲我都統觀縷陳之一宜歸都署直接辦理以

免周折也查兩翼牧場自上年陸軍部劃界以後凡在界限以內是無論生荒熟地悉爲牧場所非但此次清放地價應歸牧場卽現在將來已墾熟地升科賦稅亦當然劃歸牧場以爲購養牲畜之用作國家武備之儲宜令張多沽三屬知事將界內完糧民戶底冊移送過局以便按戶徵收况此次辦理清丈與兩翼總管諸多商榷進行之事墾務總局不能節制總管遇有商榷事件發生總局不能直接令遵必須承辦堂稿多費手續稽延時日且將來收有欸項呈解總局復由總局呈解都統諸多層折若歸都署直接辦理則諸事簡捷迅速可期此其一也一宜劃清內界以絕葛藤也查左翼應劃內界宜從恩蓋山起直抵馬泥圖爲止右翼應劃內界宜從鄂爾得尼托羅蓋起直抵阿格倫台爲止業經與該兩翼總管商議一次該總管云須奉都統令知方敢照劃竊思所收地價悉歸牧場養馬經費何妨令知照劃卽以上年陸軍

部所劃之界爲外界此次新劃之界爲內界外界以內內界以外悉准
民人領墾惟內界須通長挖一壕溝永杜人民越墾侵佔之弊所有挖
壕費用將來由地價項下作正開銷從此鴻溝澗然則漢蒙人民輻輳
永杜而和洽可期矣此其二也一宜多派員書以便限期竣事也查左
右翼自內界以至外界應行清放地畝計長在二百里內外寬在一百
里內外面積頗爲寬廣擬兩翼各派清丈員四名復派專員辦理張沽
多三縣交界糾葛事宜分途進行各有專責庶清丈無所阻撓預計六
個月可以蒞事但其中清丈次序復宜分別緩急先後以次舉行最先
宜從大段荒地勘丈以便招墾收集鉅款其次宜清丈教民所墾之地
查口外教民最爲狡黠私墾荒地侵佔官產復居多數若不先從教民
入手清丈示以勢在必行則民戶轉相疑惑以爲教民之地不敢清丈
是使人民相率入教以外人爲護符將見良民盡變爲莠民效尤玩抗

辦理愈形棘手且關於教民之地清出餘夾各荒悉勒令原主繳價承領無庸另放良因教民悍惡餘出之地旁人何敢領墾以招禍慮又清丈時更宜指定就近軍隊隨時妥爲保護以免抗違此其三也再查兩翼應行清放地畝合共在萬頃以上除內中沙石城灘山川道路等不堪耕種者千餘頃以及領有執照者二千頃不計外統計生熟應行清放之地共七千頃有奇悉準中則估計可收地價銀三十五萬兩尙有附收丈費照費火耗等合洋在六十萬元以上若能准上三端辦理欸可易收成效立見銳意進行約計今歲可收欸十萬餘元以上估計數目委員詳細審核從少預計日後只見有餘萬無不足總之大利所在全視辦理者以爲轉移耳委員調查所得不敢緘默謹將辦法謬陳愚見呈請都統鈞鑒謹呈

都統令兩翼

總

牧

場

清

丈

行

局

管

該總管等立將兩翼牧場內外界址尅

日劃清丈

(墾務總局承辦堂稿) 五年八月四日

照得清理左右兩翼牧場應先以劃清內外界址爲入手辦法節經令行兩翼清丈行局暨兩翼總管等會同辦理劃界事宜具報備查在案該總管局長等應卽遵照前令迅將內外界限劃分清晰俾利進行庶於牧政墾務兩有裨益乃迄今二月之久並未據該總管局長等將劃界事宜呈報到署似此意存觀望一味玩延殊屬不成事體查兩翼牧場前經陸軍部設立清丈處墊發開辦費三千元委派場長苑尙品主任清丈辦理已逾一年本年春間奉令劃歸察區都署參謀處代理其事又復二月有餘前後用款至數千元嗣復令交墾務總局主持辦理亦復兩月之久墊款至三四百元轉瞬陸軍部令提墊款必致空懸無着值茲財政困難倘因劃界阻滯曠時耗費試問該總管局長等能否當此重咎合再嚴令該總管局長等親身前往履勘立將界址劃清所有界綫務以當日在本署會

議時本都統親筆所畫界綫爲準體察情形秉公勘劃不得稍有偏倚並限文到半個月內一律竣事會同呈報本署並分報墾務總局查核倘再逾期定行從重懲處勿謂言之不預也除分令遵照外合亟令遵切切此令

都統令准財政部咨清查官產礙難一律停辦准其分別辦理文

年五

八月十五日

案准財政部咨開准國務院函開奉 大總統發下財政部呈清查官產礙難一律停辦請分別辦理文一件查此案既經貴部核明碍難一律停辦應准如擬辦理函達查照等因到部除分行外相應刷印原呈咨行通令各屬遵照可也附刷印原呈等因准此除通令外合亟刷印原呈令發該局即便遵照轉令所屬一體遵照此令

墾務總局指令兩翼牧場清丈行局呈覆涼城縣太僕寺之地原屬

右翼牧場文

五年八月十八日

據呈咨據兩翼總管覆稱太僕寺地原係右翼牧場於乾隆二十三年將右翼馬羣遷牧於商都河卽今之閃電河遂將此地原場一律放墾應交租銀向交都署轉發兩翼牧羣規定爲牧馬盤費歷年照發至宣統元年以迄於今久未發給此款其地雖不在兩翼界內然仍係右翼原場之舊地等情查涼城墾務局局長所稱涼城縣地土除鑲紅鑲藍兩旗而外均名爲舊地互相印證其名稱尙屬有因仰卽備案以資考據此令

墾務總局令兩翼牧場清丈行局據呈左翼二十里鄂博迤西地界

可否劃分文

五年八月二十日

呈悉由二十里鄂博迤西之鑲黃旗大吉山至察汗齊魯台等處私墾熟地旣在兩翼界內仍應歸該局劃分遵章辦理以清權限除呈都統備案外仰卽遵照此令

墾務總局指令興和縣

局長事

會呈勘丈東興蕩慶等莊並補報大白

石國正莊圖冊請鑒核備案文

五年八月二十三日

據該局報告勘丈東興蕩慶等莊地畝情形並更正大白石國正莊等處圖冊開具清摺補送前來本總局詳加審核尙屬相符應准備案所有各該處丈出荒地暨新丈佑安寺香火山坡荒地仰卽一律催令繳價領照無任延宕清摺圖冊存此令

墾務總局指令豐鎮墾務局呈爲瞬屆秋收完竣所有餘夾荒是否

賡續丈放伏乞鑒核示遵文

五年八月二十五日

據呈瞬屆秋收完竣所有餘荒夾荒及民戶業經稟請勘丈各地是否賡續丈放抑僅丈放大段生荒等情均悉查五年五月二十四日申令雖云舉辦清丈處官產均行暫從緩辦原爲體恤民艱恐滋驚擾起見現在財政部以清查官產礙難一律停辦酌擬分別辦理其業經公布辦法者不

論已未墾熟仍舊廣續進行業經呈明 大總統准予施行並令知本
總局轉行各該局遵照在案仰該局長坐辦對於墾務應辦事宜仍舊照
章進行迅將所有餘夾各荒一律丈放毋稍緩延以重功令切切此令

墾務總局令陶林墾務局據正黃旗總管呈奉令遵查報明查辦各
節仰卽查核辦理文 五年八月二十九日

案奉都統令開案據正黃旗總管巴楊孟克呈稱據參領兼勳舊佐領色
爾鄂特副參領兼雲騎尉額勒賀保呈稱茲據本旗巴爾呼第十二佐報
稱竊查前清光緒三十一年間經欽差大臣貽辦理東路墾務時當由本
正黃旗十七個整佐兩個半佐情願呈繳公費銀三千兩將三音烏蘇科
奇勒圖庫勒圖畢魯圖慶安哈嘛呢敦烏呢格圖英圖登濟等處撥作各
佐牧放牲畜中公牧場今於本年七月初五日忽有背負快槍三十餘人
又有持帶大槍來入公共牧場三音烏蘇等處任意丈量地畝起立堆誌

當經詢問係三義堂教民劉鴻儒改名劉雅卿以本旗各地冒稱八台地畝具稟當經陶林墾務局委員王丈給一百十餘頃而其所佔之地約計至有數百頃並將蒙人等糞薪肆意馱載遇見牧牲人及行路竟自放槍威嚇是以衆人怨聲載道案查前奉上署令文內開凡放蒙古地畝歸該管官報放等因在案而陶林王肅林並不合意不明旗台界址含混辦理伏查墾務局定章勿得售地與外人第因嚴禁有案劉雅卿雖係中國之人乃係已入外教不但設立教堂延聘外人霸佔而各佐銀兩均至曠廢理合呈報懇請調查明確由他處給與劉雅卿將各佐用三千兩銀贖回之地仍退給本主將前交三千兩扣除外下餘之地照章押荒等情懇請轉報前來維思本旗第十二等數佐今春馬賊羣起道路不通現稍見平安總管兼調查員親臨往查本旗各佐中公中用三千兩銀贖回之地被教民劉雅卿假藉八台之名稟報丈量一百十餘頃無數侵佔是實並持槍

械三十餘人以捕獸爲詞只是放槍不虛因思阿爾泰軍台原均係由旗羣地內撥給數十里十餘里不等究有定章數目今各蒙民等均藉八台之名冒領本旗公共牧場致起糾葛理應先行劃分台界再行丈放地畝方可無累劉雅卿冒領公中牧場擬移於他處如數撥給其公共牧場地畝擬由本主押荒以息訟端可否之處理合呈報伏乞指令遵行等情據此除批令外合亟令仰該總局卽便查照核擬令行陶林墾務局遵辦呈覆此令等因奉此合亟令仰該局按照文內情節詳細查核遵章辦理並將辦理情形具覆以憑轉呈此令

墾務總局令沽源縣知事迅將黑河卯正兩汛荒地派員清丈所有

辦法查明原案遵照前令辦理文

五年八月三十日

查該縣黑河卯正兩汛所有地畝曾於上年十月間由該縣局派員勘丈嗣因阻滯半途中止遷延至今迄未丈量本年五月據該縣墾務局局長

坐辦呈據該地業主世管佐領榮貴榮耀擬具辦法十條並擬先由該局派勘丈員兩起前往清丈等情當經本總局明晰指令遵照辦理在案現在時逾三月之久尙未據該局將所擬辦法及辦理情形具報前來未免延宕仰該知事兼代局長迅卽派員前往黑河卯正兩汛實行清丈一面傳諭該處汛官鄉約明白開導各佃戶人等曉以大義無任阻抗所有辦法着卽查明原案遵照前令妥爲辦理可也切切此令

墾務總局令沽源縣知事將雍和宮喇嘛阿嘉呼圖克圖狀訴毓公府霸佔牧地一案迅速訊結具覆勿得再延文

五年九月二日

案奉都統令開案據審判處呈稱查北京雍和宮喇嘛阿嘉呼圖克圖倉商卓特巴業禧敦魯布代理人傅善庭狀訴毓公府呂學端等霸佔牧地一案業經本處依法駁回沽源縣審理在案茲據該代理人傅善庭狀請提案發本處附設地方庭審理等情查本處附設地方庭受理之案件一

爲積案二爲官吏犯贓案三爲都統發交案而此案纏訟多年情節繁重可否由都統令交本處附設地方庭審理之處出自鈞裁爲此抄錄原狀一份理合備文呈請鑒核批示祇遵等情據此除指令該處批令該倉迅速携帶圖冊印據赴縣候審勿任歧控以圖規避並令行該縣迅結外合將抄狀令發仰該總局查照轉令該縣迅將此案訊結據實呈覆備核案懸日久勿任再延切切此令合亟錄狀令發該縣仰該知事遵照迅將此案訊結據實呈覆案懸日久勿得再延切切此令

墾務總局令兩翼牧場清丈行局請添設壕夫以資清丈生荒文

年五

九月二日

壕夫之設係爲丈放大段生荒以備挖壕之用至清理餘荒原無挖壕之必要本總局前次通令業經明言該局丈放大段生荒准遵照考成條例第六條添用壕夫一名至清理餘荒時仍不准添設以節糜費仰卽遵照

此令

墾務總局令兩翼牧場清丈行局奉令左右兩翼牧羣圈佔正白羊羣廂黃牛羣游牧之地乘派員烙印之便會同旗羣按照原撥之地斷辦令該局長會同前往勘辦具覆文

(原呈附)五年九月四日

案奉都統訓令案據管理三旗達哩崗崖牛羊羣總管卓特巴札普呈爲正白羊羣游牧被右翼牧羣圈佔之地擬乘派員烙印之便會同旗羣按照原撥之地斷辦等情據此除指令該總管並派員暨分令右翼總管會同勘辦外合亟抄錄原呈令仰該總局轉令兩翼牧場清丈行局會同該總管等前往勘辦仍將辦理情形呈報切切此令附抄原呈等因復奉都統訓令案據管理三旗達哩崗崖牛羊羣總管卓特巴札普呈爲廂黃牛羣游牧被左翼牧羣圈佔之地擬乘派員烙印之便會同旗羣按照原撥之地斷辦等情據此除指令該總管並派員暨分令左翼總管會同勘辦

外合亟抄錄原呈令仰該總局轉令兩翼牧場清丈行局會同該總管等前往勘辦仍將辦理情形呈報切切此令附抄原呈等因奉此合亟抄錄原呈令仰該局遵照辦理仍將辦理情形呈報以便轉呈切切此令

附原呈

管理三旗達哩崗崖牛羊羣總管卓特巴札普爲具報事竊查本屬牛羊羣游牧西南界與陸軍部右翼牧羣游牧連界於中華民國三年正白羊羣游牧被陸軍部右翼牧羣私自越佔設立石誌當將其霸佔牧地各情呈報當蒙都統轉咨陸軍部旋准復稱兩翼牧場場長副官王右翼牧羣署總管甘珠爾札普牛羊羣總管卓特巴札普三方會同商議查閱地圖越佔牛羊羣游牧情實公同定議將其所佔地內本羣人等墳塋及關於刈草喂養牧羣牲畜等要緊游牧仍舊退歸正白羊羣將其新立石誌一律退立十幾里呈報該管衙門一面咨行場長迄今

伊羣所立石誌未退仍然延緩尙未解決復於本年五六月間呈報兩次在案茲爲便利起見擬乘本年烙印牧羣馬匹之便特派專員劃分斷定不惟日後無糾葛而牧放牧羣馬匹亦無妨礙兩有裨益理合再行呈明伏乞都統恩施轉令陸軍部右翼牧羣總管會同勘查遵照舊圖劃分界址將其越佔私立石誌嚴令退移施行謹呈

附原呈

管理三旗達哩崗崖牛羊羣總管卓特巴札普爲具報事前於中華民國三年間據本屬廂黃牛羣協領等呈稱陸軍部左翼牧羣將本牛羣牧地越佔大半懇照原定之數辦給等情當經轉呈蒙都統咨行陸軍部應俟場長到任核辦等因奉令在案查前於光緒三十二年間廂黃牛羣舊游牧羣奉官開墾經欽差副都統額勒渾將廂黃牛羣請由察哈爾正白旗游牧太僕寺牧羣地內撥給足數牧放官牲游牧等因奏

定准其游牧此內將太僕寺牧羣界地經前墾務局朱委員連明安地方業已一併丈量作為官地指交牛羣取具圖結存案已蒙都統札給印文彼時該場長已經到任且陸軍部左翼總管薩穆端隆魯普牛羊羣總管卓特巴札普等會同查圖雖確係該羣界地惟此項界地前遷移時當蒙上署業已一併明告指給牛羣奉有令文辦定之事並據衆丁報稱若由指給游牧遠移建蓋房屋故失立定相宜之地則實難遵行各等情合併聲明懇祈卹憐勿使游牧損失實為恩便屢經呈報迄未解決劃分其任便設立堆誌亦未退移謹將先後情形報明並由本處派委該羣協領布彥達賚持文據情呈報都統伏乞乘本年牧羣馬匹烙印之便派專員查察一面飭令連界左翼太僕寺察哈爾正白旗會同解決將廂黃牛羣牧地按照原定辦給以免日後糾葛而禱牧放官牲實為恩便謹呈

墾務總局令商都招墾設治局檢發戈重三前案新照五張仰局查

明核發文

五年九月八日

案據民人戈廷鎮稟稱爲請發還部照已蒙轉呈未見執行再懇發給事竊緣民地部照因亡父重三挂誤案致將照五張驗存都署事閱二三載因孝服在身未暇顧此今春以清丈在卽且孝服已滿事關執守未便久懸因向墾務局據情呈蒙批稟悉該民人承領四台包山荒地二十六頃既經領照又經升科是否屬實仰候呈請總局飭發部照並咨會張北縣升科數目再行派委按照清丈此批等因呈局經局批呈悉戈重三呈驗部照五張業由本總局據情呈請都署飭發矣仰候該局長靜候批示可也等因由墾務局飭民遵照查此案冤誣各大憲無不深悉既允呈發則當此共和再造尤不使一夫不被其澤民父已故覆盆未雪孤嫠窮子之遺業一再遲回不獨於清丈進行諸多不便卽當茲耳目一新之際何得

復有此無辜瓜蔓之連此項部照是否已由都署發下抑或呈而未發懇請查照前案察奪辦理以恤孤寡以維清丈是所至懇謹呈等情據此除批示呈悉此案前據張北墾務局呈據該民稟請發還前案存驗部照等情前來因查四台南蘇計等處地方現卽劃歸商都招墾設治局管轄不屬張北墾務局權限範圍未便照發據稟前情業將前案存驗部照卽日發交商都招墾設治局查明核發仰該民卽行逕赴該局覓保具領聽候核發可也此批掛發外合亟檢發前案存驗部照五張令仰該局長查明核發再查案內部照五張其中戈威鎮三張戈廷鎮一張應是戈姓地照無疑惟內有孟光玉一張是否戈姓原照應由該局長於發照時詳察明確方予給領並應取具保結以防冒領之弊再此案遷延日久該局亟應查明迅行核發以輕民累而維信用切切此令

墾務總局令

候補縣知事劉景南
沽源縣知事黃凌雲

會審夏廣榮稟訴劉廷旺強拉田

禾一案已轉呈奉令准予備案文

五年九月八日

案查據該候補知事等會呈會審夏廣榮稟訴劉廷旺強拉田禾一案業經本總局轉呈都統鑒核令遵並令該知事等知照在案現奉都署指令呈悉查此案既據該縣委等傳集衆證訊明劉廷旺確未多拉夏廣榮田禾亦無傷人搶牛等情暨尙錦華等亦無受賄情事應准備案仰即轉令知照稟結均存此令等因奉此除分令外合亟令仰該

候補知事

知照此

令

墾務總局令豐鎮墾務局據郝廣慶呈稱賄串霸領一案仰該局派

員秉公勘丈遵章辦理具覆文

五年九月八日

案據豐鎮縣民人郝廣慶呈稱竊民郝廣慶籍隸豐鎮縣正黃旗十七蘇木蓋有住房承墾有年民國三年奉豐鎮墾務局明文倘有指報餘荒夾荒者准其減等納價承領以示獎勵等語奉示之下民因十七蘇木除已

墾外尙有空閑可耕之地約六十餘頃隨即查明地界繪成地圖具報該局情願備價承領當蒙批准查辦民屢次稟請勘丈以便交荒領種始於今春勘明界址未經清丈詎有該蘇木章蓋與民人王老四等出而霸領已蒙豐鎮墾務局准領發給通知書民思十七蘇木地係民承墾有年卽有閑荒地宜遵章原墾况民人一奉明文隨即到局報領今王老四出而霸領揆之情理殊屬不合民情難甘復於陰曆三月間稟局辯訴蒙批准本局派委丈出正黃旗餘荒三十餘頃業由該蘇木承領通知書應候咨局會同本局高等調查員察看該地情形再行核放至該蘇木地界以內如有餘荒仍准該民郝廣慶指明具報聽候本局令委會同旗員前往查勘屬實並無轉轄方准秉公核放等因並蒙施委員和平處辦諭民與該蒙員按照三十餘頃分領等語該蒙員等一味恃強寸隴不讓情迫無法民復以該蘇木空閑內可耕者有六十餘頃之多而祇報領三

十餘頃該蒙員素謀隱匿私吞國課顯然可見且民住房尙在該處空閑界以內之地若容他人承領民何以居住稟蒙批示該民郝廣慶前稟請認領正黃旗十七蘇木空閑業由本局批示姑念該民在該餘荒界內早年蓋有住房候令派員前往調查秉公辦理嗣據該員報稱郝廣慶在該蘇木餘荒界內並未蓋有住房等語前據該民一再朦稟並藉詞已蒙本局批准與該蘇木分領等語實屬有意纏訟應不准理毋再多瀆等因奉批之下不勝驚異查墾務局責在清丈今未清丈該蘇木之地何以知有餘荒僅三十餘頃民既指報六十餘頃而委員祇丈報三十餘頃非特蒙員隱匿於前抑且藏奸於後而墾務局置之勿論公理何存墾務定章具在將何以取信於民爲此呈請恩准俯賜派員調查按章辦理等情除由本總局批示呈悉據稱該蘇木空閑荒地未經墾局丈放收欸發照該民人何得私自開墾干犯厲禁據稱該地六十餘頃而委員祇報三十餘頃

顯係蒙員隱匿等情是否屬實仰候令該局派員秉公切實勘丈遵章辦理此批掛發外合亟令仰該局遵照派員切實秉公勘丈遵章辦理並將辦理情形具覆此令

墾務總局令豐鎮墾務局據民人何智呈稱藏奸霸領騙價抗地一

案仰卽切實查辦具復文

五年九月九日

案據豐鎮縣民人何智呈稱民隨交現銀票四十兩被武章蓋詐騙銀地全無及赴該局呈訴勘丈員竟被武章蓋運動置之不理且於該民人已墾地毗連之空荒本有四五十頃委員與蒙人祇清丈出十餘頃種種弊竇顯然可見等情除批示外合亟抄錄原呈令仰該局長切實查辦據實呈復以憑核奪切切此令

墾務總局指令陶林墾務局據呈丈放八台牧場荒地等情仰候劃

清界限再由主管縣局放墾文

五年九月十日

呈悉查八台地方業由都統核准劃歸商都招墾設治局管轄現正預備劃清界限所有該台放墾事宜應俟疆界劃清再由主管墾局派員丈放方爲正當辦法既據該局派員前往勘丈丈出地畝若干但須先行填明地段表暫緩放墾發照俟劃界後究竟地屬何縣卽歸主管縣局放墾現在該台荒地如尙未丈竣著卽暫行停止移丈他處可也此令

墾務總局呈都統據涼城墾務局呈覆民人崔治邦與該蘇木官兵

地畝鞫業經具結完案據情轉呈請備案文

五年九月二十二日

案奉鈞令據鑲藍旗總管呈稱據署參領關防副參領兼公中佐領阿凌阿呈稱本旗十三佐報稱遵奉旗飭本佐官員等赴西界丈量本佐領官兵隨缺田地於指界丈量時據委員聲稱將此地丈入民人崔治邦押荒地內當經據情稟告乃竟自不理並妄稱爾佐官兵均含混指給致生糾葛等語職等欲要查看民人崔治邦此地部照所載界址而委員不管前

清部照則亦丈量職等欲與商議並無交詢情詞逕往三佐去訖愚思蒙人隨缺田地一竟丈入民人押荒地內顯係偏向農民理合據情呈報請將官兵隨缺田地丈給農民被奪被佔苦情轉報鑒核辦理給予各窮兵丁等度命等情理合呈報批示施行等情據此除批候令查明再行核辦外合亟令仰該總局迅卽查核明確呈覆察奪以憑令遵切切此令等因奉此當由本總局轉令該局詳細查明據實秉公審理呈覆在案茲據涼城墾務局局長高承琳知事兼坐辦王丙彝呈稱遵卽派員劉宗准前往復查查得崔治邦原領部照地內一頃五十畝去歲十二月間畢勘丈員丈出二頃所餘之地當由該民人繳清荒價換領部照其地雖與蘇木缺地連界而界至實無憑分辨該委員因之諭令崔治邦與蘇木官兵自爲了解茲據該兩造各具甘結情願完案等情前來理合呈請鑒核等情除令遵外理合呈請都統鑒核備案謹呈

舉務總局令陶林舉務局據鑲藍旗總管呈稱該佐親兵孟克巴雅

爾等冒領隨缺地畝仰卽查明具覆文

五年九月二十二日

案奉都統令開據署鑲藍旗總管多普端呈稱轉據本旗察哈爾佐領下署理驍騎校事務前鋒特固斯們都護軍格爾迪達那什勒哈勒津領催貢格各兵丁等呈稱去年經陶林舉務局將本佐餘地丈量二十餘頃押荒升科訖現有本旗參領隨缺田地六頃蒙古員外郎隨缺田地二頃五十畝本佐官兵隨缺田地六十五頃本不足數乃有本佐親軍孟克巴雅爾於本年陰歷二月間妄報舉務局員冒交押荒領照卑窮兵等安分當差現遇時艱餉銀不給屢經馬賊搶劫馬匹服物困苦已達極點而親軍孟克巴雅爾竟自押荒領照連官兵等熟田地一併強行奪領以致卑窮兵等實在無法度命理合呈報本佐伏乞轉報懇請體恤等情呈報前來正在呈報間據本佐護軍校色德巴勒聲稱於陰歷六月初一日又有本

佐護軍圖都普僧格領催恩克們都等冒報陶林墾務局員將烏蘭哈雅隣村之地直至那爾蘇太六頃餘地押荒領照等情呈報前來職等伏查除本佐官兵等隨缺田地並旗下大職兩員隨缺田地外其餘荒地於去年冬間經墾務局員丈出地二十餘頃令交押荒之處業經行知本旗奉旗傳令在案今孟克巴雅爾等私行瞞上冒報紊亂有礙官兵隨缺田地暗地鑽營經行領照殊於定章不合理合呈報懇請轉行墾務局查明辦理以免地畝被人奪失等因呈報前來理合呈報都統伏祈嚴行指令陶林墾務局遵照定章詳明辦理等情據此除指令外合亟令行該總局仰卽轉令陶林墾務局遵照文內各節詳細查明辦理勿任冒領缺地致滋糾葛並將辦理情形具報備案可也此令等因奉此合亟令仰該局遵照文內各節詳細查明遵章辦理勿任冒領缺地致滋糾葛並速將辦理情形據實呈覆以便轉呈切切勿延此令

墾務總局指令涼城墾務局呈覆崔治邦與蘇木官兵被奪被佔一

案兩造各具甘結情願完案文

五年九月二十二日

呈悉業由本總局據情呈覆都統備案矣仰卽知照此令

墾務總局指令沽源墾務局據呈卯正民人宋兆熊稟稱各節當屬

可行自應准其派員查勘除另文呈報外先請鑒核文

五年九月二十五日

呈悉該民人所呈印照係由何處發給其中有無別項糾葛應由該局派員切實查勘另文詳細具報再行核辦此令

墾務總局令兩翼牧場清丈行局據左翼牧羣總管呈覆各節令該

局會同勘明呈覆文

五年九月二十七日

案奉都統令開前據管理三旗達哩崗崖牛羊羣總管卓特巴札普呈稱鑲黃牛羣游牧被左翼牧羣圈佔之地擬乘派員烙印之便會同旗羣按照原撥之地斷辦等情業經抄錄原呈令行左翼牧羣總管暨該總局查

勘呈報在案茲據左翼牧羣總管呈覆前來一面之詞不足爲據除指令外合將原呈隨令抄發仰該總局查照轉令兩翼行局迅速會同勘明呈覆以憑核辦切切此令附抄原呈一件等因奉此合亟抄發原呈令仰該局迅速會同勘明切實辦理呈覆以憑轉呈核辦切切勿延此令

墾務總局指令陶林墾務局呈覆八台荒地勘丈多日酌擬變通辦法

法以資進行請示遵文

五年十月二日

呈悉八台荒地既據該局長呈稱業已派員勘丈酌擬變通辦法商都劃界以後所有該台放荒之承墾簿地段表通知書暨墾戶已未領照繳價一切事宜由該局彙呈轉發商都辦理現在商都界址未經劃定以前仍歸該局照舊進行姑准如呈辦理此令

墾務總局呈都統據涼城墾務局呈覆辦理民人胡珍元與鑲藍旗

第十三佐官兵地畝糾葛一案據情呈覆請鑒核備案文

五年十月十日

案奉鈞署令開據署理鑲藍旗總管印信參領多普端呈稱案據兼署參領關防副參領兼公中佐領阿凌阿呈稱據本旗派出劃分第十三佐鑲紅旗彙祥寺互相爭界之驍騎校德楞額記名護軍校沙津達賚等報稱遵令前往本旗第十三佐游牧九霸溝與彙祥寺所爭之界地方會同鑲紅旗派出護軍校阿克東阿墾務局派出委員孫兆齡等兩方勘查據第十三佐官員等報稱本佐與胡珍元等民並無買賣一畝之地情事係由彙祥寺等買領墾種已十餘年忽自去年將本佐官兵隨缺地任意越佔耕種當經行文該縣經該縣將地退回辦理取具保結等情據彙祥寺喇嘛聲稱本廟原將窩子溝之地已賣給民人崔治邦他將此地賣給胡珍元等其四至崔治邦知道我們不得而知等語兩相爭執當奉委員交諭民人崔治邦所領部照係六頃七十一畝二分之數應先將伊地丈量知足原數則可倘不足數由第十三佐連界之地補給等諭遵由該佐派出

拉丈二人隨同委員丈量後由兩方核計有七頃七十畝所丈之數脗合此內除六頃七十一畝二分外下餘有一頃二十餘畝第十三佐官員等以此地雖屬有餘本佐並不分領惟祈將官兵等隨缺地界址劃分等情我們請與委員商議按照旗下檔圖查辦委員比卽親臨切查商定劃分兩造爭界之地次日欲要指界劃分而委員云昨晚所丈之地長短折算尙欠地七畝此地由伊佐補給結案等語我等伏思買地有部照之民地數已足且官兵等隨缺田地事關極重豈能擅行補給是以各散等情又據第十三佐報稱本佐隨缺田地南界與鑲紅旗彙祥寺毗連耕種香火田地地戶胡珍元崔和聶二楊海馮有旺潘庚所子張三蘭子魏大有呂三疙疸等民九人越界霸佔節經行文該管涼城縣請收管辦理在案適經該縣墾務局派出委員孫兆齡將地戶胡珍元承墾伊旗彙祥寺有部照六頃七十一畝二分之地丈量由本佐傳帶兵二名丈量共熟地七頃

九十餘畝所丈之數相合除部照之數外餘出一頃十九畝次日奉委員孫兆齡交諭此胡珍元有部照之地尙欠四十幾畝由汝佐補給如不遵補轉報將你們參處等諭逕往本旗第四佐查地去訖本佐領官員等由後追去不得已出具情願補給此項地畝圖結旋由第四佐旋回交諭昨晚復行計算胡珍元有部照之地實欠地七畝由汝佐界內所丈一頃一十二畝熟地內除七畝外再將三十畝地給胡珍元收納押荒下剩九十二畝交與該佐交納押荒令照此再由兩造出具漢字押結等諭當已遵諭具結收領次日委員孫兆齡前往九霸溝地方諭將本佐界內原丈一頃二十二畝南山陽一段熟地抵給民人胡珍元三十畝之地將北山不堪耕種山峯荒地丈量九十二畝令由本佐交納押荒等諭返回後本佐官員公同前去請示奉委員孫兆齡交諭此項地畝若不一定照我諭辦理立將伊等轉報參辦等詞怒目強令壓制等諭愚本佐界內有碍隨缺

田地委員孫兆齡一意欲給佃戶胡珍元忽減忽增勒交照辦則窮窘兵丁等隨缺田地猝被奪失甚爲苦累理合據情懇祈轉呈查明辦理外並將委員孫兆齡所丈彙祥寺佃戶胡珍元地畝細數暨本佐界內丈量熟地細數開具清單附後等情各具報前來伏思民國肇造興辦墾務振興財政之際理宜多方正直化導辦理乃該委員孫兆齡竟自偏護一面既將已劃餘荒地畝令交押荒又令補給屢年爭執佃戶胡珍元如此辦理難保無含混嫌疑再起爭端則上延國荒欸項下致貽累糾葛懇請轉報另行派委清正委員辦理以期有裨墾務而資蒙人遵服理合呈報都署伏乞令遵外並一體咨行涼城墾務局合併聲明等情據此除批示外合將原送委員孫兆齡所丈彙祥寺佃戶胡珍元地畝暨該佐界內丈量熟地細數清單一併令發該局仰卽查核呈內事理轉令涼城墾務局查照呈覆此令等因奉此當由本總局令查在案茲據涼城墾務局局長高承

琳知事兼坐辦王丙彝呈稱遵卽派委劉宗淮前往勘丈仍共得地七頃九十三畝二分除胡珍元等原照內地六頃七十一畝二分並沙石不堪耕種之地十畝外淨餘地一頃一十二畝當經該委員諭令胡珍元等分認二十七畝該蘇木官兵等分認八十五畝各給通知書茲據兩造人民各將荒價交清換領部照自不得再起爭端理合呈請鑒核再查前委員孫兆齡辦理此案係因言語之間與該蒙人等衝突實無偏護含混情事合併陳明等情前來理合呈覆都統鑒核備案謹呈

墾務總局呈都統爲呈請令行豐鎮縣知事暨墾務局局長會審地

畝糾葛案件文

五年十月八日

竊查民國四年九月本總局案呈前都統張呈擬清查察哈爾餘荒夾荒考成條例嚴核功過明定責成並請准將察哈爾旗羣台站暨各縣歷年地畝積案專歸地方行政衙門辦理由各該管縣知事墾務局局長會同

裁審以清積牘而安民業一案當奉明令交部核議旋由財政內務農商三部會同遵核繕單呈覆於民國四年十二月四日奉批令准如所擬辦理卽由各該部分行遵照單存此批等因奉此業由部咨行鈞署令行本總局轉令各縣局遵照辦理在案自奉行以來疊據各縣局報結累年積案不下百數十起推原其故良由各縣知事既兼墾務坐辦對於地畝案件自是責無旁貸加以各縣墾務局長遇事得以會同審理尤易得其要領和衷共濟剖判不至愆期國計民生交受利益惟查豐鎮一屬因前墾務局局長賀澎任內凡遇地畝糾葛案件均未與縣知事會審而地畝紛爭積案實以該縣爲最多舊案既累年莫結新案方隨時發生愈積愈多久懸莫結現查該縣民戶荒欠達一十二萬元積案有數十起之多訟案一日不結荒價一日不清縱使嚴厲催收亦難期有起色國課既受損失民業不獲安全長此以往其何能淑殊與當日請將各縣地畝糾葛案件

專歸地方行政衙門辦理以期祛除窒碍清理積案之初意相違擬請嗣後豐鎮一屬凡遇地畝糾葛案件仿照沽源涼城等縣辦法與墾務局局長會同審理以期速結上裕國課下安民業胥在於是所有擬請令縣會局審理地畝糾葛案件以期敏捷而免積懸緣由理合具文呈請都統鑒核施行謹呈

都署令據涼城陶林兩縣代表賈昆徐盡忠等稟稱情迫補訴懇請

遴員詳查依法懲辦以儆官邪仰局派員前往密查文

十五年十月十三日

案據涼城陶林兩縣代表人員賈昆等奎元莊代表人徐盡忠等稟稱民等於九月十四號呈訴涼城墾務局任意濫丈違法擾民各等情旋於九月十九號奉都統第七號批示呈悉仰候令行墾務局迅派委員查明呈覆再行核辦等因足徵我都統體恤元元懷保小民之至意民等同深感戴靜候查察無敢再瀆詎料涼城墾務局與縣知事聞批仍不悔過歛迹

候查反赫然震怒以民等與伊爲難誓必重辦飛籤捕拏差騎四出凡舍
冤呈訴列名之家肆意搜索形類搶劫民等家中老幼或投親他方或匿
避鄰舍間有避匿不及被其警獲立逼獻出呈訴之人如不獻出不論老
幼帶縣拘押近於九月二十五號縣差王二如郭俊趙明德張院生等到
奎元莊鎖縛王銀基強携藍大布六十疋及勒索制錢一百六十串始得
釋放所有家中動產被其搗毀携去不知凡幾其擾害情形較從前更甚
數倍民等何辜遭此荼毒且該局長聞查辦之信潛赴總局數日未還其
中有何作用民等固不敢妄事揣測以我都統之明定不至受其欺蔽而
小民無知水深火熱固不能釋然於心也爲此補訴懇請遴員詳查依法
懲辦儆官邪以蘇民困實爲德便等情據此查此案前已令該總局派員
往查在案茲據前情除批示並分行外合亟令仰該總辦遴派妥員按照
所稟各節前往密查尅日呈復以憑核辦切切此令

墾務總局指令陶林墾務局呈明八台荒地糾葛情形文

十五年十月十四日

呈悉既據呈稱丈竣八台荒地一百四十六頃五十畝零九分五釐劉雅勤前領該台荒地四十頃已經領照者十頃其餘三十頃亦繳清押荒應仍遵照前令持均分主義切實秉公辦理並將該台官兵所欠荒價催令繳清至該局長呈復八台荒地酌擬變通辦法以資進行一案業由本總局指令如呈辦理在案仰卽遵照此後八台附近荒地應暫緩放墾俟陶林縣與商都縣劃界以後再行辦理俾免重複併仰知照單存此令

墾務總局令沽源墾務局迅卽派員勘丈黑河卯正兩汛地畝並迅

催荒欠掃數報解文

五年十月十七日

查該縣黑河卯正兩汛所有地畝亟應從速勘丈以清墾政疊經令行該局迅卽派員實行清丈在案本年九月據該縣知事兼代局長覆稱黑河地面遼闊上季因青苗在地尙未丈完卯正猶未開始拉丈下年自應繼

續進行以清墾政俟人民收穫完竣卽行派員前往黑卯兩汛切實勘丈等情前來現時秋禾業已登場該新任局長務卽查照前案暨本總局迭次批令迅派妥員分途前往切實勘丈立將辦理情形具報查核再查該局本年應解荒價除報解外核與概算預估之數相差甚鉅現在本年年度將次告終仰將所有民戶荒欠乘此秋收之際農有餘粟上緊催收掃數報解考成攸關毋得稍延切切至要此令

墾務總局呈都統據涼城縣

知事

呈覆民人孟土地畝糾葛一案已

斷令兩造具結存案請鑒核備案文

五年十月十七日

案奉鈞令爲涼城民人孟士私佔該旗缺地一案令本總局加令該縣局查明究辦呈覆備查等因奉此當由本總局令催該縣局迅速查明究辦具覆茲據該縣墾務局局長高承琳知事兼坐辦王丙彝呈稱查此案輾轉前因局員清查後從中調處兩造不服當卽咨請縣署傳案核辦茲已

由縣署將兩造傳集質訊並令仍照前委員所斷該民人孟土地內之餘荒與該蘇木官兵等分領五十畝作爲無事兩造具結存案等情理合呈請都統鑒核備案謹呈

商都招墾設治局呈復重行查勘花賀秀等處荒地情形及辦理緣

由文

五年十月二十七日

竊局長奉鈞局訓令內開案據興業公司代表陳楠呈稱竊陳楠前因放墾官荒實邊重農爲國家當務之急首先承領共六十二號以開風氣之先故承墾各戶頗形踴躍陳楠來察收租見未放之官荒爲數尙多而承領此地率退縮不前揆厥原因實因現在未放各地原定荒價高昂以致各戶觀望不前於墾務前途大有關碍再四思維擬再承領花賀秀二百八十號起至二百九十八號止又有羊羣霍牙爾托羅蓋四百一十六號起至四百二十六號止荒地共二十二號沙石在內共計地八十九頃四

十五畝三分以作先導惟地性薄弱中多砂礫幾等石田而定價較各地高昂故至今無人過問惟懇曲賜體恤可否照七十頃數目以下則作價俾補承領以資提倡於墾務不無小補爲此呈請總辦恩准施行實爲公私兩便等情除批據呈所領羊羣花賀秀霍牙爾托羅蓋等處荒地地性薄弱中多砂礫幾等石田而地價高昂懇賜減價體恤等情仰候派員前往切實查明重行踏勘呈覆到局再行批示遵照此批掛發外茲委任本總局調查員前往商都會同該設治局長查照稟內事由切實查明並帶同撥地所委員王械齡重行踏勘以昭核實除分令外爲此令仰該局長卽行遵照會同迅速查復以憑核辦是爲至要此令等因奉此適調查員先奉令同前因遵卽束裝馳抵商都與局長會晤局長當派撥地所委員王械齡會同調查員前往花賀秀及羊羣霍牙爾托羅蓋等處重行逐一踏勘茲勘得陳楠承領花賀秀二百八十八號至二百九十九號荒地共

計五十二頃二十畝均下則應除穢草及砂石樑九頃又原除一頃淨地四十三頃二十畝又勘得羊羣霍牙爾托羅蓋四百十六號至四百二十六號荒地共計四十三頃九十五畝三分其中四百二十號係中則五頃其餘均下則應除砂石十一頃三十八畝八分又原除四頃五十畝淨地三十二頃五十六畝五分局長覆查花賀秀等處荒地地質薄弱從前原丈各員未能逐細查勘所定等則不免過高砂石亦未除淨現既切實查明自應核減以示體恤奉令前因所有調查員等重行查勘花賀秀等處荒地情形及辦理緣由理合聯銜會同呈覆鈞局鑒核指令祇遵實爲公便謹呈

墾務總局指令興和墾務局據呈報新補勘丈員四員並派委各員分路出丈地點暨起程日期文

五年十月二十七日

呈悉既據呈稱業由該局派委該員等分路出丈均於十月十日由局起

程應如呈備案惟壕夫一名係備丈量大段生荒時挖壕之用清丈餘荒
夾荒既無挖壕之必要壕夫無庸添用已由本總局通令在案仰該局即
便遵照不得添用壕夫致多糜費此令

沽源縣知事呈阿嘉呼圖克圖倉與和親王府牧廠糾葛一案遵章

缺席判決文(初判決書附)五年十一月八日

案奉鈞局令交阿嘉呼圖克圖倉與和親王府牧廠糾葛一案令即速行
判結等因奉此知事疊次警傳該原告阿嘉呼圖克圖倉抗不到案今復
調查證據派員勘地本案事實已明未便因原告久不聽訊懸案莫結按
照知事審理訴訟章程第三十二條第一項缺席判決理合造具初判書
具文呈送鈞局查核批示祇遵除逕呈都統審判處外謹呈

附初判決書

察哈爾沽源縣民庭判決阿嘉呼圖克圖倉與和親王府牧廠糾葛一案

初判書

判決

原告阿嘉呼圖克圖倉業禧敦魯布內蒙古人未到

原告代理人傅善庭年六十六歲原籍大興縣住獨石口瑞慶棧
阿嘉呼圖克圖倉傭工未到

被告人和親王府鎮國公毓璋北京人未到

被告代理人德麟年四十一歲北京人住獨石口裕成店王府護
衛

右列當事人間因牧廠糾葛一案經本庭查訊原告屢傳不到被告代
理人申請終結照章缺席判決於左

主文

石門子溝以南兩造所爭弓溝等地仍依前清光緒三十四年舊案判

歸和親王府此地既由和親王府招致呂學端等承墾原墾原領係屬正當辦法墾局丈發小票均合章程原告不得爭執訟費歸原告遵章繳納

事實

一原告赴都署之稟述竊活佛有前清先皇賞給牧廠地歷年荒蕪界址混淆因被地鄰侵佔至民國三年六月間蒙都署派委會同陸軍部及左右翼並鑲白旗整頓墾務查勘該地劃清界址立有碑記不料該地未經劃界以前已被呂學端將所靠左右翼地角賣給他人業已開墾成熟佈種數年惟思伊等既經開熟仍著伊等耕種按年爲活佛納租請都署發給執據足爲永久憑證云云二原告代理人傅善庭兩次到庭之陳述該倉於前清乾隆七年蒙賞牧廠一處坐落察哈爾鑲白旗屬下都各山左近地方圓五六七十里不等於嘉慶二十年欽派

王侍郎劃界因多坎坷不平之處未能勘丈畝數繪具圖說印發圖冊
爲證至光緒三十三年間竟被和親王府侵佔開墾多處民國三年
復經何都統陸軍部會同鑲白旗左右翼太僕寺正白旗羊羣總管等
分界立碑現已砸毀和親王府放墾之地卽係此地至光緒三十四年
所具甘結係屬威迫並呈繳滿漢文圖各一紙及嘉慶二十年印文抄
稿一紙當庭諭令回取印文圖冊該代理人一去未回屢次票傳亦不
赴案聽訊三被告鎮國公毓璋之函述本案地畝糾葛係本府先祖和
碩和恭親王與該倉友善將黑山子馬廠東北隅內之地借給該倉避
暑所有權並未讓與迨光緒二十九年本府將黑山子牧廠報請開墾
該倉不肯退還於光緒三十三年控蒙都統署飭派鑲白旗總管棟噶
爾布左翼太僕寺總管策林棟魯普會同該倉徒衆該府委員劃分地
界由豆爾格山東大道靠石門子溝之南道右翼太僕寺牧羣北界將

道北之地指與該倉道南之地指與該府兩造各具永不返悔甘結都署有案可稽今呂學端開墾之地均在石門子溝迤西偏南並非該倉之地云云四被告代理人德麟屢次到庭之陳述與鎮國公毓璋函述同並據該代理人呈送滿文印冊一本漢譯印冊一本滿漢文黑山子園地老圖一紙五竹林堂同善堂天長仁記曹仁等之狀述伊等於民國二年承墾和親王府地畝坐落大弓溝等處修蓋房屋押地價值所費甚鉅亦非鋌而走險實因屢見歷任都統暨撫民府示諭准該府在黑山子一帶招佃開墾故敢承領伊等承墾王府地畝屆時亦應升科劃歸活佛廟產亦不過認租原無損失惟王府放墾之際活佛並未言係伊地今活佛見有租可分倡言係伊地土意在起租農戶真偽莫辨請查明核判以便遵循云云六呂學端之稟述伊於前清光緒三十四年放墾和親王府黑山子地畝其四而界線經委員圖德胡善薩及各

旗羣主等指立界線兩無糾葛今阿嘉呼圖克圖稱彼牧廠當左右翼未分界前卽被伊盜賣豈不知先前按圖指定都爾格山爲界一語該倉之地名曰什不年與伊放墾之地風馬牛不相及云云七都署發交前清光緒三十四年之舊案陸軍部左翼牧羣總管策林棟魯普推廣墾務繩丈委員理藩部候補主事善徵稟稱下略遵札前往該處傳知鑲白旗帶同阿嘉佛倉呢爾巴噶賴並該公府牧丁委員齊集磋商再三開導仍按去歲勘明之界由黑山子廟東樑車道至石門子溝迤南右翼太僕寺界以北歸阿嘉佛倉以南歸毓公府劃分清楚均各依允取具兩造甘結稟蒙都統批准立案查閱甘結內其界限與該委員等稟詞無異八本署派員之調查本縣會同墾務局令派委員翟春山排長劉登元調查呈稱奉令前往集齊原被人等實地查勘據雷泥把巴圖等聲稱地係該倉所有據德麟聲稱係屬王府上賞地畝兩造空言

狡展未能查得真相茲繪具草圖一紙呈候核奪嗣據派該排長劉登元復查呂學端等開墾地畝是否在石門子溝迤南擬據該員復呈查明呂學端等墾熟地畝均在石門子溝迤南請核辦云云

理由

據上事實詳加審查兩造所爭地點不能認爲該原告所有有五論點第一論點該原告所主張者係前清嘉慶二十年賞給圖冊前清賞給圖冊該原告並未將正式印文圖冊送縣查驗不足認爲有效卽或清廷實有正式印文圖冊賞給該倉查前清蒙古土地遼闊草昧未開人跡罕到地利未興清廷賞給地畝亦屬約略指給並無一定界址卽該原告稟述亦云賞給牧廠歷年荒蕪界址混淆該原告代理人陳述又云地多坎坷不平未能勘丈畝數清廷圖冊何足以證明所爭地點決爲該原告所管有該原告赴都署稟述請發執據亦知賞發圖冊難作

依據不然何必多此一舉且該被告亦依據乾隆七年之圖冊主張主權查其所送圖冊又有正式印文載明乾隆年間將蘇魯克地方之游牧奉旨賞給正藍旗和碩和親王又稱黑山子本蘇魯克地方游牧等語見被告代理人所送康熙六年編立蘇魯克哈拉霍碩人丁事實冊核與現今地名毫無差謬原告圖冊如可作本案有價證據則該被告之圖冊尤可作爲本案之鐵證魯魚難辨恐無終結之一日兩造既起爭執此種年湮代久之圖冊卽不能爲之佐證第二論點該原告近年所主張者係民國三年分所立碑記本案民國三年如蒙都統派員重行勘丈劃立碑記乃係最近證憑自應發生效力惟僅出諸該原告一面之詞並無他項證據足以證明其詞之不虛况牧廠糾葛涉訟年久前清光緒二十四年在都署曾經有案如果民國三年重行勘丈立碑都署必繼續粘連斷不至一案分作兩卷而檢發案卷亦必取最後之

終結豈有棄新而取舊何以民國四年十二月間都統署飭科檢發案卷僅發光緒三十四年全卷而不將民國三年卷據一并抄發下縣以爲此案解決之標準則該原告所主持民國三年重立界石之爭論砌詞捏瀆實無疑竇第三論點呂學端開墾地畝乃在前清光緒三十四年所爭地點果爲該原告所管有當呂學端等墾地之際該原告豈肯放棄主權不卽立時禁止竟如秦越之視肥瘠置諸度外不聞不問其中之隱情可想而知矣顯係該原告見此項地畝漸次開墾地利勃興所以於民國三年始也控呂學端之盜墾繼也控德公府之侵佔以恆理測度其爲該原告明知該王府圖冊四至不清藉此紛爭以爲圖利之計第四論點墾戶曹仁等與原被當事人並無親怨無論地歸何人該墾戶等出租種地無得無失實居本案中立位置而該墾戶曹仁等之狀述亦稱墾種土地乃係王府之產則所爭地點非原告所管有可

爲一證第五論點審判案件根據證券本案原被提出圖冊年代已久黑白難分不能依據判斷而解決此案惟有按照光緒三十四年之舊案以爲標準該舊案載明石門子溝以南地歸毓公府分劃界址既詳且盡兩造依允具結在案該原告代理人所稱光緒三十四年甘結係屬脅迫果出脅迫而成何不上訴追請無效迄今事隔多年始出異言顯係捏飾藉口翻悔不能聽其一面無據空言遽翻前判自應維持舊案以斷葛藤而息爭端所爭土地本署派員查明既在石門子溝迤南應歸毓公府管有地經呂學端等開墾成熟毓公府請求沽源墾務局丈明發給各墾戶小票乃屬原墾原領照章辦理均無不合呂學端等開墾地畝既由該府放給雙方同意更無盜墾之可言按據以上論點原告爲無理由該當事人間對於本案判決如有不服准法定上訴期間二十日內呈請上訴或自赴察哈爾審判處直接上訴例徵訟費歸

敗訴人負擔茲因該原告屢傳不到按照知事審理訴訟章程第三十二條第一項缺席判決如主文

墾務總局指令兩翼牧場清丈行局據呈遴員派充督率勘丈員以

專責成文

五年十一月九日

呈悉據稱一等勘丈員劉宗准品學兼優墾務諳練堪以勝任高等調查兼督率勘丈員等情應准該員充該局督率勘丈員毋庸兼任高等調查名義該員薪水着按月加薪六元以資鼓勵仰即遵照此令

墾務總局令涼城陶林兩墾務局將丈入該民人賈昆等不堪耕種之地核實拋除免繳地價並轉令勘丈員等秉公勘丈勿違定章

文

五年十一月十日

案准都署總務處發交據議員報告陶林涼城德和等村人民賈昆等地畝所有溝洫山頭不堪耕種者全行丈入等語查勘丈員丈量地畝凡沙

石城灘不堪耕種之地例應拋除免繳地價並將拋除地畝數目於照內加蓋戳記以昭信用業由本總局通令各局遵辦在案茲准前因合亟令仰該局詳細查明如實有其事即將丈入該人民等確有不堪耕種之地核實拋除免繳地價以全信用並仰該局轉令勘丈員等丈量地畝務須秉公勿違定章致生轆轤仰卽遵照辦理並將查辦情形具覆此令

舉務總局令張北舉務局據王璽等稟爲糧照久懸等情按照原案

查核辦理文

五年十一月十一日

案據張北縣民戶王璽郝常久張世舉等稟稱竊民等前在總局承領大馬羣烏蘭蘇木白馬庫倫荒地因與劉元高清風所領之地糾葛不清訴經總局令交張北縣會審當堂判結與民等調撥牛羣土城子荒地等因具結在案民等靜候年餘並未撥給伏思民等所領之部照註明民國五年升科納糧惟民等地畝至今尙無着落以何交納國課現聞土城子荒

地有劉利等在總局稟請開放已蒙照准民等聞之此地開放不勝幸喜遂於八月初間在張北縣署稟請撥給土城子荒地案至今數十日未蒙批示情出無法只得叩乞總辦訓令張北縣會同墾務局按照撥補荒地上裕國課下安農業實爲德便等情除批示外合亟令仰該局長會同縣知事卽便按照原案查核辦理可也此令

墾務總局指令沽源縣知事據呈阿加呼圖克圖倉與和親王府牧廠糾葛一案遵章缺席判決文

五
年
十
一
月
十
二
日

呈悉既據逕呈仰候都統暨審判處令遵可也判決書存此令

張北墾務局局長坐辦由什巴爾臺電呈勸誠鄉民卽日開繩進丈

文
五
年
十
一
月
十
五
日

都統總會辦鈞鑒奉諭馳往柳河灣傳諭鄉約及各地戶齊集該村曉以利害苦口開導不得再行抗丈致違國法干冒不韙都統愛民以德不忍

不教而誅特派知事等前來勸導倘再執迷不悟故意違抗大兵一到後悔無及知事等殷殷告誡而衆口曉曉多方置辯衆地戶愈集愈多約有三百餘名之譜知事等竭力開導置若罔聞嗣又高擎牌示宣布德意始猶堅持前議極端抗丈知事等恩威並用勸戒兼施幾於舌敝唇焦幸賴都統福庇感化無形咸有悔意就我範圍已於昨日馳往紅岳子華蓋諾以吳勇莊戶爲地點今日開繩挨次清丈循序進行再無阻礙現狀如是謹此電聞

知事高崇祐
局長吳恩溥叩寒

墾務總局指令沽源墾務局局長坐辦呈報派員勘丈黑卯兩汎地

畝困難情形暨親往該汎辦理文

五年十一月十五日

呈悉據稱該知事兼墾務坐辦於本月十一日親往該汎傳集主佃就地訊斷所見甚是仰該知事局長就該民人等所陳兩項辦法體察情形採用一種剴切曉諭該民人等並督同勘丈員等就地開繩如實有抗丈情

事卽由該知事兼墾務坐辦會同該局長就地依法酌量懲辦卽遵照辦理並將辦理情形具報備查仍轉咨縣署知照附件存此令

墾務總局指令兩翼牧場清丈行局據呈事關交涉礙難清丈請鑒

核令遵文 五年十一月十六日

呈悉查教民阻撓清丈疊經歷任都統嚴行禁止并出示曉諭在案神甫牧師傳教中國既本爲善守法之義以相勸導人民業經奉教尤當奉公守法以符宗教勸人爲善之本旨本總局對於民教一視同仁該教民等既爲中國之民卽應遵守國家之法仰該局長卽本此義親赴教堂與該神甫妥爲接洽並由該局出示曉諭妥籌進行可也此令

墾務總局令陶林墾務局爲正黃旗與劉雅勤地畝糾葛礙難強制

辦理文 五年十一月十六日

呈悉據稱高煙筒暨塞烏蘇地方荒地卽該旗公共牧場且適當牧場之

中心劉雅勤顯係冒領該局擬將塞烏蘇偏東平地另給劉雅勤七十二頃八畝八分辦法尙屬平允該民人何得再行爭執如劉雅勤堅不退讓卽將原發部照追回將劉雅勤原繳地價如數發還惟該旗旣不肯放棄地畝卽應遵照定章如數繳納地價領照管業倘該旗藉詞支吾不願如數繳價則仍將此地斷歸劉雅勤或他人承領仰該局長會同該縣知事秉公訊判以結此案並由該局派員認真切實勘丈務得地畝確數勿得含混再該旗原呈內稱劉雅勤冒稱八台地畝稟報丈量則此案應與該局前次呈報劉雅勤與八台官兵地畝糾葛一案一併判結具覆以斷葛藤至放槍打人各事案關刑事自應專歸法庭審理仰卽遵照並轉咨該縣知事遵照圖存此令

墾務總局令豐鎮縣

知事局長

迅將王建勳等地畝轆轤案件秉公辦結

具復文

五年十一月十七日

案據豐鎮縣領戶王建勳地戶林裕德堂樊廷元稟稱緣生父王政於光緒三十三年立名三多堂呈稟緩遠墾務大臣案下認領正紅旗混托胡蘇木八凍花梁草荒二十頃奉准承領在案迨三十四年冬季派希委員勘丈清楚繪圖指界此地高山石岑又無點水不堪耕種按作下地每畝荒銀三錢共合荒銀六百兩緩遠有案豐鎮縣第一科案存收欠荒銀冊但此地土脈不肥所以不能急速召民認墾完荒民國三年共交過兩頃七十五畝換出荒條縣照民國四年生招民墾押備納荒銀之際突有教民趙得功率領蒙人土不凍等手持洋槍將耕地牛九條刁去又割去生菜籽數十石畏其兇惡不敢辯言用敢稟請作主蒙墾務局局長批令譚委員施委員李委員會同正紅旗總管正副參領堂訊棒責蒙人飭交原牛又飭同本蘇木佐領指地分界令生當時同委員蒙員就挖壕塹限生一月急速交下欠荒銀兩正在備欸之際不料趙得功呈生縣署臆懼催

荒委員王中秀前任袁知事不論曲直顛倒是非既是伊地因何交牛受責意不知法律另有特別法乎但生寒困之人不能親赴前月呈稟飭批豐鎮縣知事墾務局局長至今未蒙堂訊生手執兩頃七十五畝恨不能耕種一畝年年升科而趙得功與蒙人私買一不交荒二不升科年年霸種獲利一則目無法紀二則欺生孤單情迫無奈怎的再呈投稟作主恩准核斷施行等情查此案前經該縣知事袁樹滋委員王中秀會同審訊未將此案判結致該民戶等一再上訴迭經本總局令行該縣知事暨該墾務局局長辦結具覆乃遲至數月之久未據該縣局辦理呈覆致該民戶等上控不休案幾盈尺殊屬非是除批示外合再令仰該知事局長會同迅將此案秉公辦結具覆勿得再延以清訟累仰卽遵照此令

墾務總局令兩翼牧場清丈行局據張殿璽等公稟證明于連張慶

榮等昧心霸地各節卽傳集人證秉公訊結文

日五年十一月十九

案據沽源縣六面井村排頭張殿璽首事民人王國棠等稟稱竊前於民國二年三月間民等同張王兩旅長辦事傅化南同向和親王府興隆地局承領荒地藉謀生計民等所領地畝均係自己督同地戶開墾按年分糧初無異議而兩旅長所領之地共計四十頃亦有陸軍部收據爲憑比時因地處邊疆專人照管匪易遂按本地習慣招邀地戶等遵約共交糧四十石分存該地皮房恒順永及李見喜處有糧條可證地主地戶均無異言詎料民國四年該地戶等陡起貪念始則抗糧不交繼竟圖謀霸地因之成訟糾葛不清民等係同時領地此中情節明如觀火雖知于連張慶榮等爲本處土棍初亦未料其如此強橫狼子野心實動公憤况民等均有土地亦均有地戶倘影響所及各地戶均起蠶食鯨吞之念難免不生唇亡齒寒之悲因之公同議決具稟願作此案證明冀求權利分明藉杜旁觀覬覦庶幾鼠雀無爭地主均保全命產從此風浪平靜墾務可望

勃興眞僞難逃公論是非自有定評事理不公斷難緘口是以公同來口
甘具證書詳陳此案始末真情請求地歸本主自由處分理合具稟伏乞
總辦恩准提集原被見證人等嚴訊公斷俯賜批示以便遵循實爲德便
等情據此除批示據稟已悉候令行兩翼清丈行局查明秉公從速辦理
仰該排頭首事等投案質證可也此批掛發外合亟令仰該局長迅卽傳
集原被見證人等切實訊明秉公從速辦結仍將辦理情形具報查核切
切此令

涼城墾務局呈覆清丈廟北山峯餘地突有廟主地戶聚衆抵抗不

敢清丈請示遵文

五年十一月十九日

案奉鈞局令開查鑲紅旗總管呈請核示涼城墾務局丈出廟北山峯餘
地應否照舊辦理一案曾於本月二十日令知該局長會同涼城縣知事
迅卽切實查明具覆核辦在案茲奉都署令同前由應卽抄錄原文令仰

該局長迅速查明核擬具覆毋得稍延是爲至要此令附件一扣等因奉
此查該廟香火地畝係前清墾務大臣貽穀奏給計有三六大地三百頃
上下給有執照爲憑每畝仍征收地價僅不升科逕由該廟喇嘛向地戶
每畝收租四十餘文作爲該廟香火之資但此地雖係前清放給地內夾
荒甚夥除去原領之地外約有餘地一百餘頃自應遵照定章切實清丈
以歸劃一茲奉前因當卽會商涼城縣知事咨商鑲紅旗總管派員會同
查勘此項地內究有餘地若干以便呈覆鈞局請示遵辦不料該員等去
後旋據報稱自到該地後該廟喇嘛藉端推諉延不指界員等往返開導
始能就緒業經查明界限諭令各地戶呈驗執照以便按照勘丈忽有該
廟永祥吉祥等村地戶王亮喬志忠王復漢蔡榮等聚眾抵抗勢甚洶洶
等情前來局長坐辦以該村鄉愚無知誠恐釀成事端祇得諭令該員等
暫時回局以待呈請辦理所有該廟地畝及地戶阻撓各緣由理合呈覆

鑒核謹呈

兩翼牧場清丈行局呈爲奉令會同查勘核辦牛羊羣與兩翼交涉

地界情形請令遵文

五年十一月二十二日

案奉令開據牛羊羣總管呈稱兩翼圈佔正白牛羊羣南界及鑲黃牛羣新撥游牧南界地畝轆轤令卽會同核辦呈覆等因奉此當經局長林茂亭總管卓特巴札普薩穆端隆魯普幹珠爾札普等約定日期各持圖冊公同核議茲查民國三年左翼劃界築墩立碑係查乾隆七年底案地圖經陸軍部鄧委員暨奉都署派圖委員會同各毗連交界人員劃分辦理查光緒三十二年經額副都統有將左翼與正白旗連界之巴音托羅蓋撥給鑲黃牛羣之案彼時前左翼總管等均未承認亦未出結而牛羣以額副都統有撥給地之說於是遂令蒙人數十戶遷居左翼界內此係與左翼地界轆轤之原因也然兩方各有理由當經茂亭與兩方調停商議

該處之地既有牛羣蒙戶遷居數十戶歷有年所遷移不易且查鑲黃牛羣舊游場地曾於光緒三十二年墾放四五千頃該羣蒙戶因之於三十年遷移左翼居住總管卓特巴札普願將本羣開墾之地應得四釐私租銀歷年按照居住左翼之地數撥給左翼以省遷移之費總管薩穆端隆魯普亦以爲然各無異詞至所詳右翼圈佔牛羊羣界案查民國三年劃界立墩亦同左翼經陸軍部鄧委員暨都署圖委員會同各毗連交界人員劃分辦理其中不無越佔牛羊羣之地者係因劃界遵照光緒三十二年存案地圖也總管卓特巴札普以爲統係國家場地似無庸爭持惟蘇濟地界係本羣游牧極關緊要之地若不退還甚有關礙當經茂亭從中和議無論彼此兩界皆係國家公產無分畛域既係蘇濟地界爲牛羊羣緊要牧地何妨將該處退歸牛羊羣計長約十一里寬約五六里不等其餘圈佔之地既經陸軍部暨各界人員劃界所立墩碑亦無須更移茲

公同議定將右翼應得恤蒙銀撥給牛羊羣三百元似於公私均無妨礙如此議決各無異議所有遵令核辦兩翼與牛羊羣地畝情形理合具文會銜呈覆鈞座是否之處未敢擅便伏懇鑒核令遵施行實爲公便謹呈

墾務總局指令兩翼牧場清丈行局據呈爲奉令會同查勘核辦牛羊羣與兩翼交涉地界情形請令遵文

五年十一月二十八日

呈悉據稱各節尙屬可行業經本總局據情轉呈都統鑒核令遵仰俟奉令再行轉令遵照可也此令

墾務總局呈都統據陸軍部左翼牧羣總管薩穆端隆魯普兩翼牧場清丈行局局長林茂亭牛羊羣總管卓特巴札普陸軍部右翼牧羣總管幹珠爾札普會銜呈稱核辦兩翼與牛羊羣地畝情形請鑒核令遵文

五年十二月十四日

案據陸軍部左翼牧羣總管薩穆端隆魯普兩翼牧場清丈行局局長林

茂亭牛羊羣總管卓特巴札普陸軍部右翼牧羣總管幹珠爾札普會銜呈稱爲奉令會同查勘核辦牛羊羣與兩翼交涉地界一案奉令開以牛羊羣總管呈稱兩翼圈佔正白牛羊羣南界及鑲黃牛羣新撥游牧南界地畝轆轤令卽會同核辦呈覆等因奉此當經局長林茂亭總管卓特巴札普薩穆端隆魯普幹珠爾札普等約定日期各持圖冊公同核議茲查民國三年左翼劃界築墩立碑係查照乾隆七年底案地圖經陸軍部鄧委員暨奉都署派圖委員會同各毗連交界人員劃分辦理查光緒三十二年經額副都統有將左翼與正白旗連界之巴音托羅蓋撥給鑲黃牛羣之案彼時前左翼總管等均未承認亦未出結而牛羣以額副都統有撥給地之說於是遂令蒙人數十戶遷居左翼界內此係與左翼地界轆轤之原因也然兩方各有理由當經茂亭與兩方調停商議該處之地既有牛羣蒙戶遷居數十戶歷有年所遷移不易且查鑲黃牛羣舊游場地

曾於光緒三十二年墾放四五千頃該羣蒙戶因之於三十三年遷移左翼居住總管卓特巴札普願將本羣開墾之地應得四釐私租銀歷年按照居住左翼之地數撥給左翼以省遷移之費總管薩穆端隆魯普亦以爲然各無異詞所詳右翼圈佔牛羊羣界案查民國三年劃界立墩亦同左翼經陸軍部鄧委員暨都署圖委員會同各毗連交界人員劃分辦理其中不無越佔牛羊羣之地者係因劃界遵照光緒三十二年存案地圖也總管卓特巴札普以爲統係國家場地似無庸爭持惟蘇濟地界係本羣游牧極關緊要之地若不退還甚有關礙當經茂亭從中和議無論彼此兩界皆係國家公產無分畛域既係蘇濟地界爲牛羊羣緊要牧地何妨將該處退歸牛羊羣計長約十一里寬約五六里不等其餘圈佔之地既經陸軍部暨各界人員劃界所立墩碑亦無須更移茲公同議定將右翼應得恤蒙銀撥給牛羊羣三百元似於公私均無妨礙如此議決各無

異議所有遵令核辦兩翼與牛羊羣地畝情形理合具文會銜呈覆鈞座
是否之處未敢擅便伏懇鑒核令遵施行等情前來查據稱牛羊羣總管
願將本羣開墾之地應得四釐私租銀歷年按照居住左翼之地數撥給
左翼以省遷移之費又蘇濟地界爲牛羊羣緊要牧地不妨將該處退歸
牛羊羣將右翼應得恤蒙銀撥給牛羊羣三百元並據稱由該局長兩方
調停各總管均無異議可否如呈照准之處理合呈請都統鑒核令遵以
便轉令遵辦謹呈

墾務總局指令豐鎮墾務局呈報訊結民人史占倉稟控譚委員一

案乞鑒核備案文

五年十一月二十三日

呈結均悉既據呈稱譚委員並無索取餽送及不給物價情事施易兩委
員前往四同堂覆丈時該莊民戶墊給米麵等費已經如數發給該民並
無異言出具甘結存案譚委員原丈四同堂餘地十二頃不敷之數相差

甚鉅係因該譚委員所丈地畝均係熟荒其餘生荒當日尙未一律丈放相衡見絀情尙可原擬懇一併免予置議等情姑准備案據稱該局書記尹天純辦事謹慎堪以派充第一課課員應卽照准仰由該局遵章取具該員保證書存案再令到差結存此令

墾務總局指令商都招墾設治局局長調查員等據呈遵令查勘大白石等處荒地情形及辦理緣由繪具圖說會銜呈復請查核令

遵文

五年十一月二十五日

呈悉查大白石山南腦前荒地該立本公司代表既不願承領該局長調查員擬將商都城外西南北三面附近之地共淨地四十八頃撥給該公司承領以清糾葛事屬可行至布檔圖山荒地既經該調查員會同該公司代表及撥地委員王械齡等復往逐細踏勘仍有不堪耕種之地應再除山樑砂石十四頃五十九畝四分蕪灘十頃連前共除九十四頃十一

畝三分共淨地二百一十頃計中則地二十頃下則地一百九十頃該公
司代表已承認具領呈繳押荒領照完案并准備案圖說存此令

墾務總局批陶林縣議員胡培棠等據稟稱田禾被旱匪氛環繞請

暫緩清丈文

五年十一月二十六日

稟悉據稱田禾被旱匪氛環繞稟請暫緩清丈等情該議員等自係爲體
恤民艱起見惟清丈要政一經清價永遠管業上裕國課下全民產係奉
明令舉行本區未便單行停止據稟各節候令墾務總局轉行陶林縣知
事暨墾務局局長體察情形如確係被災地方准其暫緩清丈以示體恤
其餘各地仍應遵章辦理該議員等素明大義務須家諭戶曉總期國民
兩無妨礙交受其益是所切盼此批

墾務總局令商都招墾設治局將放給王元之地暫行撤銷免致再

起訟端文

五年十一月二十八日

案據陶林墾務局呈稱竊職局前奉令勘丈八台荒地因該地與劉雅勤
轆轤不清在陶林縣署起訴業經一再呈明鈞局指示辦法在案茲據八
台佐領高頭布刀爾計等呈稱緣陰歷八月初八日蒙貴局勘丈八台花
腦包大小英圖高烟筒蘇計等處荒地一百四十六頃餘當時職等備價
續交荒價貴局言職等與劉雅勤糾葛不清欸項暫且緩交候轉呈總局
如何批示再當核辦等語職等只可靜候不意商都招墾設治局又將大
小英圖丈放王元等承領職等不知何故竊思陶林商都皆係奉總局公
事況此地劃歸商都貴局就該咨會商都不能再放此地今一地兩局丈
放故意令民起風潮以失信用目下蘇計之地又有別人在商都承領派
員勘丈職等在總局承領之際蒙總局批准令職等交欸承領兩次交欸
並無異言當時無人承領可知隨後又令行貴局丈放劉雅勤商都丈放
王元等如此辦法成何體統再者職等當時續繳荒價是貴局不收非職

等不交將來兩局將地放盡職等落一場空非職等自誤實貴局誤職等也仰懇局長照章斧斷葛藤以昭信用請將八月所丈之地令職等該如何續交荒價發照管業實爲德便等情據此當經職局批令據稟已悉查八台荒地本局前奉墾務總局令行文放旋於九月初間本局派員勘丈共丈得大小英圖花臥鉢蘇計等處荒地一百四十六頃餘又因該地有劉雅勤在本局王前局長差內承領大小英圖花臥鉢蘇計等處荒地係四十頃之數正是該佐領等承領之地雖勘丈畝數多少不同而地點四至實卽同一地方該佐領等與劉雅勤類起糾葛因而成訟本局爲慎重墾政起見雖經該台官兵請願承領因亦不敢冒昧辦理業已數次呈請總局指示辦理近奉總局指令仍持均分主義辦理當卽咨覆陶林縣署遵令判結在案一俟該署判結後地有攸歸卽行放墾收欸發照以資清晰茲據稱商都招墾設治局派員勘丈蘇計之地又將大小英圖丈放王

元等承領等語查本局前呈明丈放八台荒地變通辦理奉准在案總局斷無再令商都招墾設治局丈放本局已丈荒地之理俟呈明總局令行該局遵照可也此批在案再查職局前奉令丈發該台荒地於將竣未竣之際蒙鈞局令行該台荒地俟商都劃界確定以後再行放墾等因職局遵卽呈明變通辦法奉准在案茲據稟前情經職局已丈該台荒地既與劉雅勤轆轤未清又經商都放給王元似此情形殊多窒碍惟該臺荒地既又經商都丈放應否卽請鈞局令歸該局辦理所有八台荒地併關於該地轆轤案件令歸商都招墾設治局照章辦理以清積案而免轆轤等情據此查本總局今年八月第一九八七號訓令仰該商都招墾設治局查明如無別項轆轤方准由王元等承領在案既據陶林縣局呈稱劉雅勤與該官兵轆轤未清該地未便再行丈給王元致再起訟端除由本總局指令呈悉查劉雅勤地畝轆轤一案迭經本總局令行該縣局遵照辦

理現既轆轤未清該商都招墾設治局何以復行放給王元致再起訟端除由本總局令商都招墾設治局查明具復將放給王元之地暫行撤銷外仰該局長仍遵照前令將劉雅勤與該台地畝轆轤案件會同該縣知事迅速秉公辦結具覆並將該台官兵應繳荒價催令迅速繳清至該台官兵兩次續繳荒價該局批令緩交殊屬非是再該局已丈八台地畝應由該局將坐落四至頃畝數目及放墾情形轉咨商都招墾設治局查照暫由陶林墾務局遵章辦理免致再起轆轤至該台附近未丈之地應暫行停丈俟商都劃界確定以後再行放墾仰即遵照此令印發外合亟令仰該局遵照查明具覆如該佐領等所呈屬實即由該商都招墾設治局將放給王元之地暫行撤銷至該台附近未丈之地俟劃界確定以後再行放墾可也此令

墾務總局呈財政部為陶林縣議員胡培棠等稟請暫緩清丈業奉

都統批示請鑒核備案文

五年十一月三十日

案奉都署發出據前陶林縣議事會議員胡培棠等聯名稟稱竊查陶邑
地土礮薄農民異常艱苦豐稔之年收穫僅能糊口每遇凶歲卽有流離
失所之患棄地荒蕪以致錢糧無著加以民國二年自滂江戰事發生以
來雖派軍掃蕩然迄今概無甯日仍四處竄擾搶劫財物擄人勒贖價無
限制習以爲常以致農商十室九空民不聊生及至去冬陶林設立墾務
局下鄉清丈地畝業已清丈數村所欠荒價雖經前任知事勒限比催尙
未交納農民均情願照章退地歸公間有承領者稟請緩至秋收後再繳
不料本年夏季稀逢雨澤秋穫失望旣被亢旱欠收復被冰雹成災被雹
之村已具稟報請勘驗在案查陶林舊地二十四甲在前清時代已復丈
數次現在墾務局又遵章下鄉清丈農民實無力交荒承領不特荒價礙
難征收而且有妄耗清丈經費之虞紳衿等旣負地方之託不得不豫爲

陳述懇請都統鑒核俯准一俟匪氛廓清地方肅安歲歌豐登再爲清丈農民樂輸則荒價易征等情業經都統批示稟悉據稱田禾被旱匪氛環繞稟請暫緩清丈等情該議員等自係爲體恤民艱起見惟是清丈要政一經清丈承領繳價永遠營業上裕國課下全民產係奉明令舉行本區未便單行停止據稟各節候令墾務總局轉行陶林縣知事暨墾務局局長體察情形如確係被災地方暫予緩丈以示體恤外其餘各地仍應遵章秉公妥慎辦理該議員等素明大義務須家喻戶曉總期國民兩無妨碍交受其益是所切盼此批等因奉此查此案既經都統批准被災各村暫緩清丈以示體恤自應遵照辦理除轉令該縣知事暨墾務局局長據實查覆一俟查覆到局再行呈報外理合呈請總長鑒核備案謹呈

墾務總局呈都統奉令議覆察區地畝積案歸行政衙門辦理一案

如援案廢止於察區墾務窒碍甚多請鑒核令遵文

五年十二月四日

案奉鈞令據審判處處長周樹標呈稱案查本年七月十九日政府公報內載 大總統申令官吏犯罪特別管轄令官吏犯贓治罪執行令徒刑改遣條例及施行細則清查地畝訴訟變通辦法簡任法官預保辦法道署暫設上訴機關易答條例均卽廢止此令等因奉此查清查地畝訴訟變通辦法先後迭奉部令遵辦在案惟本年一月十七日奉都統令開准內務財政農商部咨開本部等會呈遵核察哈爾都統呈擬清查餘荒夾荒考成條例並請將歷年地畝積案歸地方行政衙門辦理一案請予照辦奉批令准如所議辦理卽由各該部分行遵照單存此批等因奉此除分咨外相應抄呈咨行查照等因准此除分行各屬遵照外合行照抄原呈暨條例令行該處卽便知照可也此令附原呈暨條例等因奉此查此項辦法係與財政部清查期內地畝訴訟變通辦法成案事同一律原卷既經廢止察區仍存此例似於本年七月十九日申令不無抵觸可否

將察區地畝積案歸行政衙門辦理一案援案廢止之處案關適用法令本處未便擅專理合備文呈請都統咨由司法部轉呈

大總統鑒核

施行等情前來查察區歷年地畝積案經前任都統呈請批准歸地方行政衙門辦理在案該處長擬援案廢止有無窒礙合亟令仰該局妥議具覆以憑核辦此令又奉鈞令案據審判處呈稱案查本處爲察區歷年地畝積案歸地方行政衙門辦理可否援案廢止一案前於本年九月八日呈請咨部轉呈

大總統鑒核施行在案迄今未奉明令現在本處將受此項案件已有三四起之多准駁無從依據積案待理未便久懸爲此備文呈請都統咨催司法部呈請

大總統令以便遵行等情前來查

此案前據該處呈請到署當經令行該局核議在案迄今尙未具覆究竟此案廢止於墾務有無窒礙合亟令仰該局迅速妥議詳細呈覆以憑核辦此令等因先後奉此查察區墾務積弊甚深總會辦到差以後清理各

縣地畝積年案件其中糾葛難以罄述有地無照者有之有照無地者有之抑或持有甲地之照而耕種乙處之地甚至私放盜墾地戶既無執照復未註冊攘奪相尋爭端不息強者日肆侵吞良民受其蹂躪訟之公庭官府亦以無冊無照之故莫能判決是非切實保護一經構訟累年莫結遠方之民勢必以墾荒爲畏途是以民國元二三年及四年上半年察區放墾無幾收欸無多其病源胥坐於是總會辦稟承前任都統張擬訂清查餘荒夾荒考成條例並請將察區地畝積案歸行政衙門辦理一案曾於文內規定凡清查地畝積案應由各縣知事墾務局局長會同審理共負責成用期接洽而便速結業經內務財政農商部核議呈奉明令核准在案推行以來各縣局清理積年案件不下數百餘起收入亦日有起色而各公司繳欸領地者尙爭先恐後不無成效可觀若將此案廢止則民戶偶有爭訟卽須送交法庭審訊以各縣局直接辦理案件並由本總局

督促審辦然每結一案尙至案牘盈尺若盡由法庭間接審訊文牘往返實費時日且地畝案件欲求清結應以實地清丈驗照爲前提以本區地畝案之多是法庭必須時時派員清丈耗財費日欲求速結勢必不能矧案件未判結以前凡關於收欸放照一切手續均須停止訟案一日不得清結荒價一日不得收入民戶一日不得安業國課一日不得增加若奸商地痞復乘釁而起一案未結一案又生各縣局已收之欸勢將耗費於停止職務之中墾務前途何堪設想且查此案原呈雖援照財政部呈准各省查追官產專歸地方行政官廳辦理成案辦理究之邊區墾務與內地官產實有不同是以內務財政農商部原呈聲明將此案咨行沿邊各省一律參酌情形仿照辦理在案其用意自爲深遠本總局體察情形所有察區地畝積案歸行政衙門辦理一案現時實未便遽爾援案廢止一俟全區清丈告竣再由本總局呈請轉呈廢止其在未經廢止以前如因

地畝案件涉及刑事範圍者可由法庭依法辦理以重法權庶於墾政司法兩無妨礙所擬是否有當理合呈請都統鑒核訓示遵行謹呈

墾務總局指令沽源墾務局據呈紳董煽惑愚民聚眾抗丈破壞墾

政請鑒核文

五年十二月五日

呈悉查此案前據電呈業經本總局電令該知事局長所有黑河一汛准展至明春再行清丈等因在案據稱趙文彬等煽惑愚民聚眾抗丈實屬不法已極應卽查明爲首之人依法懲辦並將辦理情形具報備查既據逕呈仍候都統令遵可也此令

涼城墾務局呈報十八沙湖地戶劉玉珍等聚眾抗丈凌辱威脅脅請

令縣懲辦文

五年十二月七日

案據職局勘丈員陳福臨張秉寅呈稱竊員等於十一月初十日奉局諭前往十八沙湖前後甯安等村勘丈地畝遵卽起程是日卽抵該處十一

日飭差傳齊鄉約令其速傳地戶以便勘丈十二日各村地戶到者約四百餘人藉詞推諉不容勘丈員等以婉言再四開導伊等不指界限遂一闕而散員等無奈只得專函請示辦法奉局函開候王府代表朱博川來地商備辦法等語至十六日適有十八沙湖地戶劉玉珍劉萬元劉玉瑚孟獨戶溝孟定小子程有娃饅頭溝胡守中李珍李貴李七十四王連珍等鳴鐘聚衆來者約五六百餘人各持器械直赴員等寓所百般辱罵逼迫回涼有刻不容緩之勢員等恐遭不測卽星夜回局請示辦法等情旋據清室恂勤郡王近支四族宗室毓楓委任代表人朱博川稟稱爲聚衆抗丈凌辱威脅懇請咨縣差緝轉呈懲辦以重墾務而警霸產事緣於本月十五日隨同鈞局勘丈員赴前後甯安十八沙湖等村清丈呈報租地以憑放領詎料至十八沙湖地方有地痞劉玉珍程有娃劉萬元並饅頭溝之地痞李珍李貴王連珍李七十四胡守中等賄串孟獨戶溝之慣匪

孟定小子率領四五百人各執器械將委員住處圍繞聲言十八沙湖不准住宿百般辱詈非立即逐出村外不可不知去員如何安慰始行解圍復將代表派去之本府包衣達包祥楊則喜慕丁白銀切面等圍困聲稱所有去人盡行細綁打死包衣等好言賠罪幸未動手該地痞劉玉珍並言既恕去員人等性命必須立刻出村去人暨委員見伊勢衆洶洶不可勸遏乘機逃命奈劉玉珍均將本地住民勾串無論貧富各戶不得僱給駝脚似此強暴威脅凌辱逼勒殊屬慘無人道於十八日代表聞此驚信即請巡警二名前往排解救援而劉玉珍所聚四五百人尙未解散代表即與地痞劉玉珍等及所聚之多人當街演說據各戶聲稱我們爲大戶劉玉珍胡守中等所約逼立合同不敢不從緣劉玉珍使用慣匪孟定小子爲爪牙如有不從即着慣匪孟定小子約同匪夥搶燒家宅况劉玉珍之子前曾上過學堂衙署上下皆有聯絡各戶誰敢違拗代表伏思劉玉

珍等惡霸豪橫通匪抗公勢必無惡不作亦惟恐暗施毒手惟墾務之設清丈地畝原爲國家功令無論地屬何人均得清丈况此地爲清室恂勤郡王甯公之地收租已二百餘年呈報清丈實爲至公至當辦法又况十八沙湖等村前曾具有秋後清丈甘結備查在案而劉玉珍等竟敢串同匪類聚衆抗丈霸公不惟將去人等辱罵威逼幾欲網綁打死並將鈞局委員圍逼凌辱立逼出村目無法紀於斯爲極法網恢恢殊難原宥惟有星夜回縣具實稟陳除逕稟縣署外理合具稟懇請局長咨縣迅予差緝併乞據情轉呈總局令縣從重按法懲辦以重墾務俾豪強知警而產業由主也則感德無涯矣各等情據此除咨涼城縣究辦外理合備文呈請鑒核謹呈

墾務總局令張北墾務局據延秀稟請速行清丈各節仰該局查照

辦理文

五年十二月八日

案據延秀稟稱竊延秀有祖遺馬廠一處坐落在口外廂黃旗界內北至銀兔壕胡拉蘇腦東北至和親王府牧場東至鹽敖包蘇濟樑韓清壩東南至寒汗壩南至柳條壩黃土壩西至什巴爾臺紅果圖穆特敖包策勒額恭奇西北至西蘇托羅蓋等處地方業於四年六月遵章報墾奉前都統何批准分令張北縣局定期會領查勘並奉鈞局批示轉令張北墾務局按照呈報四至派員勘丈四年九月經張北墾務局局長帶領敝府人員勘明界址已由北界阿拉胡圖克二台子一帶開繩旋至年終停丈故自柳河灣以南什巴爾台等處大段荒地未經丈量今年因張北墾務局局長屢次更換亦未開繩查荒地一日不丈國課一日不能增加民戶一日不能繳價領照敝府應得之四釐私租優待欸項亦不得遵章具領今聞張北墾務局帶同勘丈員等在什巴爾台附近等處丈地擬請鈞局轉令張北墾務局局長就便派員將敝府報墾地畝按照勘定界址迅速丈

量以便上裕國課下安民業則感德無極矣等情除批示外合亟令仰該局查照辦理此令

墾務總局呈財政部據沽源縣

知事局長

會同呈稱紳董煽惑愚民聚

抗丈破壞墾政情形請鑒核令遵文

五年十二月八日

案據沽源墾務局局長曾紀馨知事兼墾務坐辦黃凌雲會銜呈稱竊職局派員勘丈黑卯二汛地畝滯礙情形暨坐辦親往該汛勸辦日期業經呈報在案查清丈黑卯兩汛地畝未經派員之先卽據紳士王文彬趙文彬等十人聯名遞稟呈請緩丈當以縣屬地畝清丈完竣所未丈者僅止黑卯兩汛批示不准一面請縣諭請該紳等到局會議至再至三諭請不到至派員後復生阻力始請業主代表榮耀並縣勸學所所長黑河汛三道川紳士趙文藻到局會議進行方法僉謂非到黑河汛徧招各主佃咸集會議當面解決不可當卽面請榮趙同赴汛上坐辦遂於本月十一日

帶領局中第一課課員向華起程十二日到喜峯砦據勘丈員白德峻前來報告卯正汎之水磨灣牌業經勸導開丈特來黑河汎會商紳士同時開辦等情據此當卽傳集主佃擬定十三日會議佃戶代表到汎者有趙文彬王登庸周昇李春濤李培鑫張世慶等七人業主代表榮耀等亦隨到會至趙文藻雖已到黑河並未蒞會坐辦遂當場演說多方開導告以國家任土作貢民間種地完糧實屬天經地義不得稍事隱匿且處此世界交通之際司農仰屋之時諸君阻撓清丈不過爲愛身家起見而眞能愛身家者必先愛國蓋身寄於家家寄於國無國何以爲家而察屬七區一切新政不能不着手進行不但墾務清丈不能不辦並奉都統令知清理田賦爲舉辦各項新政之基礎而黑卯兩汎之地畝俱係計地一段或一坡或一溝並無頃畝確數地戶完糧俱按前清紅冊某人分交幾兩幾錢某人分交幾分幾釐如一團亂絲毫無頭緒若不清丈明晰田賦何從

清理至此次丈地辦法所有原地完糧納租擬均仍舊貫其丈出餘地由業主押荒升科佃戶仍納私租不得加重於原租以期主佃兩面無盈無腦多方譬喻再三辯論各業主佃戶等當場認可一致贊成坐辦遂於十四日帶同勘丈員等前赴黑達子營十五日卽在該營開丈並於是日往卯正汛之水磨灣察看該處勘丈情形晚十點據趙文藻遣馬兵持函報告黑河已經起牌聚衆千餘人勢甚洶洶坐辦深望不確十六日早卽派卯正汛官及轅下排長前往偵探如果屬實令先爲開導坐辦一面仍赴井兒溝督同翟勘丈員開丈及至該溝約一時許卽有愚民千餘人由三道川等牌而來愈積愈多將坐辦及課員勘丈員等圍於紳士周昇家內要求停丈雖百方勸解終歸無效坐辦宣諭明日到喜峯砦請紳士等一同解決至汛署後該民等亦蜂擁而來將汛署圍至數重王文彬等竟敢迫脅坐辦出停丈手諭斯時愚民紛紛亂嚷野蠻情形罄竹難書甚至言

出不遜擬將官員等置於死地坐辦以該民等有人從中主持難以理喻遂下一仰候呈請暫緩清丈批示遵行手諭復經黑河汛官任志元卯正汛官劉登仕轅下排長范有璽及紳士趙文藻王文彬等出爲開導始行陸續解散乃散不多時仍復無故紛紛回署重行圍匝旋有白草村紳士李魁元到汛言紳士等聞縣長重行被圍特來勸導十八日清晨趙文彬等到署言各村人民尙未散盡紳士等保送縣長出汛語畢甫出卽據汛官任志元報稱署後右首田姓房後檐下縊死無名男子一名坐辦聞報當卽往驗該紳士李魁元等言此事縣長不必親往相驗卽交汛官辦理恐人民復行聚集難以行走坐辦以事關人命未可輕忽草率當卽前往勘驗填具傷單並取具房主田國堂及該地鄉約大戶口供隨命汛官及鄉約等將屍棺殮浮厝標招尸親領埋坐辦遂於十八日率同課員勘丈員等回局此坐辦親往該汛辦理清丈及該地人民聚衆抗丈之實在情形

也查此次煽惑愚民聚衆抗丈係趙文彬趙文藻兄弟爲之主而王文彬張世慶等爲之輔趙文藻本係局長及坐辦邀請赴汛幫同開導藉以減輕阻力不料文藻至該汛並不與會其行蹤詭秘已覺可疑迨既經解決之後指明勘丈之地到地開丈人民毫無阻撓突於十五日夜據趙文藻報告黑河汛人民起牌其暗中煽惑愚民反抗清丈毫無疑義且該家住三道川此次聚衆卽由三道川起點其爲趙文藻兄弟主謀倡首尤可概見况聚衆之後又係趙文藻首先報告夫趙本係局長等約赴會議勸導之人會議之時既不熱心到場聚衆之後反能首先報告其爲飾詞掩罪昭然若揭坐辦初次被圍經趙文藻王文彬出爲開導始行解散二次無故重圍經李魁元趙文彬張世慶等趕來開導又行解散該紳等既爲人民信仰能解散於已聚之後豈不能勸導於未聚之先乃一再圍困藉愚民之勢力用恐喝之手段以期達到局中不敢復丈該紳等地畝之目的

在該紳等事前暗中主持事後公然見好抑揚頓挫操縱自如自以爲得計不知其鬼蜮伎倆欲蓋彌彰至無名男子懸檐縊死在十八日清早發現坐辦示諭呈請緩丈在十七日下午一時如謂該民畏清丈而死則既有十七日停丈手諭實無縊死之必要且開丈之地在水磨灣及黑達子營死者所住地點查係三道川附近之村而三道川等村並未開丈實屬風馬牛不相及情形支離殊難索解且當坐辦親往勘驗之時紳士李魁元等面勸不必親往相驗可交汛官辦理該紳等居心譎詐不言而喻總之坐辦此次辦理清丈係先約該業主佃戶等到場面議所有應丈理由及丈出餘地辦法均經商議妥協雙方認可並非鹵莽從事亦未強迫人民該紳等煽惑愚民聚衆抗阻其中情形顯係該紳等餘地衆多希圖隱匿一經清丈不難水落石出故聚衆抗阻不遺餘力不然窮民地畝無多卽或清丈無關痛癢何至出死力以抵抗現在沽源縣屬民欠荒價幾有

四萬餘元之多均以黑卯兩汛地尙未丈未免畸輕畸重藉口不繳局中既不清丈餘地民人自然延欠荒價則本年之概算斷難照額清解而舊日之積欠亦屬無法催收况他處地畝一律丈竣僅止黑卯兩汛尙未開繩現屆冬令正宜及時清丈若再停而不辦轉瞬春融地播百穀又難開繩則該汛地畝永無丈清之日但現在該紳等既羣起阻抗勢成騎虎如能准其暫行停辦似毋庸議若必須照章清丈賡續進行斷非開導誥誠可以蕺事懇卽轉請都統派兵鎮壓其主謀之聚衆趙文彬趙文藻協謀抗阻之王文彬張世慶等應如何究辦職局未敢擅專除已死無名男子由縣傳集案內關係人等訊明另辦並逕呈都統外理合備文呈請鈞局查核示遵實爲公便等情前來除由總會辦指令呈悉查此案前據電呈業經本總局二十一號電令該知事局長所有黑河一汛准展至明春再行清丈等因在案據稱趙文彬等煽惑愚民聚衆抗丈實屬不法已極應

卽查明爲首之人依法懲辦並將辦理情形具報備查既據逕呈仍候都
統令遵可也此令印發外理合呈請總長鑒核備案謹呈

都署令據呈若將地畝積案歸行政衙門辦理於墾務窒碍甚多等

情仰候令知審判處查照文

五年十二月九日

呈悉仰候令行審判處查照可也此令

墾務總局指令沽源墾務局據呈紳士捏造被災阻擾墾政主謀煽

惑愚民聚衆抗丈野蠻刁狡亟應懲究除據情呈報都統並由本總局委

五年十二月十二日

呈悉查此案前據該局長坐辦呈報到局當經指令遵照在案惟紳士煽
惑愚民聚衆抗丈野蠻刁狡亟應懲究除據情呈報都統並由本總局委
任前赤城縣知事前往查辦暨令行該縣知事嚴拘爲首主謀之人到案
依法究辦以儆刁風而維墾政外所有該縣墾務仍仰該局長坐辦照常
進行慎勿以黑河一汛辦理棘手遽爾灰心致棄前功有妨墾務切切此

令

墾務總局令各縣墾務局查明所轄境內尙有未丈荒地若干限五

日內據實呈報文

五年十二月十二日

本總局現爲籌畫全區墾務起見實行調查荒地若干所有各屬尙未清丈之地應由各該局認真調查據實報告爲此通令各局限文到五日內務將所轄境內所有未丈荒地切實查明約計究有若干迅速呈報以憑核辦勿稍遲延切切此令

墾務總局指令兩翼牧場清丈行局據呈會同核辦兩翼與牛羊羣

地畝情形文

五年十二月十四日

呈悉據稱各節尙屬可行業經本總局據情轉呈都統鑒核令遵仰俟奉令再行轉令遵照可也此令

墾務總局呈都統據沽源縣

局知事

呈稱紳士捏造被災阻擾墾政主

謀煽惑應否究辦請鑒核令遵文 五年十二月十四日

案據沽源墾務局局長曾紀馨沽源縣知事兼墾務坐辦黃凌雲呈稱竊黑卯兩汛紳士趙文彬趙文藻等煽惑愚民聚眾抗丈情形業於廿電並本月二十一日專差先後呈報在案頃奉鈞局廿一電悉黑河汛被災地畝本區現准順直議會李議員電懇暫緩清丈等語所有黑河一汛應准展至明春再行清丈仰卽遵照等因奉此查黑河汛本年禾苗是否被災職局無案可稽當經咨請沽源縣署查復去後旋准咨開查縣屬秋禾前均勘明平均高窪地約計七分餘山地六分餘並未成災亦未據黑河汛民人赴縣呈報災案茲准咨查擬合備文咨覆等因准此又該汛民人前在職局稟請緩丈亦未以被災爲辭坐辦此次親往該汛汛下紳民羣起抗丈衆口囂囂均云以後永不准清丈並無一當面聲明該汛有被災情事者是被災一節顯係李議員捏造之言毫無疑義又查本月一日據職

局勘丈員白德竣翟春山在黑河函稱昨上一稟敘述民間傳聞停丈已見明文之事茲到黑河汛探悉此種風說出於省議員李文元之口該議員乃黑河富紳爲人望所歸故人民聽信其言有所恃而不恐等情據此職局當卽根據鈞令將察區墾務清丈並未停辦緣因繕具佈告送往該汛分途張貼無如該民人等聽李議員之言印象太深終歸無效查李議員爲地方代表對於殖邊要政應如何竭力奉行悉心開導方不至有愧厥職乃先則以停丈之說鼓惑於下繼則以被災之言蒙蔽於上議員尙且如此自卹以下可想而知此次黑汛人民聚衆阻抗其近因則由趙文彬趙文藻兄弟之主謀而其遠因寔由李議員之醞釀然現既奉鈞局電令黑河一汛暫行緩丈至明春再行辦理職等自應遵行但黑河卯正地本相連黑河藉詞被災請求緩丈則卯正亦可藉詞被災援例請求若以黑河有議員蒙蔽紳董煽惑愚民反抗則棄而不丈卯正無之則非丈不

可揆之情理似覺不平且卯正之水磨灣井兒溝業經開丈卯正人民並無異言乃黑河紳民越俎代謀出而干涉如再丈卯正黑河人民亦必故態復萌恐亦不易着手黑卯既不能丈他處更不待言而本年新舊民欠四萬餘元之荒價將大受其影響夫丈地收價爲本局之專職職權既不能行使則本局似無設立之必要且明春再行辦理一節尤屬不易本縣禾苗皆係春種秋收自冬至春並無出產本年秋收之後民有餘粟旣以被災之名緩丈則明春並無出產丈畢亦難收價况氣候融和正值農忙之際豈可反事清丈此節卽不足慮屆時再往清丈該汛紳民之阻抗必有更甚於今日者職等爲謀早日清理墾政收束局務免曠時日虛糜公款起見不揣冒昧據實直陳是否有當伏候鈞裁至此次主謀煽惑愚民聚衆抗丈之趙文彬趙文藻兄弟及協謀之王文彬張世慶等是否准其拘案究辦又該主謀之人逼死貧民欲買禍於辦理清丈人員藉興大獄

以求達到永不清丈伊等地畝之目的此事究應如何辦理理合備文呈請鑒核令遵實爲公便等情據此查此案前據該知事局長先後電呈該紳士等煽惑愚民聚衆抗丈等情到局當經本總局分別電復指令令將黑河被災地畝展緩清丈在案據呈前情則黑河被災不盡屬實該紳士等煽惑愚民聚衆抗丈舉動野蠻幾同化外若不懲究主謀誠恐影響所及墾務前途必多阻障可否准如該局長坐辦所請卽由該縣知事嚴拘爲首主謀之人到案依法究辦以儆刁風而維墾政之處除由本總局委任前赤城縣知事陳元前往查辦並令行該縣知事嚴拘主謀依法究辦外是否有當理合備文呈請都統鑒核指令祇遵謹呈

墾務總局呈都統據沽源縣公民李文元等一再籲請暫緩清丈令

該縣局遵照辦理文

五 年 十 二 月 十 四 日

案奉都統令開案據該縣公民李文元趙文彬李魁元周昇王登雲李守

瑞等呈稱緣敝縣立清丈墾務局曾經派員清丈地畝奈縣內所屬黑河卯正兩汛本年夏季亢旱秋收毫無兩汛人民實係哀鴻可憐若再加以清丈恐於民間多滋騷擾况敝縣地畝係八旗之地開墾多年均已在縣升課而於新墾者有別公民等桑梓攸關不忍坐視民困再四思維祇得稟請都統令知沽源縣轉咨縣立墾務局暫行緩丈實爲公便等情據此查所稱各節如係屬實應卽暫行緩丈以紓民困除批示外合亟令仰該總局查核辦理並將情形呈覆以憑核辦此令等因正擬辦間又奉都統令開案查前據沽源縣公民李文元等稟請暫緩清丈黑正兩汛地畝一案業經令行該總局查核辦理在案茲復據該民由省會電稱沽源清丈旗地議員等已呈請緩辦在案近日該縣又復勒令清丈拘傳十大戶差帶同往黑河卯正兩汛聲勢洶洶如臨大敵民間瘠苦萬狀似此逼迫恐必激成變故爲此籲懇都統電令該縣暫緩清丈以免騷擾不勝盼切

之至等情到署除電令沽源縣知事查照被災之地暫行緩丈其餘各地應遵章妥慎辦理並咨部備案外合再令仰該總局迅卽轉令該縣局遵照辦理並將辦理情形呈報核奪切切此令等因先後奉此查此案前據該縣知事局長電稱黑河汎紳士暗煽愚民聚眾阻抗清丈各情當經電令查照被災之地暫行展緩清丈在案奉令前因除再令行該縣局遵照辦理並將辦理情形呈覆以憑轉呈核奪外理合具文呈請都統鑒核備案謹呈

墾務總局令豐鎮墾務局據郝文指控各節仰該局迅卽派員復丈

並仰該知事切實查明秉公辦理具覆文

五年十二月十四日

案准興和道署函開案據豐鎮縣中和莊人郝文稟稱緣胞兄郝昇在本縣中和莊務農爲業因中和廣明兩莊董理梁國興鄉約薛鳳勒索民財非止一次民兄將該等私吞民錢之劣跡已控在本縣知事案下特因今

春三月間豐鎮墾務局派委錢郭二委員到中和廣明兩莊勘丈地畝被梁薛勒令由兩莊五百八十頃地畝捐項每畝捐錢六文聲稱供給丈地委員飲食不知委員出門自備公費不擾百姓且此等捐項無長官公布無地方章程况委員於舊歷三月十九日到莊四月初一日走自來至走一天工夫小村並無珍饈貴物如何消耗太甚伊等藉公捐錢毫無指實花項又私定兩莊屢年每畝攤錢或五十或三十或二十八文不等弱者不問照攤強者一問卽減又有兩莊屢年每畝捐錢五文統計爲欸甚鉅除每年兩莊公出鄉約錢一百二十千以外下餘並未宣告週知該等全入私囊若梁國興之薪金從縣署給領不在地畝內公出何以層層多捐狼狽爲奸莫此爲甚如委員丈地之時能與梁薛賄通者地雖長而不長不與該等賄通卽指引委員將民人之鹽城沙灘不堪耕種之地勒令抽丈押荒升科民人之地畝如此勘丈梁薛之地畝委員並未親到賄通

差人雖至該地指東畫西未下弓繩以多註少朦朧委員公事如此舞弄
焉能服衆該梁薛居公正之地位當然至公無私不欺良民克盡厥職不
意苦害我村莊侵蝕我父老上欺長官下害良民民脂民膏豈容私吞此
等奸民長在不驅良民無路超生以故民兄呈控本縣已蒙知事傳集證
人吳文清高昶樊紅子已經證明屢年種種弊竇該等無言對質但不比
追私歟又不革除懲辦勒令民兄具結完案所問真僞莫辨礙難具結卽
將民兄管押看守所不得已命民投轅上訴伸冤萬懇道尹恩准親提梁
國興薛鳳本莊證人吳文清高昶樊紅子及民兄郝昇一同提到開審比
追私囊以警不法令舉務總局另行派委員將梁薛之地畝重行勘丈
其奸自露令豐鎮縣飭中和廣明兩莊重推董理另派鄉約官定章程公
同公議嗣後永絕流弊維持地方公益則兩莊人民感恩萬代無既矣等
情據此事關舉務該民人所控各節是否屬實應請貴總局查核辦理實

叙公誼等因准此合亟令仰該局長迅派局員易薩圖前往該村秉公覆丈並查明郭錢委員有無朦朧舞弊以多註少情事據實呈覆並仰該知事按照指控各節切實查明秉公辦理具覆切切此令

墾該總局指令陶林墾務局據會呈辦理侯萬升因地控訴一案酌

擬辦法及訊明前委員譚業修並非受賄文

五年十二月十四日

既據會呈該局派員實地踏勘該地約計有一百數十頃之譜若卽判歸侯萬升無論張鳳翔不能甘服卽侯萬升亦實無力承領該知事局長擬以行政之處分判令該兩造均分此地等情事屬可行仰卽秉公判斷取具兩造甘結送由本總局轉呈備案並由該局派員切實勘丈務得該地確實數目毋稍含混至該前委員譚業修花費民戶之一百八十千之多應卽如數追回充公再行釋放仰卽遵照並轉咨該局長遵照此令

墾務總局令兩翼牧場清丈行局查照鎮國公毓璋來呈各節詳細

勘辦據實呈報文

五年十二月十五日

案奉都統令開案據奉恩鎮國公毓璋呈稱竊敝府所有沽源縣屬之黑山馬場早經報墾因與左右兩翼牧場地界毗連發生膠轕未能丈放茲據敝府三等護衛德麟報稱該兩翼樹立石椿逼近我都里格鄂博計侵越四十餘里等語查此項馬場界址於光緒三十三年曾蒙前任都統誠札委主事善徵左翼太僕寺總管策楞棟魯普前往分界除已清之處不計外五月二十六日將鄰界左翼太僕寺牧場分清又於八月初十日將正白旗及阿嘉胡圖克圖兩處鄰界牧場分清光緒三十四年十二月初三日經前都統誠札下獨石廳有案宣統三年四月間正鑲兩白旗亦具有此項界址指定清結都署有案及至民國元年敝府因黑山馬場尙有東南一隅與右翼界址未清呈請前都統何飭下分劃旋由左翼總管策楞棟魯普右翼總管薩木端隆魯普會同委員圖麟左翼駙馬羣翼長並

正鑲兩白旗人員等以及敝府三等護衛德麟會商該總管等議定聯銜呈稱於中華民國元年八月初一日商妥前未分清之界現將該處都爾格山分爲三處交界由都爾格山向西至他呢圖瑪呢圖二十里由瑪呢圖庫圖勒烏蘇經過他布鄂博中間直至佈國依山五十里將兩翼與毓公府糾葛界址分清等情嗣於十二日蒙前都統何依據前情令行獨石廳劉會同前往都爾格山指明前商界綫立墩挖壕等因各在案敝府三等護衛德麟以該總管等指定之地點核與黑山場圖尙有虧損未敢擅專遂回京聲報敝府亦以馬場虧損地多碍難認可延至於今詎該總管薩木端隆魯普利令智昏假陸軍部名義朦混栽樁至將該總管已經承認之地點一概反汗任意侵越計四十餘里之遙公理安在合無懇請都統俯賜允准飭下調查從前所有案卷秉公劃分以清糾葛而維私產實爲公便等情到署合行令仰該總局轉令兩翼牧場清丈行局查照來呈

各節詳細勘辦毋任侵越致滋糾紛並將勘辦情形呈報備核此令等因奉此合亟令仰該局查照來呈各節詳細勘辦毋任侵越致滋糾紛並將勘辦情形據實呈覆以便轉呈切切此令

豐鎮縣知事局長會呈會審判結郝昇上訴梁國興藉委苛斂一案

呈請核銷文

五 年 十 二 月 十 五 日

竊知事於中華民國五年七月二日奉鈞局令開案准都統署審判處函開職縣民人郝昇上訴梁國興藉委苛斂一案令卽會同墾務局查照文內事理切實查辦具覆以憑轉咨並抄發訴狀庭供等因奉此局長同日奉令前因隨卽會商知事飭傳兩造集質去後嗣因郝昇潛匿張口延不到案知事局長會呈鈞局轉咨審判處請俟郝昇赴處上訴押發下縣質訊並咨萬全縣查傳在案旋奉審判處令以准鈞局轉咨前因除宣示郝昇赴縣投審外令於此案完結後將辦理情形呈處備核等因知事又經

催令查傳而郝昇仍行規避茲准萬全縣將郝昇傳解到豐知事隨即傳集被告人梁國興鄉約薛鳳地戶首領吳文清樊混仔高昌等到案會同局長開庭審訊緣郝昇領有正黃旗二蘇木中和莊荒地三頃本年春間局長派員赴該蘇木清丈當因該處並無旅店由鄉約薛鳳借備梁國興閒屋爲辦公之所嗣因勘丈員郭文凱錢文奎於郝昇原領三頃荒地內丈出餘荒三十畝令行照交押荒郝昇因與梁國興有借錢嫌隙疑係梁國興從中播弄又因當時衆地戶隨同勘丈相聚十餘日之久所需米麵人工皆由鄉約薛鳳擔負事後鄉約按照向章按畝派錢六文償還食用之需郝昇誤爲梁國興運動委員架飾上訴因慮事關公衆以個人名義起訴恐干駁飭捏稱地戶代表茲經知事局長訊據鄉約薛鳳地戶首領吳文清等僉稱按畝攤派制錢六文係丈地時各地戶聚會食用並雇人照料及送信找人工食之需委員等俱係自備食用並未斂用民錢伊等

地畝並無以多丈少及以少丈多情事亦未央令郝昇代表上訴等語質之郝昇初猶狡展及三面環質伊亦俯首無詞詰以民國成立以來豐縣知事雖已更易十二人然並無梁國興權代縣篆之事郝昇亦知措詞失當一再認過查此案郝昇上訴各節或係出於懷疑或實逞刁架節本應予以坐誣姑念鄉愚無知業已知過應請從寬免究其丈出荒地三十畝斷令呈繳荒價給照執業雙方允服取結完案所有會審判結郝昇上訴梁國興藉委苛斂緣由理合具文呈請鈞鑒核銷除呈審判處外謹呈

墾務總局令豐鎮縣

知事局長

迅將王士金稟控地畝糾葛案件切實查

明秉公辦結具覆文

五年十二月十八日

案奉都統發交豐鎮縣民人王士金稟一件據稱民於民國二年六月間憑中蒙民桃達賴民人李和等與王銀鐸租到正紅旗十二佐領牧場荒地一段相連隨缺地十二頃六十畝共作押租銀一千四百五十兩言明

每年交其地租雜糧二十石有該佐孔督納斯圖專達土蒙補音並兵丁等與民所立租約爲憑立約之後民與王銀鐸照數將銀交清均有過付爲證不料孔督等騙銀到手見民等赴地開墾乃使章蓋出爲攔阻以致民等又賄給章蓋多普沁銀一百四十餘兩以求種地孰料伊等串謀刁騙得銀之後復將此地出賣與趙得功承種致使民等兩家互爭二年未從開墾延至民國四年設立墾務局民見布告章程地歸國家放墾無論旗羣牧廠凡有餘荒夾荒者准民戶投局報領不許蒙員等私相授受民一見此示始知租地無益遂稟明墾務局照章承領此地蒙墾務局於去年九月間派員往勘時該佐蒙員等已自行拉丈據稱有荒八十頃整餘皆指爲缺地是時民面稟委員言其所指缺地必有隱匿餘荒之弊詎該蒙員等誠恐丈其缺地乃與委員出具甘結堅稱缺地無餘當經委員等依該佐所報之數與民分地二十五頃與趙得功分地三十八頃准該佐

回贖地十七頃先將界址分清令民等繳清荒價然後丈地民遵卽已將荒價交清不想丈量之時僅有地十九頃而趙得功亦不足原領之數惟該佐回贖之地尙餘兩頃因而民復稟請墾務局丈其缺地又丈出餘地四十多頃以此而論則此地應當歸民承領不然與民追償租銀始爲至公豈意委員等云地係國家之地未能代蒙員還債令民自索等語民思蒙員等既無地可租自當還民租銀決不能使民銀地兩空詎該蒙員等以煽騙係其常技民向討要數次絕不爲意民竊思伊等一地兩騙民財已屬非理今又將回贖之地十七頃亦轉售別人以漁重利並不思還民租銀尤屬貪惡之至刻下民與王銀鐸因爭要此地在豐涉訟數月未蒙解決更兼墾務局將民荒價已收地未交足迄今一年之久亦不管理民念縣署難制蒙員無奈稟懇都統憫念農艱或銀或地責令歸償民頂鴻恩無既矣等情復據民人稟同前情查據稱該孔督專達章蓋等串謀刁

騙將該佐地畝轉賣漁利迨該局派員勘丈復隱匿餘荒該民人等在該縣涉訟數月未予判決該局將該民人等荒價已收地未交足亦不過問等情如果屬實殊屬不合除批示外合亟令仰該縣知事會同該墾務局局長迅將此案切實查明秉公辦結具覆以憑轉呈切切勿延此令

墾務總局呈都統遵令派員按照王文彬等呈稱各節切實調查具

覆請備案文

五年十二月二十一日

案奉鈞令開案據沽源縣公民王文彬等呈稱竊因旗人榮耀榮貴勞大財厚包藏禍心遂將黑河旗人暗行勾串賄買官吏邀准墾務局擬定章程十餘條盡屬肥己殃民條件張布民間試思榮某不過一人而已竟敢私行擅權罔上欺下顯係有干例禁非敢飾言實有可憑證據紳等屢次稟請縣長懇求丈地緩辦不意縣長利令智昏不恤民隱藉口有都統公事訓令清丈遂於陰歷十月中旬率領墾務局兵勇數十人車馬數十輛

一齊到黑卯汎地札飭鄉保安排寬大公館宰豬殺羊擾亂不堪未丈地以前先驗契據契約驗罷將契扣留概不發給過割稅契更換旗人姓名不與地戶相干終必價地兩空小民見事惶恐束手無策因集黑河汎署跪求哀懇暫緩清丈不料縣長飭派官差聲言開鎗威嚇內有周榮禎素係膽小一見驚惶投脫無路以致自縊身死情殊堪憐俟後縣長將鄉約並被累房主收押在案且令伊供稱被人勒死等情似此昏憤民不堪命爲此呈請都統恩准作主據實澈究以救生靈等情據此除批示外合亟令仰該局遴派委員按照呈稱各節確實調查周榮禎自縊身死是否因清丈地畝所致將情形詳細具報以憑核辦此令等因奉此除由本總局加委前赤城縣知事陳元按照呈稱各節確實調查詳細具報一俟呈報到局卽行轉呈外理合先將遵令派員情形呈請都統鑒核備案謹呈

墾務總局指令豐鎮墾務局爲丈出王義霸佔餘地暨辦理此案要

點文 五年十二月二十三日

呈悉查此案判結幾年之久何以至今尚未辦理清楚仰卽迅速咨行該縣知事尅日傳齊兩造人證由該局長會同嚴行審訊秉公辦結具覆不准再延圖存此令

墾務總局呈都統據兩翼牧場清丈行局呈稱訊判張相臣等地畝

轉轄業經具結完案請鑒核備案文(甘結附)六年一月四日

案據兩翼牧場清丈行局局長林茂亭呈稱案奉鈞局訓令內開案據訴訟代理人傅化南稟稱竊民前於民國二年三月間在和親王府興隆地局以陸軍第八師十六旅旅長張相臣名義承領荒地二十頃以十五旅旅長王汝勤名義承領荒地二十頃共四十頃坐落沽源縣六面井地方當時共交押荒價銀大洋八百元面交該局經理商人孫月舫收清領取該局執照爲憑遂招沽源縣屬文鐵爐村地戶于連于福承種二十頃招

高家高山村地戶張慶榮張致榮承種二十頃均於是年四月二十八日將地畝分交伊等開墾言明每年按照二八成分糧三年後按照三七成分糧民國三年該地戶等各交糧二十石存有皮房李見喜鋼房義興永收存糧條爲證民國四年興隆地局奉令撤銷地歸官賣當卽遵照兩翼牧場新章將和親王府地局執照呈驗繳銷換領陸軍部收據靜候清丈再行交足地價換領部照不料該地戶于連張慶榮等見地已成熟陡起貪念甘心違法圖謀霸地不但抗糧不交且擅自捏稱地已有主賄賂通行暗施運動手段意圖以個人名義冒領部照將承種他人地畝霸爲自己產業似此種不法行爲若歸刑事範圍亦難逃詐欺侵佔二罪無論霸地陰謀罪有應得卽二年抗糧不交亦應認賠償之責民係奉原業主派委承領此項地畝代理人今既有轆轤自可提起訴訟冀求伸張國法保護私權惟該地戶等土著多年聲勢甚大若在該縣起訴勢必纏訟不休

且恐生意外之變更查審判章程訴訟物價額在二百元以上者歸地方廳權限此項地畝價額已達二千三四百元以上當然應歸上級法廳審理是以具稟呈控請求提傳該地戶于連于福張慶榮張致榮及保證人孫月舫李見喜義興永等到案質對以明權利而懲刁頑理合具稟呈懇伏請總辦恩准提訊公斷施行實爲公便等情據此除由本總局批示稟悉查此案係由本總局呈請都統函致王汝勤等遣派代訴人攜帶部照等件徑赴兩翼牧場清丈行局聽候質訊並經王汝勤等呈覆都統遣派抱告人傅化南攜帶地照糧條聽候轉令兩翼行局傳集質訊各在案繼據該局呈稱張致榮等在該局候訊已久仰該訴訟代理人逕赴該局聽候傳訊俟該局審訊具覆再行核辦可也此批掛發外合亟令仰該局知照一俟該代理人到局卽行傳集質訊具覆此令等因奉此自應秉公判斷以清膠轕茲該代訴人傅化南於本月一日投案候訊次日卽將地戶

于福于連張繼榮張致榮並證人李見喜恒順永等一律傳集到案對質據代訴人傅化南供稱張王兩旅長於民國二年領和親王府興隆地局六面井荒地四十頃曾交押荒銀八百元並領有該局執照遂招于福于連張繼榮張致榮四人承種嗣經陸軍兩翼牧場清丈處換發收據民國三年前往討分收成並收有李見喜恒順永糧條爲證乃該地戶等不但抗糧不交反稱地爲己有請審明公斷復訊據地戶于福于連張繼榮張致榮供稱民等於宣統三年買和親王府興隆地局地十大頃又二十頃曾交荒價二三百元有該局發給執照可憑又經陸軍兩翼牧場清丈處換發收據傅老爺上年帶兵前往民處云此地已經旅長買下只可與汝等分收民等曾花過錢買地故不承認復訊據證人恒順永李見喜同稱彼兩方當時爭執不能下台故民等從中暫爲存糧解和各等供據此查兩造各執一詞皆有理由均難憑信卽檢查前奉鈞局發下前清丈處呈

交卷宗驗照收據存根民國四年八月初四日發給王汝勤張相臣八十八八十九等號收據一張計地十頃初十日發給張繼榮張致榮畢進財王泰山第三十八號收據一張計地二十頃均有和親王府私局地照經前清丈處驗訖換發收據再查該場場長苑尙品所呈地畝一覽表僅列有于福于連上則地十五頃八十畝張繼榮張致榮畢進財王泰山上則地二十九頃五十五畝共地四十五頃三十五畝此地卽王汝勤張相臣所爭四十頃之地也表內並未列有王汝勤張相臣承領地畝該兩造之爭執一誤於興隆地局一地出售數家再誤於前清丈處查驗不慎無論地之四至在何處見有興隆地局之照卽換發收據故致多爭訟但案關輻輳非持平判斷實不足以息訟端當經局長判斷宣布判詞該兩造爭執此地查均係在和親王府興隆地局所領該局既係私立僞局奉令驅逐凡在該局承領地畝應皆作爲取銷另放惟查兩造均實已費有銀兩

且經前清丈處換給收據本局長從公判斷張王兩旅長既花過洋八百元著斷給地三十頃于張等姓民戶費過洋二三百元斷給地十五頃三十五畝以前出具分糧單各家二十石均斷給其半由傅化南向證人李見喜恒順永支取仰各具結完案以俟呈報此判代訴人傅化南暨民戶張繼榮張致榮于福于連均欣然認可當堂取具兩造甘結各一紙卽行完案除令各該戶迅速照章繳價外所有判決地畝輻輳緣由理合具文檢同甘結二紙呈請鑒核備案施行再查被告張繼榮證人恒順永而傅化南原稟內誤寫張慶榮義興永合併聲明附呈甘結二紙等情前來查此案既據該局長從公判斷兩造均已認可情願具結完案自應准予備案除由本總局函致張王兩旅長查照并指令該局知照外理合呈請都統鑒核備案謹呈

附甘結

代訴人傅化南今於與甘結事因地戶于連于福張致榮張繼榮地畝
鞫鞫一案蒙局判斷此地歸張王兩旅長領地三十頃其餘十五頃三
十五畝准地戶于連于福張致榮張繼榮分領以前應分收糧四十石
斷給一半均遵斷具結所具墨結是實

附甘結

民人于福于連張致榮張繼榮今於與甘結事民等因與張王兩旅長
地畝鞫鞫一案蒙局判斷此地歸張王兩旅長領三十頃其餘十五頃
三十五畝准民等分領並以前討分收斷給二十石民等一律遵斷具
結所具墨結是實

舉務總局指令陶林縣知事據呈覆請發部照升科之地已由舉務
局長清丈已畢頃數尙屬相符請鑒核文

六年一月四日

據呈此次清丈升科之地一百二十二頃九十六畝業由該縣舉務局按

照原冊清丈較之原領地畝並原發執照尙屬相符間有丈出餘荒之戶已由該局填發通知書另案辦理等情事屬可行所有應發部照仰卽咨會該縣墾務局照章核發可也至未徵起荒價之地及丈出餘荒地價仰卽嚴緊催繳無任久延切切此令

墾務總局令商都招墾設治局據正黃旗總管呈請劃分八台界址

仰局查照文

六年一月四日

案據正黃旗總管巴揚孟克呈稱據參領兼勳舊佐領色爾鄂特副參領兼雲騎尉額勒賀保呈稱竊查本旗游牧所設八台原由本旗游牧地內撥給各軍台照章撥給牧地寬長各十里以便供應差使茲八台官員領催并兵等由其原撥牧地私自越佔許多伏乞轉呈劃分界址施行等情據此理合呈報鈞局懇撥給本旗各佐游牧毗連之八台界址劃分外所有餘荒准由本旗承領開放押荒以免糾葛等情據此合亟令仰該局查

照派員會同劃分以清界址至所有餘荒可否由該旗承領開放押荒之處如係蒙人照章備價請領應卽照准並由該局查核具覆此令

墾務總局呈都統據涼城墾務局呈覆查明克勤郡王晏森牧廠情

形請鑒核轉咨文

六年一月四日

案據涼城墾務局局長高承琳知事兼坐辦王丙彝呈稱案奉鈞局令開案奉都統訓令准內務部咨開案據多羅克勤郡王晏森稟稱敝府有祖遺莊地牧廠一項坐落察哈爾涼城縣所屬之碌袖坪韭菜溝等處共計熟地六百三十餘頃此外並有荒地二百五六十里敝府應得私租向歸官家代辦究無實惠可沾欲清理而不能實放棄之可惜改建民國以來正在籌思辦法適見政府公報內載售放莊地規則自應遵照辦理以符部章惟查敝府莊地與他處不同口外地瘠民貧卽照部定最低之價每畝二元恐亦無人認領現今調查按畝計算熟地每頃價值百元以上荒

地每頃不過一二十元之譜較之內地情形既異辦法自應稍事變通將來售放屆時稟請墾務局派員丈量以泯爭端先儘原佃戶承領如該佃戶無力備價再行另放別人自民人承領之後准其認爲己產從此免納私租似此辦法在敝府可以少獲餘資在佃戶可以永無後累卽於所收地價內提出二成報効公家由敝府委託前清調署甯遠同知劉景榮經理其事懇請大部轉行察哈爾都統分令墾務局興和道尹涼城縣知事分示曉諭隨時保護以利進行晏森爲清理私產報効公家起見理合會陳地圖伏乞鑒核施行實爲德便等情到部據此本部查察哈爾地方現在尙未訂定旗產售放專章既據該郡王稟稱各節應由貴都統按照原稟所陳畝數查明是否相符有無窒碍情形先行見覆以憑核辦相應檢同原送地圖四張咨行查照辦理可也附送地圖四張等因准此合亟檢同地圖二張令發該總局仰卽按照咨稟各節詳細查明暨有無窒碍情

形據實呈復以憑核咨切速此令等因奉此合亟照繪地圖二紙令發該縣墾務局會同該縣知事迅卽查明文內事理據實呈復以憑轉呈此令附地圖二張等因奉此查克勤郡王晏森稟內所稱碌砣坪葦菜溝等處地畝共計熟地六百三十餘頃核與涼城縣署糧冊數目相符惟查所稱荒地二百五六十里此地全係鑲紅旗總管所轄業經前清墾務大臣貽穀悉數放給各民戶承領在案該王府似不宜再請另放至於售放熟地誠恐各民戶以所納租糧向無短欠爲辭一經丈量必有聚衆抗執不服情事此外並無別項窒碍等情據此理合呈請都統鑒核轉咨指令祇遵謹呈

墾務總局令商都招墾設治局據呈覆重行查勘花賀秀等處荒地

暨辦理情形文

六年一月四日

據呈重行查勘陳楠承領花賀秀二百八十八號至二百九十號荒地共

計五十二頃二十畝均屬下則應除蕨草及砂石樑九頃又原除一頃淨地四十三頃一十畝復勘得羊羣霍雅爾托羅蓋四百十六號至四百二十六號荒地共計四十三頃九十五畝三分其中四百二十號係中則五頃其餘均係下則應除砂石十一頃三十八畝八分又原除四頃五十畝淨地三十二頃五十六畝五分並據該局長調查員等聲稱從前原丈各員所定等則過高砂石亦未除淨現既切實查明自應核減以示體恤等情既據查明屬實應准如擬備案此令

墾務總局指令興和墾務局據呈變通發給正紅旗總管通知書等

情姑准備案文

六年一月六日

據呈變通發給正紅旗通知書等情姑准備案惟現值勘丈時期仍仰該局咨商正黃旗總管儘先訂期會同丈量如丈出餘夾荒地卽令照章按畝補繳荒價發照管業以免積案懸擱是爲至要此令

墾務總局令商都招墾設治局呈覆遵令派員勘丈北驢圖山地並

繪具圖說請鑒核文

六年一月六日

據呈已悉查此案前奉都署令據商都牧羣總管普爾佈札普呈請禁止開放該羣荒廠以便該羣衆民仍舊游牧等情令知查明池登洲等承領荒地與該羣牧畜有無窒礙卽日呈復核辦等因到局當經令行該局查覆在案據呈由該三腦營蒙人帶同勘丈員書勘丈北驢圖山坡荒地一段計共淨上中下則荒地六百三十頃等情姑准備案惟丈放北驢圖山荒地究與該羣牧畜有無窒礙此爲最要問題未據詳晰呈覆但稱北驢圖山荒地丈出淨地六百餘頃且該地戶池登洲等是否將該地全行領墾抑或承領一二段亦未聲明與前令多未體會卽以該地戶繳價而論前後所繳荒銀僅共二千餘元核與照章應繳各款所欠亦復甚鉅仍仰該局遵照前令詳切查明呈復無再含混並將擬辦情形一併具覆候核

圖存此令

墾務總局指令陶林墾務局呈水泉甲地畝無餘應請免繳地價以

昭公允請鑒核文 六年一月六日

據呈已悉應由該局長親赴該村調驗該民戶原有管業印文執據詳核四至并核驗四鄰部照界址重行踏勘勿任朦混再行呈候核奪此令

委員陳元函調查黑河丈地情形暨辦理方法文 六年一月六日

竊委員奉令前赴沽源縣等候多日人證均抗傳不到無憑查辦會商知事局長亦無他法可想委員遂於十四日起身曾將日期呈明在案十六日到汛當將人民服從情形馳稟大略連日復邀李議員文元並眾紳民等曉以大義并宣布墾務定章國家法律不能違背該民人等供稱此次遠因緣黃知事前王局長以佐領榮貴等辦法十條出示曉諭民戶出價旗人領照民人實難負擔近因則既不遵照總局批示明白宣示又不將

旗產民產兩種辦法體察情形事前決定曉示大眾冒然派委至汎勘丈愚民疑慮不顧法紀聚衆懇求緩丈等語經委員詳陳利害人民當爲國家盡義務議員更當代表人民服從國家命令卽有下情必須上達儘可稟請縣長局長轉呈都統總辦邀恩緩丈何得聚集多人敢於抗丈致干犯法紀委員奉令查辦此案如該民等自知錯誤自當回呈總辦俯恤民艱從寬辦理否則刁風萬不容長卽遵令嚴拘爲首主謀之人依律懲辦等情當由公民等出具情願呈請清丈之稟並永遠不敢再抗違公令甘結一紙并抄呈黃知事前王局長告示兩張委員復查該民人等所供遠因近因兩層并有告示爲憑均尙近情現經委員反復開導已知悔悟出具甘結呈請清丈應請俯准從寬免究所有周榮禎身死一節查與清丈無涉已由該公民等自行料理王文彬控佐領榮貴等一案亦由王文彬呈遞息呈消案惟查黑卯兩汎地畝名目繁多手續極爲複雜若不詳查

實在情形妥定辦法將來派委清丈之時難免不再生交涉有礙清丈前途現據該公民等呈遞說明書雖係僅顧個人權利之條亦有實在情形不無可採之處當由委員帶至縣城與黃知事會局長秉公妥擬辦法再公民等公呈甘結一件會呈總辦鑒核遵行再委員已將兩汛抗丈事實辦理清楚明日卽行起身回縣所有辦理各情先行馳稟呈請總辦鑒核並請鈞安

墾務總局令沽源縣

知事局長

查明已發黑卯兩汛旗戶部照若干並收

地價若干詳細具覆文

六年一月六日

查該縣黑卯兩汛聚聚抗丈一案前據該縣局呈報到局當經轉呈都統并令行該縣知事嚴拘主謀依法懲治并委員查辦各在案現風聞黑卯兩汛起事原因係因該縣知事誤將黑卯兩汛地畝給與旗戶承領而原墾民戶一律向隅致起抗丈風潮如果屬實殊爲荒謬查此案於上年五

月間經該知事局長呈擬清丈黑卯兩汛地畝辦法到局當經本總局明晰指令在案查前令一則曰發照應交原墾民戶收執以符定章該佐領等不得從中阻撓再則曰代交地價一節易滋流弊且與定章不符應再行斟酌妥擬辦法呈候核奪迨上年十一月該縣擬訂旗產民產兩項辦法並呈明均屬可行復經本總局批令再行體察情形各在案是本總局對於辦理此案實無時不嚴守原墾原領定章一再指示不爲不詳該知事局長自應懍遵以杜流弊今如所聞屬實是該縣知事局長并不查照原案辦理擅改定章以致庶民失業演成抗丈風潮辦事鹵莽該知事局長實難辭咎究竟是否屬實未據該縣局呈報無憑查核仰該局遵照查明據實詳細呈覆以憑核辦毋稍含混除分令外合亟令遵切切此令

墾務總局令涼城縣

知事局長

據鑲紅旗總管呈請將學堂餘地撥給該

旗仰該縣局查明核擬具覆並將潘玉龍等私賣官地一案併案

辦理具覆文

六年一月八日

案據鑲紅旗總管孟都巴雅爾呈稱轉據本旗頭等子爵魯孟克各世職等報稱查前經督辦墾務大臣貽穀開放右翼四旗牧地收納押荒給予各官兵等隨缺田地惟各世職每旗給予銀一千兩發交附近廳署生息每年給予息銀等因具奏給予本旗世職各員一千兩於光緒三十一年發交涼城縣假稱縣署故員丁英年使用節經呈報請領迄今十有餘年尙未給發去年設立清丈局復丈因本旗頭佐地內撥給涼城縣學堂地五十頃內餘有百餘頃是以具呈懇祈撥給當經本旗請由此項餘地內撥給各世職等情呈報上署恩施當蒙令行涼城縣並清丈局會同勘丈有無餘地具報核辦等因准涼城縣咨請派員定日會同勘丈等因前來當經本旗派委公中佐領兼雲騎尉特固斯阿木固朗恩騎尉阿木爾布彥持文前往據學堂校長云三五日去等語推託等候半月因而住店費

用甚夥是以返回復在頭佐撥給學堂地方等候二十餘日亦未來到本各世職等無法約計該地長有八九里寬有六七里此內實有餘地百餘頃理合據情呈報懇請由旗辦給公文復差恩騎尉阿木爾布彥往催彼時仍是推託等候十日據局聲稱學堂校長等不去我們兩方難以勘丈等語是以返回理合復行呈報懇祈轉呈上署恩施特派專員詳細丈量請由餘地內撥給本世職等以資生活等情前來查此項本利銀兩乃該縣承值書吏假稱該縣故員丁英年使用推諉十有餘年尙未發給又查前由本旗頭佐地撥給涼城縣學堂地五十頃內既然實有餘地百餘頃呈請撥給當經遵奉上署飭令辦文派員兩次前往而學堂校長等仍是推諉顯係照前佔據並不退出理合呈報懇務總局俯賜特派專員詳細丈量除原撥給涼城縣學堂五十頃地外所有多佔糾葛餘地懇請恩施分給作爲本旗新立學校並本旗各世職及旗下公用田產外或將發交

涼城縣生息一千兩連本帶利一並迫出給予各世職等以濟生活並照鈔都統令文涼城縣呈文及審理員代辦移付原案附後一併呈報懇祈辦給施行等情據此除由本總局指令呈悉查此案於民國四年十月奉都統署令開據鑲紅旗總管呈稱從前撥給涼城縣學堂地五十大頃現有一百餘大頃懇祈撥給本世襲官等作為隨缺地若再有餘請撥給本旗設立學堂作為公費等情令行涼城縣查明具覆核辦俟該縣查覆再行令知辦理在案該縣是否查覆無案可稽茲據呈稱該旗派員兩次前往該學堂校長再三推諉等情仰候本總局令行該縣知事會同墾務局局長將此案原委詳細查明秉公核擬具覆以憑核辦至前據該縣知事呈稱該旗十一佐官兵將學堂官地私賣於民人潘玉龍公和堂作價二百兩一案當經本總局稟承都統令行該總管查明呈覆在案乃事隔一年之久未據查覆到局實屬不合除令該縣知事局長併案辦理外仰該

總管迅將私賣官地之官兵姓名查明呈報並將價銀二百兩按數追出送交涼城墾務局另款存儲一面呈報本總局備查仰卽遵照此令印發外合亟令仰該知事會同該墾務局局長將此案原委詳細查明該學堂餘地撥給該旗世職有無窒碍遵照定章秉公核擬具覆以憑核辦至該旗十一佐官兵將學堂官地賣於民人潘玉龍公和堂作價二百兩一案案關私買私賣迭經都統及本總局奉令嚴禁令行該縣知事遵照辦理在案仰該知事會同該墾務局局長併案辦理具覆勿延此令

墾務總局呈都統風聞沽源黑卯抗丈風潮係因誤將地畝給與旗

戶承領由局令查明呈復以憑核辦文

六年一月八日

窮查沽源縣黑卯兩汛聚衆抗丈一案前據該縣局呈報到局當經轉呈都統並令行該縣知事嚴拘主謀依法懲治並委員前往查辦各在案現風聞黑卯兩汛原因係因該縣知事誤將黑卯兩汛地畝給與旗戶承領

而原墾民戶一律向隅抗丈風潮是以發生如果屬實殊爲不合查此案於上年五月間經該縣知事局長呈擬清丈黑卯兩汛地畝辦法到局當經本總局明晰批示在案查原批一則曰發照應交原墾民戶收執以符定章該佐領等不得從中阻撓再則曰代交地價一節易滋流弊且與定章不符應再行斟酌妥擬辦法呈候核奪迨上年十一月該縣擬訂旗產民產兩項辦法並呈明均屬可行復經本總局指令再行體察情形各在案是本總局對於辦理此案實無時不嚴守原墾原領定章該知事局長自應懷遵以杜流弊今如所聞屬實則是該知事局長並不查照原案辦理擅改定章以致庶民失業演成抗丈風潮辦事鹵莽該知事局長實難辭咎但所聞究竟是否屬實未據該縣局呈報無憑查核除令行該知事局長委員等切實查明詳細具覆以憑核辦外理合具文呈請都統鑒核備案謹呈

墾務總局指令兩翼牧場清丈行局據該局長等會呈核辦牛羊羣
交涉地界一案已奉都統指令如呈辦理仰卽遵照轉咨該總管

文 六年一月九日

案查牛羊羣與兩翼交涉地界一案前據該局長等會同呈稱牛羊羣總
管願將本羣開墾之地應得四釐私租銀歷年按照居住左翼之地數撥
給左翼以省遷移之費又蘇濟地界爲牛羊羣緊要牧地不妨將該處退
歸牛羊羣將右翼應得恤蒙銀撥給牛羊羣三百元並據稱由該局長兩
方調停各總管均無異議等情當經轉呈都統鑒核令遵並指令該局知
照在案茲奉都署指令如呈辦理此令等因奉此合亟令仰該局遵照並
轉咨各該總管遵照此令

墾務總局令陶林墾務局將劉雅勤與八台官兵地畝糾葛及王元
等承領荒地各案會同商都招墾設治局局長擬辦具復早結懸

案文

六年一月九日

案據商都招舉設治局呈稱奉鈞局令開據陶林縣民人王元賈致化等稟爲備欸呈繳祇候驗收以便領墾事緣民自去年十二月間稟懇承領八台英圖花鄂包地方荒地五十頃今正蒙恩批准二月復蒙令陶林墾務局轉令清丈委員實地丈量各在案勿瀆竊民謀生無術食力邊外既乏專長生計維艱僅農業中差堪自食然地畝旣蒙勘丈地價自應遵繳庶公足以符定章私始克歸民產是以民一面將所領荒地頃數應繳欸項盡力籌足親携來口一面呈請總辦恩賞驗收實爲感戴至民繳欸後應有之執照或各項證據仍請曲體賞給則民結草啣恩永無涯涘等情前來除批稟悉查此案前據該民等具稟到局業經批示逕赴陶林墾務局稟請核辦並令行該局遵章辦理在案茲閱來呈據稱前所請領之地未據該局給放究竟其中有無轆轤不清及碍難准放情事未據該局呈

復前來本總局難以懸揣現在商都招墾設治局業已成立八台英圖花鄂包地方應劃歸商都管轄該民等所請領之地候令行該局查明如無別項鞵轄卽准由該民人等承領所有籌足押欸着先向銀行繳交可也此批掛發外該民等請領八台英圖花鄂包地可否給放如無別項鞵轄應由該民人照章領墾合亟令仰該局長卽便查照辦理可也仰卽遵照此令等因奉此局長到差後接據該民人王元等稟同前情當於十月十五日派令勘丈員郭蘭偕同繪圖員書算人等前赴八台勘丈王元等承領大小英圖山荒地至二十二日回局共丈毛地九十二頃二十八畝除山梁沙石溝渠道路十六頃八十六畝三分淨地七十五頃四十一畝七分上則五頃零五畝中則四十三頃七十畝下則二十六頃六十六畝七分又於十月二十三日派令勘丈員郭蘭偕同繪圖員書算人等前赴八台丈放蒙民馬拉巴哈等承領蘇計莊荒地一段至二十六日回局共丈

毛地四十四頃二十七畝五分除蒙學營子住基及八台馬廠地九頃五十畝又河渠沙石山梁道路不堪耕種地七頃五十二畝五分淨地二十七頃二十五畝計中則八頃八十五畝下則十八頃四十畝奉令前因所有遵令派員勘丈八台大小英圖及丈放八台蘇計莊各荒地緣由理合分別繪具圖說呈覆鈞局鑒核備案實爲公便附呈圖說二紙等情據此除指令據呈已悉查前據陶林墾務局以職局已丈八台荒地復經商都招墾設治局丈放應否卽令歸該局辦理等情呈請前來當經本總局令行該局將放給王元之地暫行撤銷在案茲據呈稱勘丈王元承領八台大小英圖山荒地共計淨上中下則地七十五頃四十一畝七分又丈放蒙民馬拉巴哈等承領蘇計荒地共計淨中下則地二十七頃二十五畝等語究與陶林墾務局解決劉雅勤與八台官兵地畝鞫鞫案件有無妨礙未據聲叙應由該局咨商陶林墾務局將劉雅勤與八台官兵地畝鞫

轄案件及此次王元馬拉巴哈等承領大小英圖蘇計莊各案會同妥議辦法呈擬具覆以憑了案而免糾紛除分令外仰卽遵照圖說二紙存查此令印發外合亟令仰該局卽將劉雅勤與八台官兵地畝轆轄案件及此次王元等承領荒地各案會同商都招墾設治局妥議辦法從速具覆早結懸案是爲至要此令

墾務總局指令兩翼牧場清丈行局將丈出華興公司餘地查明定

則具報備查文

六年一月十二日

據呈已悉既據丈出華興公司餘荒二百零四頃七十六畝一分九釐其中地性等則不齊等情所請按照清丈章程以上中下等則勻均作價以昭公允之處事屬可行卽仰該局長切實查明遵章酌定等則辦理並將擬辦情形具報備查仰卽遵照此令

墾務總局指令多倫墾務局據呈覆遵令調查多屬未丈荒地情形

文 六年一月十二日

據呈該局所轄地畝業已清丈完竣等語應准備案至紅黃旗四牌兵租地畝如與熱河管轄權限劃定清楚仍應設法清丈竣事以歸劃一而免歧異該處果屬寒苦自可展期繳價以示體恤仰卽查照辦理此令

墾務總局令兩翼牧場清丈行局迅速派員將兩翼牧場現放地段

暨正白旗全段地繪圖專差送局文

六年一月十三日

案查本總局第二四九二號訓令該局長派員將兩翼牧場現放地段並連同正白旗全段繪錄大概全圖並約計方里送局核閱在案迄今已逾一月之久未據該局長繪送前來殊屬延緩現奉都統疊次嚴催刻不容緩合再令仰該局長迅速特派委員照繪專差送局本總局急待轉呈切勿再延此令

墾務總局令豐鎮縣

知事局長

按照正黃旗三佐官兵等所呈各欸切速

查明秉公核辦具覆文

六年一月十三日

案奉都統令開案據正黃旗三佐屬下西石小諾爾村兵都嘎爾等呈稱卑窮兵丁人等三十戶世居該佐西石小諾爾村充當旗佐差使安分度命由來已久前清時開放蒙旗空閑荒地本三佐蒙古兵丁人等贖回本佐田地由己力押荒升科本佐應得隨缺田地六十五頃並佐下牧場游牧十二頃以外當蒙格外恩施在旗佐各村周圍留給衆蒙人等墳塋並均經定章呈報都統作爲牧場不得買賣禁止在案(一本三佐兵阿木爾吉雅將東小諾爾蒙古村牧地任意私賣與劉姓等民人將大諾爾蒙村游牧私立自剛堂名目賣給大水坑村民人賈姓賈十驅逐本村蒙人該蒙人無法蕩析離居移至西石小諾爾村伏祈澈底查明追出肥己之欸分給衆人)一蒙前清墾務局格外恩施留給上輩墳塋之地不意鄉約阿木爾吉雅硬將各蒙古之墳塋科爾博勒濟卽白土灣之地由兵丁滿凱

甯布從中說合私自賣與民人張姓張大被其平毀現留二三座墳塋基誌其餘各墳塋均被開種伏乞都統明鑒澈底究查俯准兵丁等照章押荒升科以保墳地(一)前清墾務局於本西石小諾爾村蒙衆三十戶留給公共牧場在本村周圍南邊前山上西自隨缺地起沿界孟克吉雅田地西北與劉姓田地毗連東北自護軍校隨缺地起至池上作爲牧場游牧共計四至寬留五六里長留七八里以後如放地七頃當經押荒餘剩之地作爲牧場當經呈報大部並都署不准買賣等因禁止作爲公共牧場游牧在案(一)鄉約阿木爾吉雅兵孟克吉雅一族之人將九隣加放之地強行指給倚仗勢力尤形暴烈私自越佔各隣牧場游牧勾結民人盜賣牧地得價建蓋房院被本佐兵巴雅爾薩特等在都署具呈將設立月清堂名目之兵孟克吉雅控告當蒙批飭經該總管等齊集查辦地事時又被驍騎校那遜希彥捕盜六品官貢楚克色楞等控告將西石小諾爾村

牧場游牧按四至留給牧地二三里不等其餘六隣牧場游牧各留給一二半里不等控案完結擬定禁止章程於宣統二年十月間呈咨都署並豐鎮縣在案查案便明又鄉約阿木爾吉雅等一戶之人年年霸佔以致牧場游牧甚爲狹窄本年清丈委員錢文奎來到本村而阿木爾吉雅孟克吉雅等欺弄委員於其私佔之地出給押荒條承領於定章留給牧地私行橫豎刨挖壕塹霸佔地畝以致一村人等不但進退無路並將卑窮人等房院圈領均令本村人等遷移並稱由勘丈局買領之地毋得收放等語伏思前於各旗佐經墾務定章留給隨缺田地六十五頃並牧場游牧十二頃惟本三佐只有隨缺地牧地之名而無公共牧場游牧之實今閣村人等房院均圈入伊之四至之內無從棲止以致流離失所困苦已極伏乞都統明鑒查核體恤辦給度命牧場游牧以便照章押荒作爲產業(一)鄉約阿木爾吉雅假稱丈地委員錢文奎費用由各地戶地內每頃

攤派制錢四千八百文共計制錢一千餘千如實係委員費用如何花費許多伏思由墾務局傳布第十一條內載丈地委員盤費等項均由本局發給不得向地戶等勒索分毫等因曉諭禁止在案乃鄉約阿木爾吉雅不顧國家法令違禁指官貪圖利己詐取各窮地戶農民每一頃地勒派制錢四千八百文懇祈迫出分給衆人(一)鄉約阿木爾吉雅帶領丈地委員錢文奎將伊宗族之地欺飾丈量隱匿許多地畝上虧國課下奪各窮人等畝鄉約阿木爾吉雅一族之康云堂等餘出之地比較原地多有數倍懇祈清丈局復丈如果無餘先行出結後再行丈量本西石小諾爾有未丈之閑地十頃懇祈復行丈量照章押荒(一)此次墾務局特派一等調查員易薩圖並本旗總管前來會辦本三佐地事當將從前我們呈報居住之游牧被佔無法度命並由各蒙民地戶詐取等項均請眼看查明辦給等情當經一等調查員易薩圖並總管差兵會同本佐官員來到本

西石小諾爾東勘查牧場游牧地而鄉約阿木爾吉雅之兄兵丁孟克吉雅帶同衆人站立本村當中聲稱此村人等均在我所買地界之內等語口報易調查員當經我等復行跪報我等世居房屋均入伊地之內等語等因經調查員諭令兵丁孟克吉雅呈驗執照伊稱執照係我弟阿木爾吉雅拿走推諉並不呈驗因此一等調查員知悉我等衆窮人無有牧地是以未能復行分給牧場返回又向元山莊所屬農戶蒙民驍騎校克什巴雅爾那遜布彥民人白老四查詢丈量你們田地時是否出給委員花費據伊等報稱所有清丈委員花費每頃四千八百文均經鄉約收訖各等語卑等愚思兵丁孟克吉雅先令墾務委員住在伊家買地二頃七十畝承領押荒經委員出給押荒條內載明西與何姓連界東界小諾爾村寬四里有餘長三四里不等約計此內若干頃雖不得知計地甚多但已將本村圈入恐怕調查員查出弊端推諉不給呈驗伏祈查驗執照復行

丈量其圈入本村之地若無餘有數倍則卑等重加領罪鄰近一切狹窄之弊卽在此內所有呈祈鄉約阿木爾吉雅種種推諉藉消其弊情事祈請查明並將躲案之鄉約阿木爾吉雅復行傳來與我等對質查明將其私賣奪佔之地退回復行丈量俾免一戶僥倖按照原給一村兵丁人等之四至清丈此內除去發過押荒執照七頃地外其餘霸佔之地懇恩分給各兵丁等以免流離之害萬懇都統臺前伏祈鑒恤一村窮人之牧場游牧被佔並葬屍之地復被霸佔以致無有度命居住之地不得已而不遠三百里來轅謹具實情臚列各款呈訴冤抑等情據此合亟令行該總局仰卽按照各款切速查明秉公核辦並將查辦情形呈覆以憑核辦此令等因奉此合亟令行該知事局長會同按照所呈各款切速查明秉公核辦並將查辦情形據實呈覆以憑轉呈切切勿延此令

墾務總局令豐鎮縣

知事局長

將正紅旗呈稱王義越佔荒地一案查明

原案切實辦理文

六年一月十三日

案奉都統令開案據正紅旗總管孟德呈報據參領兼公中佐領多普沁署副參領事務公中佐領福凌阿呈稱茲據本旗署察哈爾巴達爾呼佐領呈稱查宣統二年本佐護軍校薩苛雅兵滿達等租給民人王義承種地十八頃而民人王義將附近之地佔種數十頃又將連界之七佐地畝任意越佔致起糾葛當經總管孟德親自劃分兩佐界址并經豐鎮縣知事許銘彝派員劃分按照原界刨挖壕塹伊亦竟自越佔又去年帶來委員王子鰲丈量承領部照而本佐官兵人等並未見聞亦無公文節經據情呈請斷辦於去年蒙鈞署委員王豐鎮縣知事袁會同本旗將本佐招租之地十八頃撥給民人王義在案此次清丈員將民人王義佔種本四佐界內地畝丈得約有五十五頃有餘並未丈之地餘有數塊查民人王義由本佐租種十八頃地外實交過數頃地押荒旗佐無憑查考彼時順

從民人王義一味含糊致將本四佐所屬游牧內所有地畝均被貪贖民人王義任意強佔隱匿國家土地豈能任其僥倖霸佔致彼此耽悞明白棄置有碍職任除據情呈報調查員施仁壽錢文奎段仲春王漢忠外懇祈轉報將民人王義押荒照數以外隱匿強佔之餘地丈給本蒙人名下以便照章押荒升科而免棄置耽悞國家錢糧等情前來理合呈報都署懇祈轉行墾務總局將民人王義任意隱匿霸佔本旗四佐押荒照數以外餘地撤回撥給該佐蒙人承領以便照章押荒升科實爲公便等情據此除指令外合亟令仰該總局迅卽派員確切查明秉公斷辦並將辦理情形呈復核奪此令等因奉此合亟令仰該知事局長會同查照呈稱各節確切查明秉公辦結并將辦理情形迅速具報以憑核轉切切此令墾務總局呈都統據沽源縣知事呈復查辦該公民等所呈被災情形係屬捏詞并請將趙文彬等解縣懲辦請鑒核令遵文

案據署理沽源縣知事黃凌雲呈稱奉鈞局令開案奉都統署第四百六十號訓令開案據該縣公民李文元趙文彬李魁元周昇王登雲李守端等呈稱緣敝縣縣立清丈墾務局曾經派員清丈地畝奈縣內所屬黑河卯正兩汛本年夏季亢旱秋收毫無兩汛人民實係哀鴻可憐若再加以清丈恐於民間多滋騷擾况敝縣地畝係八旗旗圈開墾多年均已在縣升科而於新墾者有別公民等桑梓有關不忍坐視民困再四思維祇得稟請都統令知沽源縣轉咨縣立墾務局暫行緩丈實爲公便等情據此查所稱各節如係屬實應卽暫行緩丈以紓民困除批示外合亟令仰該總局查核辦理並將情形呈覆以憑核辦此令等因正擬辦間又奉都統署第四百九十號訓令開案查前據沽源縣公民李文元等稟請暫緩清丈黑正兩汛地畝一案業經令行該總局查核辦理在案茲復據該民由

省會電稱沽源清丈旗地議員等已呈請緩辦在案近日該縣又復勒令清丈拘傳十大戶差帶同往黑河卯正兩汛聲勢洶洶如臨大敵民間瘠苦萬狀似此逼迫恐必激成變故爲此籲懇都統電令該縣暫緩清丈以免騷擾不勝盼切之至等情到署除電令沽源縣知事查照被災之地暫行緩丈其餘各地應遵章妥慎辦理並咨部備案外合再令仰該總局迅卽轉令該縣局遵照辦理並將辦理情形呈報核奪切切此令等因先後奉此查此案前據該縣知事局長電稱黑河汛紳士暗煽愚民聚衆抗阻清丈各情當經電令查照被災之地暫行展期清丈在案奉令前因除呈覆都統並分行外合亟令仰該知事卽便遵照辦理並將辦理情形卽日呈復以憑轉呈核奪切切此令等因奉此該公民等所稱本年黑卯兩汛夏季亢旱秋收毫無一節查縣屬秋禾前經知事勘明高窪地平均約計七分餘山地平均約計六分餘並未成有災歉呈報財政分廳有案如以

知事勘驗不實當秋禾在地之際該公民等何不呈請上臺派員勘驗迄今禾稼登場始言有災其誰欺乎且黑卯兩汛地畝本年如係被災趙文彬等赴沽源墾務局及縣署呈請緩丈時因何不言及災情呈文俱在無可諱飾該公民等明知都署離汛遙遠捏詞聳聽以期達到不丈地畝目的不言而喻該公民等所稱該縣勒令清丈拘傳十大戶差帶同往黑河卯正兩汛聲勢洶洶如臨大敵一節查黑卯紳民素稱刁悍民國三年袁前任內曾因驗契事宜聚眾抗驗經袁前任派兵彈壓紳民上控無效始就範圍投驗契據此次丈量地畝知事早知困難深恐愚民無知復起風潮不敢稍事操切於本年十月間諭請遞呈之十大戶趙文彬等赴縣面議以期和平辦理諭請至再至三竟無一人到縣至十一月十一日知事見該紳民等始終不肯來案帶領局中第一課課員向華親赴該兩汛演說勸導衆目共觀並無拘傳差帶之事局中前派勘丈員書既被該公民

等聚眾抗阻不能開丈現屆年關在邇大雪滿地本年實難再行勘丈擬俟來歲春融再由知事會同局長選派勘丈員書切實丈量查具呈之趙文彬等除李文元一名當聚眾抗丈之時身在天津實未與謀外其餘趙文彬等均係聚眾抗丈爲首主謀之人涉及刑事範圍業於本年十二月十四日奉到總辦令飭拘辦知事遵卽出票嚴拘僅獲趙文藻一名交由看守所所長看管餘均遠颺未經弋獲擬請總辦轉呈都統如果趙文彬等再赴都署遞呈卽行扣留解縣懲辦以伸國法而維墾政茲蒙令飭理合具文呈請總辦查核轉呈示遵實爲公便等情據此理合據情呈請都統鑒核令遵以便轉令遵照謹呈

都統咨山西省長請飭查原案是否有將豐鎮所屬各蘇木地畝歸

入庚子賠款案內劃歸教堂管業情事希見覆文

(稟稿) 總局 承辦 堂稿 六年 一月

察哈爾墾務總局案呈案據豐鎮墾務局呈稱竊職局自民國四年六月底成立以來所轄正紅正黃兩旗餘夾各荒業經先後派員前往遵章清丈惟查有教堂地畝數處當勘丈委員到地時該教堂牧師等卽多方藉詞違抗並稱凡屬教堂地畝均與庚子賠款案內有關業已歸入教堂管業未便清丈等語當經職局函請豐鎮縣公署查核嗣准函覆昨接惠函以正黃旗頭蘇木官村子教堂地五百餘頃是否因庚子賠款案內歸入教堂管業請卽查覆等因敝縣查本公署科房燬於辛亥變亂卷牘悉付焚如官村子地畝是否歸入教堂無案可稽相應函覆查照等因准此伏查職局所轄正紅旗頭蘇木並正黃旗頭蘇木官村子七蘇木十五蘇木暨十八蘇木平地泉均有教堂所管地畝或幾十頃數百頃不等如不實行清丈則凡教堂地界內有無餘荒均難明晰應如何辦理之處理合備文呈請鑒核示遵等情據此查豐鎮縣從前原歸晉省管轄劃歸以後未

准將關於該縣交涉案卷移交到察究竟當日是否有將該縣各蘇木地畝歸入庚子賠款案內劃歸教堂管業情事本署無案可稽相應咨行貴省長請煩查照飭查前案見覆以憑核辦實糾公誼此咨

墾務總局指令商都招墾設治局據呈遵令查明未丈荒地情形請

鑒核文

六年一月十八日

據呈已悉查此次令查未丈荒地數目事關通令仍仰該局趕速確切查明據實具報以憑彙案核辦至陶屬八台十蘇木等處既經劃歸該局管轄所有已丈該處地畝清冊仰候令行陶林墾務局查照咨交可也此令墾務總局指令陶林墾務局據稱准縣咨訊結八台官兵與劉雅勤

地畝轉轄一案文

六年一月三十日

呈悉據稱該官兵郭托普爾濟情願讓給劉雅勤地四十頃兩造業經具結完案並擬以蘇計東西荒地三十八頃餘劃歸劉雅勤承領另以花臥

鉢荒地有劉雅勤已經墾熟者一併劃歸補足四十頃之數雖該地有六七頃全數撥給已超過四十頃核之原墾原領辦理尙合定章應卽照准備案仰由該局轉咨商都招墾設治局知照並由該局迅速派員前往劃撥清楚以息訟端仰卽遵照辦理此令

墾務總局令兩翼牧場清丈行局判決張相臣等一案奉令准予備

案仰局知照文

六年一月三十日

案據該局長呈覆判決張相臣等地畝膠轕一案當由本總局抄錄甘結據情呈覆都統並指令該局知照在案茲奉都統署第五十六號指令開呈暨甘結均悉准予備案此令結存等因奉此合亟令仰該局知照此令

墾務總局令豐鎮墾務局奉都統發交李九鳴稟控案業已查確懇

請調卷斧斷一案仰認真秉公辦理文

六年一月三十日

案奉都統發交民人李九鳴稟一件據稱緣民前以霸地釀禍等情仲訴

崔占炳有案蒙恩令派委員將事密查明確只得再陳原情泣懇調卷斧
 斷勿令奸人得計屢次謀害不休竊思十二蘇木之故孔督由墾務局認
 領本蘇木地二十七頃之餘荒立爲四同堂名目招戶出售之地約有十
 五頃零所餘十二頃之地未及賣出出其指據借使趙得功銀兩民深知
 底悉該崔某原買四同堂之地執有兩頃五十畝部照竟將指據借銀十
 二頃之地皆行騙賣得價入囊迄今趙某控伊騙賣地畝刁使銀兩久訟
 不休於去年蒙許縣尊令委墾務局譚李拉丈該堂之地被崔某賄買只
 丈出餘地十二頃又經趙某控訴復蒙墾務局調查委員易施李三位往
 民處覆丈四同堂之地又拉出餘地五十餘頃前後共地六十頃上下均
 係故孔督原認領二十七頃四至以內之餘地理應歸趙得功承領奈由
 崔某將地騙賣各花戶承糧至今訟不能息乞查趙某控伊之卷霸跡自
 露似此伊霸心習慣致民釀成巨禍及伊甥劉寶泉與民素無仇怨本係

伊一人從中暗唆該劉某恃其平素威名欺民不休前已申明有卷今既蒙恩查確只得泣懇迅速調卷按律斧斷釋放民弟二林歸家務農則民感恩不盡矣等情據此除批示外合亟令仰該局知事會同該縣知事查明原案認真秉公辦理具覆以便轉呈此令

財政部令據呈前陶林議員胡培棠等稟稱被災各村暫緩清丈一案既經都統批准自可照辦並仰轉令該縣局體察情形酌定期

限報部文

六年二月三日

呈悉陶林縣被災各村暫緩清丈一案既經都統批准自可照辦以卹民艱惟清丈要政關係國家賦課卽因災變緩辦究應明定相當期限限滿仍應遵章丈量庶於國計民生兩方兼顧卽轉令該縣知事暨墾務局體察情形酌定期限於查報被災各村時一併報部可也此令

都統令准山西省長咨開正黃旗各蘇木教堂地畝是否歸入庚子

賠款舊卷散佚無存莫可稽考等因仰局知照文

六年二月二十

案准綏遠都統咨開案准山西省長咨開准察哈爾都統兼墾務督辦咨開察哈爾墾務總局案呈案據豐鎮墾務局呈稱竊職局自民國四年六月底成立以來所轄正紅正黃兩旗餘夾各荒業經先後派員前往遵章清丈惟查有教堂地畝數處當勘丈委員到地時該教堂牧師等卽多方藉詞違抗並稱凡屬教堂地畝均與庚子賠款案內有關業已歸入教堂管業未便清丈等語當經職局函請豐鎮縣公署查核嗣准函覆內開昨接惠函以正黃旗頭蘇木官村子教堂地五百餘頃是否因庚子賠款案內歸入教堂管業請卽查復等因敝縣查本公署科房燬於辛亥變亂卷牘悉付焚如官村子地畝是否歸入教堂無案可稽相應函覆查照等因准此伏查職局所轄正紅旗頭蘇木並正黃旗頭蘇木官村子七蘇木十五蘇木暨十八蘇木平地泉均有教堂所管地畝或數十頃數百頃不等

如不實行清丈則凡教堂地界內有無餘荒均難明晰應如何辦理之處理合備文呈請鑒核示遵等情據此查豐鎮縣從前原歸晉省管轄劃區以後未准將關於該縣交涉案卷移交到察究竟當日是否有將該縣各蘇木地畝歸入庚子賠款案內劃歸教堂管業情事本署無案可稽相應咨行查照令查前案見覆以憑核辦實緝公誼等因准此查口外各縣地畝前清時係歸墾務大臣兼將軍專案辦理當日如何規劃曾否咨會省署改革以來舊卷散佚無存莫可稽考庚子賠款合同並未將此項地畝入議究竟是否歸入教堂管業無憑核復案關交涉不厭求詳貴署係由前將軍署改組墾務原案當有舊卷可稽亟應咨查以重交案除咨復外相應咨行貴署請煩查照令查前案逕咨察署並希見覆實緝公誼等因准此查綏遠墾務於前清光緒二十八年開辦係在庚子以後並無此項賠款案卷茲准前因除咨復並令墾務總局查照外相應咨行查照等因

准此合亟令仰該總局即便知照此令

涼城墾務局呈報涼局辦事諸多障礙將先事預防各緣由請鑒核

令遵文

六年二月二十七日

案奉鈞局第二千五百七十七號訓令開案查前奉都統據巴彥濟爾嘎勒函請將藍旗地面瑪呢圖廟香火地二百餘頃仍歸該廟管業以濟衆僧等情發交到局當經本總局令行該局查明情形詳擬核辦在案茲查該僧所稱該廟香火地畝爲香燈日用之資衆僧生計之源請將此項地畝歸該廟管業以濟衆僧而全廟產之處似屬可行但應以二百頃爲限不得漫無限制合亟令仰該局查照辦理可也此令等因奉此自應遵照辦理積極進行業經差傳該僧來涼接洽查此案去年二三月間由恂勤郡王毓楓代表朱博川因香火地瑪呢圖廟七家廟等處糾葛纏訟不休嗣派員會勘該朱博川不能指明四至無理取鬧足見包攬詞訟希圖從

中漁利初到涼時假王府名義虛張聲勢固屬爲虎作倀其幫助朱博川刀筆之柴聖更屬無賴之尤前局長高爲息事甯人起見由去年冬每月暗地津貼洋二十五元帥湘接任後卽行取消詎第一課長王治龐代爲說項要求照給並有如果開罪柴聖恐於局事有礙將來新舊地不能清丈種種謠傳此等無稽之談本可置之不理獨怪課長王治龐誼屬同舟不思共濟亦復隨聲附和飛白流黃不知是何用意關於照例公事尙多不能明瞭而於分外事體偏加干涉擬請鈞座逾格鴻施將課長王治龐與他局對調公誼私情雙方兼顧裨益良多抑更有請者彙祥寺奎元莊兩處經前局長高派員勘丈因聚衆抗拒事遂中止呈請核辦在案此次勘丈香火地恐仍蹈覆轍擬查照清丈章程第十條之規定實行酌帶軍隊以資鎮懾於和平辦理之中稍爲施以壓力倘有前項情事發生將爲首之士棍地痞拿辦一二人決不使操之過嚴致暴憑之追悔亦不至縱

之卽逝爲姑息之養奸總期於事有濟爲必要萬一寬猛罔效恩威俱窮不能破除障礙則不職之罪實無可道請將師湘早予罷斥讓開賢路以促墾政之進行而黜主任之尸位所有先事預防各緣由是否有當理合具文呈請鑒核令遵謹呈

都統令准財政部咨開據多羅克勤郡王委託代理人稟稱請令墾務局派員分界丈放等因仰局遵照文

（原稟附）六年二月二十七

案准財政部據前清多羅克勤郡王晏森委託代理人宿星羅稟稱本府有放馬廠地畝坐落察屬涼城縣全境係廂紅旗管轄前經開放撥甯遠廳學堂五十頃以作學費但未分清界限懇令分界丈放等情查所稱各節本部無案可稽究竟是何情形除批示候查外相應抄錄原稟咨請飭查辦理見覆爲荷附抄原稟等因准此除咨覆外合抄原稟令行該總局遵照轉令該縣局該府是否撥有此項學田迅卽查明呈覆以憑咨轉此

令

附原稟

具稟人前清多羅克勤郡王晏森委託宿星羅等謹稟爲請令查事竊本府有清賞地畝久用以爲放馬廠坐落察哈爾涼城縣全境係鑲紅旗管轄前經光緒三十一年間山西右翼墾務大臣貽穀咨行開放在案經本府賞撥甯遠廳學堂五十頃荒地以作學費等情雖經辦理尙未分清界限是以停辦迨至現在民國成立曾奉前任大總統令

諭優待清室王公保護私產之命令則本府遵照稟請鈞部繼續丈放以六成歸於國課餘者自謀生計仰奉示下允准在案曾於上年六月間經察哈爾墾務局批准本府委託代理人接洽會同涼城縣知事出示佈告在案惟該學堂由光緒三十一年起佔地不止五十頃東西十二里餘南北八里餘約在四五百頃不等因此發生膠轕不休曾經迭

次稟請懇求涼城舉務局延宕許久不肯丈放奈何敝府是以具稟懇求鈞部轉令分清界限以維國課而濟生計之私產并請令行察哈爾都統轉令涼城縣知事及舉務局派員趕緊分清界限以便一律丈放而抵國課實爲公便謹稟

舉務總局令陶林縣

局知事

爲議員胡培棠等稟請被災各村暫緩清

丈一案仰卽體察情形酌定期限呈報文

六年三月二日

案查陶林縣議會議員胡培棠等稟稱被災各村暫緩清丈一案奉都統批准當經本總局令由該縣知事轉行遵照並呈請財政總長鑒核備案各在案茲奉財政部第七百七十七號指令開呈悉陶林縣被災各村暫緩清丈一案既經都統批准自可照辦以恤民艱惟清丈要政關係國家賦課卽因災變緩辦究應明定相當期限滿仍應遵章丈量庶於國計民生兩方兼顧仰卽轉令該縣知事暨舉務局體查情形酌定期限於查

報被災各村時一併報部可也此令等因奉此合亟令仰該知事會同墾務局長體查情形酌定期限於查報被災各村時一併呈報本總局以便轉呈至限滿之後仍遵章丈量可也此令

都統令據興和道呈稱豐鎮縣民人王有才稟控邢張氏侵佔地畝

一案已據該縣具報訊結等情仰局知照文

六年三月十日

案據興和道道尹胡商彝呈稱案查前奉鈞令以據豐鎮縣人王有才稟控邢張氏侵佔地畝一案合卽令催該縣查案速予清結仍令將辦結情形尅日呈覆等因當經令催該知事迅速遵辦具報去後茲據該知事覆稱卷查此案先於民國四年九月二十六日據邢張氏狀訴王有才之子王三鴿不候勘丈強拉田禾將伊毆傷面部肩膀等處早經前知事驗令傳訊旋據王有才以各種各收誣爲強霸等情辯訴前來卽經前知事集訊未結咨請墾務局派員勘丈嗣准墾務局局長張興留以准咨派員前

赴元善莊勘丈茲據勘丈員錢文奎呈稱遵令勘丈元善莊民戶王有才與邢張氏因地畝糾葛懸案不清今經委員拉丈該民戶王有才邢張氏兩造之地獨王有才按照拉丈尙短地一頃六十八畝九分而邢張氏除原照地外下餘地二頃一十五畝九分當令該氏將丈出之餘補王之所短並地又係毗連仍有侵佔之勢該氏不但將地不退而且狡猾異常委員查該兩造情形實係王有才地短而邢張氏仍強行不遵退地是以通知書未敢擅發等情據此當經敵局長令傳該勘丈員錢文奎面加考詢據稱所呈各節均係實在情形并稱當日辦理此案均按照該民所持原有部照四至切實查勘該邢張氏侵佔王姓地畝證據確鑿等語函覆前來知事隨即催集兩造於六年一月三日到案調閱部照開庭質訊緣王有才原領元善莊地三頃五十畝與邢張氏之地毗連茲經墾務局派員丈明王有才實短地一頃六十八畝九分邢張氏除原照地外尙有餘地

二頃一十五畝九分是邢張氏之越佔當然無疑詰之邢張氏亦俯首無詞判令邢張氏將侵越王有才之地依照墾務局委員勘丈情形如數退出按部照畝數管業並立界石標誌以杜日後紛爭當庭宣布令具甘結而邢張氏恃婦逞刁不服具結赴審判處上訴令行知事查案呈覆在案奉令前因理合將訊結緣由查案具覆呈請鑒核轉呈施行等情前來理合據情呈覆核奪等情到署據此合亟令仰該局知照此令

墾務總局令涼城墾務局據呈擬將地價弓口遞減變通辦法呈部

核准文

六年三月二十二日

呈悉據稱舊地情形較新地不同若按三百六十弓爲一畝不惟畝數糾葛且於縣署升科糧冊不符勘丈舊地擬仍照二百四十弓計畝事屬可行應查照縣署糧冊如原係二百四十弓爲一畝升科納糧有底冊可查者仍應按二百四十弓爲一畝核實丈量丈出餘地亦仍按二百四十弓

一畝計算現在張北豐鎮沽源三屬均係照此辦理該縣可以仿辦至地價上地七錢中地五錢下地三錢業經呈奉 大總統核准載在定章礙難變更該知事局長儘可體察該地土質情形酌量降推遞減以至下則定價爲止以示體恤所請改更地價呈部核准之處礙難准行仰卽知照此令

舉務總局令涼城舉務局將多羅克勤郡王晏森撥甯遠廳學堂地

畝一案會同查明具覆文

六年三月十四日

案奉都統令開案准財政部咨開據前清多羅克勤郡王晏森委託代理人宿星羅稟稱本府有放馬廠地畝坐落察屬涼城縣全境係鑲紅旗管轄前經開放撥甯遠廳學堂五十頃以作學費但未分清界限懇令分界丈放等情查所稱各節本部無案可稽究竟是何情形除批示候查外相應抄錄原稟咨請飭查辦理見覆爲荷附抄原稟等因准此除咨覆外合

抄原稟令行該總局遵照轉令該縣局該府是否撥有此項學田迅卽查明呈覆以憑咨轉此令附抄件等因奉此除分令外合亟令仰該局知事會同該縣知事切實查明核擬具覆以憑轉呈切切此令

舉務總局令商都招舉設治局將土城子一帶荒地暫不放墾先行

詳查土質界址呈覆以憑核辦文

六年三月十四日

案查正黃牛羣土城子一帶荒地界址尙未劃清現在請領該處地段者不下十餘起轆轤繁多甚屬複雜若不澈底清查漫然丈放則積案叢生益難廓清與其糾紛於後不如清理於前爲此令仰該局長卽將土城子一帶荒地一律暫不放墾並將土城子一帶土質情形及四至界址詳查具覆以憑核定辦法再行另案將請領地戶清單發交該局遵章彙核辦理是爲至要仰卽遵照此令

墾務總局呈都統據兩翼牧場清丈行局查復和親王府呈控兩翼

侵佔地界一案請鑒核文

六年三月十四日

案據兩翼牧場清丈行局局長林茂亭呈稱案查兩奉鈞局訓令飭查和親王府呈控兩翼侵佔一案自應遵照辦理惟職局開辦伊始無案可稽故卽咨詢兩翼總管查照去後茲據該兩翼咨覆爲咨覆事案准貴局咨開案奉墾務局訓令案奉都統訓令案據奉恩鎮國公毓璋呈稱敝府所有沽源縣屬之黑山馬廠早經報墾因與左右兩翼牧場地界毗連發生轆轤未能丈放該兩翼樹立石椿逼近我都里格鄂博侵越四十餘里等語又案據京正藍旗孀婦溥關氏同子姪毓鋼毓璋呈稱竊因氏先祖和碩親王於嘉慶七年有上賞黑山子馬廠一處被左右兩翼侵佔請令勘劃而維私產等情令行該局詳細勘辦查前後兩呈情詞逕庭殊難臆斷其中有無朦混應卽詳細辦理除批示外合將原呈界圖令發該總局轉令兩翼牧場清丈行局查明呈覆抄發原圖等因奉此查此地界多年交

涉敵局開辦伊始無案可查相應咨請貴翼切實查覆以憑轉呈等因准此正在查辦間復准貴局咨行以溥關氏爲黑山子地界事同前由各等因准此案查民國三年八月劃分兩翼界限係奉陸軍部委令鄧玉兩員都署委員圖麟暨統轄總管牧養科科长張桂森察哈爾鑲白旗參領那遜滿圖呼沽源縣知事袁樹滋各員會同勘劃彼時陸軍部委員存有原圖鑲白旗那參領攜帶老圖冊左翼攜帶乾隆七年都統印信之老圖冊右翼攜帶乾隆二十七年老冊以各界圖冊詳細查核均屬脗合遂經陸軍部委員都署委員主持按照各界底圖冊分立界址築墩立碑毫無越佔該府場界情事查所附地圖指名爲界惟以和得里山悞嚴思都西來泰必金巴各得里地名不在兩翼界內其餘所指各界地名均在兩翼原圖舊有界內該府所繪地圖東西南北有百餘里週圍約有數百里其各王府場地自有一定四至邊界里數乃於三年各界人員在都署會議分

界之時詳詢該府來員德麟梁武城說不出一定四至邊界里數亦只將自立地圖爲憑及與鑲白旗圖冊合對又大相懸殊是其私立地圖任意朦混希圖侵佔儼然畢露查該府原撥之地本由鑲白旗撥給與兩翼場界並無交涉敝總管等亦曾調查鑲白旗底案圖冊所撥該府之地係鑲白旗界內坐落在業得落山東鄂博圖固圖勒他拉呼都克阿魯呼都克貢諾爾思格爾等五處此係原撥該府之地應請調查鑲白旗底案圖冊自明根據卽知兩翼委無侵佔伊地也且於三年兩翼劃分界限原奉陸軍部委員都署委員查照底案圖冊秉公勘定已經解決立案是不僅鑲白旗有案可稽卽陸軍部都署亦均有案可憑也再查所呈光緒三十三年四等年暨宣統三年民國元年因黑山馬廠與右翼界址未清呈請前都統令由兩翼總管都署委員圖麟正鑲兩白旗人員該府護衛德麟會商分界又蒙前都統令獨石廳劉會同前往都爾格山指明前商界綫立墩

挖壕以總管等指定之地核與黑山場圖尙有虧損延至於今詎總管薩穆端隆魯普利令智昏假陸軍部名義朦混栽樁至將承認之地一概反汗任意侵越四十餘里等語查此節彼時會議因該府德麟議指地點越佔本場週圍約有一二百里敝總管焉能將兩翼地土國家馬場輕易任其侵越如此之多因而前此迄未承認何云反汗矧彼時又有各界人員暨都署委員圖麟皆查照存案底圖公論惟德麟竟不遵照存案底圖冊只任私意執拗多佔本場地界是不獨敝總管難以承認不敢瞻徇卽都署委員及各界人員均難承認祇以未遂該府慾壑私意以此挾恨恣意鼓舌妄言敝總管利令智昏假陸軍部名義朦混栽樁敝總管自維但知國家馬場爲重殊非利己自圖私產何由而至利令智昏卽如栽樁築墩立界乃奉上憲命令會同各界人員公議勘定豈能由敝總管假陸軍部名義任意朦混再查所呈都里格鄂博又云黑山子卽係察哈爾鑲正兩

白旗並左翼牧場三處之交界之都爾格山係正白旗東南界鑲白旗西南界左翼牧場東北界凡此山隣近旗羣人均知都里格鄂博又名黑山子卽是都爾格山並無有第二山係三處交界豈是該府之地再所呈前策總管出有甘結並無此案如該府果有案據可憑何以兩翼分界時縮首不言及分界之後又疊次妄捏呈詞以冀僥倖圖賴其意存朦混概可想見爲此查照底案切實咨覆等因准此查該總管等所稱均係實在情形且都署有案可稽決非憑空妄言等情前來理合呈請都統鑒核備案謹呈

舉務總局呈都統擬定丈放黑卯地畝兩種辦法請鑒核備案文

辦法

附) 六年三月十六日

案查前據沽源縣舉務局呈報該縣黑河卯正兩汛紳士趙文彬等煽惑愚民聚衆抗丈一案當由本總局派員查辦並呈請都統鑒核在案茲據

該委員陳元縣知事黃凌雲墾務局長曾紀馨會同呈稱委員奉令後遵卽束裝起程馳赴沽源局長紀馨知事凌雲亦早奉前因遵卽拘傳王文彬等一面將趙文藻扣留飭交管獄員看管其餘爲首諸人屢傳不到委員到沽適紀馨解款晉口迨紀馨由口回局三面會議以此事無論如何總須辦到黑卯兩汛人民承認清丈地畝不至再行抗丈爲目的卽可呈懇從寬免予深究惟王文彬等終不肯遵傳到縣委員若僅在縣守候終無解決之日擬親赴黑河就近辦理維時凌雲因有要事下鄉紀馨又須清理局務不克前往以彼此磋商意見既屬相同卽一人親往黑河傳集王文彬趙文彬李魁元等十餘人曉以大義並清丈地畝乃奉命令辦理決難抗違而該民人等尙多狡詞值李議員文元回家度歲遂邀請反復勸導陳說利害始各就範圍情願呈請清丈出具悔過自新再不敢抗違功令甘結並擬定黑卯兩汛旗地說明書面繳前來委員遂攜帶甘結

等項回縣會同紀馨凌雲將趙文藻先行取保釋放候示遵行佐領榮貴等亦呈遞說明書前來查核雙方說明書雖係實在情形而僅顧個人利益處尙多惟思黑卯兩汛地畝旗民交涉二三十年手續繁多情形複雜必得集合主佃雙方兼顧方無阻礙倘手續稍未完全恐清丈後又將起而反抗委員等互相磋商悉心妥籌擬將雙方說明書後逐條註明理由根據原墾原領定章擬定主佃兩面均平利益清丈辦法呈請訓示茲將佐領榮貴王文彬等所呈說明書暨委員等所擬清丈辦法理由理合具文呈請鈞局採擇示遵以便佈告民旗派員勘丈實爲公便計呈送王文彬佐領榮貴等說明書二扣甘結一紙王文彬等呈請清丈呈文一紙擬定清丈辦法理由一扣等情前來除由本總局指令呈暨附件均悉所擬清丈辦法雖屬可行惟尙未盡完善茲由本總局擬定辦法兩種發交該縣知事局長仰該知事等迅卽召集旗戶民戶各代表協同議決聽旗戶

民戶就兩種辦法決定一種具結存案呈報本總局查核至該紳等煽惑愚民聚眾抗丈實屬目無法紀本應依法懲辦姑念該紳民等業已悔過自新呈請清丈尙屬情有可原此次本總局所擬辦法兩種已屬格外從寬該紳民等不得於兩種辦法之外再有絲毫要求除分令該委員局長知照並呈都統備案外仰該知事卽行遵照辦理一面仍乘此春和核實清丈以重墾政仍將辦理情形迅速具復此令印發外理合呈請都統鑒核訓示祇遵謹呈

附清理黑河卯正地畝兩種辦法

一照交旗人辦法

由原業主遵照定章繳價領照其應得四成優款由局另款發給但須於照內註明兩端一對於原佃戶永遠不得奪佃二永遠不得增租字樣以全佃戶生計而免窒礙

一照交民戶辦法

由原墾民戶遵照定章繳價領照自行管業由官府於該地價內分劈四成優欸並每年照章應得四釐私租由各該旗戶照章承領但須於民戶原繳旗租定額內酌減若干成自三成至四成以示體恤

按以上第一種辦法則旗人取得完全所有權原墾民戶亦不至失業惟各旗戶須依限繳價不准拖欠第二種辦法雖減少旗租然原業主當時另得有四成鉅欸亦可另籌生計且每年尙有隨徵四釐私租亦無所損失原佃民戶既經繳價領照取得管業之權永無後患應由該縣知事局長召集各旗戶民戶協同議決就兩種辦法內擇定一種取具雙方甘結存案一面下鄉清丈核實履勘無論旗戶民戶不得於兩種辦法之外再有絲毫要求至旗人業經賣於佃戶之地不在此例合併聲明

墾務總局指令涼城墾務局據呈該局辦事諸多窒礙先事預防文

六年三月二十日

呈悉查各墾務局行局設治局第一課課長照章應由本總局遴員委任其第二課課長課員卽由各該局長坐辦逕行商同遴委歷經辦理在案該局課長王治龐如果不能稱職卽行撤差呈報本總局另委妥員接充可也至該廟香火地畝仰卽商同該縣知事遵章妥慎辦理切切此令

都統令據豐鎮縣民人何志呈控八蘇木武章蓋前因恃官騙價賄串委員隱匿一案懇速令局派員清丈等情仰局派員切實調查

文 六年三月二十七日

案據豐鎮縣屬民人何志呈稱前因恃官騙價賄串委員隱匿餘荒呈請派員清丈一案蒙批據呈已悉仰候令行墾務總局查明呈覆再行核辦此批等因蒙此查民在正黃旗租到八蘇木生荒地一頃押租銀一百五

十兩言明十年爲滿有約可證該蘇木武章蓋串同中人色格登專達解宗元等先將租地一頃賣給民人管業聲稱爲民押荒領照迨地價到手該蘇木武章蓋賄串常委員反謂民抗地不交將六七十頃餘荒盡入該蘇木隨缺地內使民銀地兩空民自奉批後俟候月餘困留張垣現當春耕之際無力守候理合呈請大帥鑒核速令墾務總局派員調查清丈歸還原領地畝上裕國課下安民業則感大德於無涯矣等情到署查此案前據民人呈請前來業經令行該總局派員詳查迄尙未據呈復據呈前情合再令仰該總局迅卽派員前往切實調查具報核奪切切此令

墾務總局呈都統據豐鎮縣知事局長呈覆李九鳴與劉寶泉地畝

糾葛一案已具結完案請鑒核備案文

六年四月五日

案據豐鎮墾務局局長張興留知事兼墾務坐辦邊度春會銜呈稱民國六年一月三十一日知事度春奉鈞局第二千七百七十六號訓令內開

案奉都統發交民人李九鳴稟送劉寶泉地畝糾葛等情一案合亟令仰知事會同該縣墾務局局長查明原案認真秉公辦理具覆以便轉呈此令等因奉此局長興留並奉令前因遵卽會同卷查此案先於民國五年五月十四日經局長興留派高等調查員易薩圖施仁壽前往該地查辦旋據該員呈稱奉令查辦李九鳴與劉寶泉地畝糾葛一案業已秉公查明李九鳴實佔劉寶泉地畝一段處令退還各依部照執業分清界限立石標誌取具雙方允服甘結等情呈覆前來局長興留查詢屬實當將派員查處完結情形函致知事度春在案茲經知事提訊李九鳴地畝糾葛實已完結詰其因何上訴則稱意欲爲弟李二林脫罪等語除將李九鳴傷害劉寶泉刑事一案由知事度春催集全案人等到案研訊確情依律判決製定初判書呈送審判處覆判外茲奉令查理合將會查李九鳴與劉寶泉地畝糾葛派員查明處結緣由抄錄甘結具文呈請鑒核俯賜轉

呈核示施行計抄呈甘結二紙等情前來理合抄錄甘結呈請都統鑒核備案謹呈

墾務總局指令涼城墾務局據呈清丈舊地酌量變通辦理重申前

請文 六年四月十二日

呈悉查該局長前次呈請將地價弓口遞減變通辦法一案業經本總局指令查照縣署糧冊如原係以二百四十弓爲一畝升科納糧有底冊可查者應仍按二百四十弓爲一畝核實丈量丈出餘地亦仍按二百四十弓一畝計算現在張北豐鎮沽源三屬均係照此辦理該縣情形相同應卽仿辦至於地價上地七錢中地五錢下地三錢業經呈奉 大總統

核准載在定章礙難變更該知事局長儘可體察該地土質情形酌量降推遞減以至下則定價爲止以示體恤等因業經印發在案儘可遵照辦理至該縣知事兼墾務坐辦自應共負責任對於票傳地戶催繳押荒尤

應認真辦理如陽奉陰違考成具在本總辦惟有稟承都統照章懲辦決不寬貸仰由該局轉咨遵照現值春融正舉務進行之際該縣新舊各地能否實行勘丈有無阻礙仰卽迅速具覆以憑核辦此令

舉務總局呈都統奉令查覆正黃旗三佐領下兵丁等呈控各節已

令催該縣局俟查覆到局卽行轉呈文

六年四月十二日

案奉鈞署訓令據正黃旗三佐領下兵丁達拉嗎都嘎爾烏勒濟格希音等呈控鑲黃旗總管額色勒克們德強佔牧場一案原文在卷不復冗叙奉令開查此案前據該兵丁都嘎爾等呈控前來當經令行該總局按照各欸切速查明詳細呈覆在案迄今數月尙未據報殊屬不合據呈前情合再令行該總局迅卽派員查辦尅日呈覆以憑核辦毋再遲延切切此令等因奉此查此案於民國五年十二月奉鈞署第六百三十五號令交當經本總局令行豐鎮縣知事會同舉務局局長按照該兵丁等所呈各

欵切速秉公查明具覆在案迄今數月未據查明尅日具覆實屬不合茲奉前因除由本總局令催該知事局長迅速查明尅日具覆一俟呈覆到局卽行轉呈外理合呈請都統鑒核備案謹呈

墾務總局令豐鎮墾務局該縣教堂領墾地畝與庚子賠欵不相關

涉令查照辦理文

六年四月十二日

案奉都統署第四二五號令開案准綏遠都統咨開前准山西省長咨准貴都統兼督辦咨開察哈爾墾務總局案呈豐鎮縣屬教堂所管正黃旗各蘇木地畝是否因庚子賠欵案內劃歸教堂管業一案咨請飭查等因前來當查綏遠墾務開辦於前清光緒二十八年係在庚子以後並無此項賠欵案卷已分咨在案惟事關教案不可不詳加澈查以便交涉卽令綏遠墾務總局將從前丈放過豐涼興陶四縣地畝教民領墾如何辦理詳查去後茲據覆稱查豐涼興陶四縣各蘇木教堂領地當日辦法與人

民領地相同均經領有執照照章繳納押荒錢糧如領有普通執照自應受我法律上之支配且教堂領地一律交納錢糧則清丈自不能持異議若因庚子賠款劃歸教堂管業地畝其執照自與尋常有異蓋領地與租界迥乎不同其理甚明無待辨論也等情據此查該總局所查當日教民領墾一節尙屬實情惟此項領墾地畝與庚子賠款不相關涉除指令外相應咨請貴都統查照核辦等因准此合亟令仰該總局查照辦理此令等因奉此合亟令仰該局查照辦理此令

墾務總局令沽源縣

知事

暨陳委員等加委該委員會同該知事局

長迅將黑河卯正地畝案件辦理具覆文

六年四月十二日

案查本總局所擬清理黑河卯正地畝兩種辦法除發交該委員等遵照外並令行該知事局長迅卽召集旗戶民戶各舉代表協同議決聽憑該旗戶等就兩種辦法決定一種取具雙方甘結存案無論旗戶民戶不得

於兩種辦法之外再有絲毫要求一面下鄉清丈核實履勘在案乃爲時既久尙未據該縣局呈覆前來合亟加委該委員陳元會同辦理並仰該知事局長遵照會同該委員迅將此案辦結具覆乘此春融一面下鄉勘丈勿稍延誤切切此令

墾務總局令沽源涼城墾務局局長坐辦體察該縣情形所有舊地

今春究竟能否開丈限文到五日內明白具覆文

日六年四月十二

查該縣新荒現已寥寥無照舊地雖尙不少惟因糾葛繁多辦理頗屬不易而該局每月開支數百金墾務既不能進行經費幾同於虛耗現值財政困難鎔銖可貴公帑重要詎容虛糜該局今春如能開丈舊地自應陸續進行照常辦理否則卽擬援照裁併多倫墾務局辦法將該局所有未盡事宜歸併該縣知事衙門辦理以便結束而省開支業經呈奉都統核准照辦在案現在時已春深冰凍早解該縣所有未丈舊地今春究竟能

否開丈民間有無阻滯仰該局長坐辦即便體察情形限文到五日內明白具覆以憑核辦切切此令

墾務總局呈都統據策協領呈稱查覆正黃旗總管隱匿荒地情形

請鑒核備案文

六年四月十四日

案查李璿聯等摺稱正黃旗總管巴揚孟克隱匿荒地一案當經本總局令委明安牧場協領策楞棟魯普前往切實查辦並呈請都統鑒核在案茲據該協領呈覆竊奉第二千七百七十六號委令據李璿聯等摺稱察哈爾正黃旗巴總管隱匿四蘇木地一段令委前往切實查辦呈覆勿得瞻徇附抄原摺並地圖一紙仰卽遵照此令等因奉此遵於三月初五日起程馳往正黃旗四蘇木界內按圖調查確有生熟地百餘頃查該段地畝乃前墾務大臣貽開放荒地時是爲四蘇木官員兵等酌留公共隨缺養贍地其應得之數已有定章嗣於民國三年九月間有四蘇木護軍校

色楞德勒格爾驍騎校色木博將該段地畝暗自私賣與教民劉鴻儒得價銀九百五十兩旋經四蘇木佐領官兵等查知卽將色楞德勒格爾等呈控於察哈爾都署查辦當經前任何都統查明斷結將色楞德勒格爾等所得私價儘數飭交興和縣轉交劉鴻儒地則仍歸四蘇木管理並將色楞德勒格爾及色木博各記大過二次俱各有案然該段地畝雖有百十餘頃間有該蘇木隨缺養贍地及沙城河渠其餘荒多少非得勘丈難以明晰此次卑職本宜遵照定章查明該蘇木官員兵丁應得隨缺養贍地若干勘撥明確繪圖貼說備案無奈該地冰尙未消且有積雪勢難勘是以先將查明該段地畝情節呈覆一俟冰解雪消再行往勘劃撥抑或令行興和墾務局就近查勘核辦以省經費之處出自鈞裁再此項地畝既有隨缺養贍地宜先將養贍地照章劃清如有餘荒再行放給墾戶方免爭端是否有當理合呈請鑒察核奪辦理等情除由本總局指令呈

悉該總管既有隱匿之地一百餘頃應卽核實丈量繪圖貼說呈請核辦
乃藉詞積雪未消意存推諉含混呈覆殊屬有負委任除呈覆都統外仰
候令催興和墾務局迅速查覆俟查覆到局另行呈覆外理合呈請都統
鑒核備案謹呈

墾務總局呈都統爲遵令議復涼城墾務局局長呈請變更弓口是

否可行文

六年四月十七日

案奉鈞署第五零三號訓令據涼城墾務局局長盧師湘呈請變更弓口
酌減地價並據呈稱該局長對於局中局外兩方面人地不甚相宜請與
豐鎮對調一案奉令開該局長所擬變更弓口是否可行除指令外合亟
令仰該總局迅卽核議具覆以憑核奪令遵至該員呈請與豐鎮局長對
調一節用行政權操自上但能爲地擇人斷不能因人擇地該員自請
量移設各局相率效尤尙復成何政體所請殊屬冒昧應不准行並卽知

照此令等因奉此查前據該局長呈稱爲清丈舊地諸多窒礙擬請將地價弓口遞減變通辦法呈部核准等情到局當經本總局指令呈悉據稱舊地情形較新地不同若按三百六十弓爲一畝不惟畝數糾葛且於縣署升科糧冊不符勘丈舊地擬仍照二百四十弓計畝事屬可行應查照縣署糧冊如原係以二百四十弓爲一畝升科納糧有底冊可查者應仍按二百四十弓爲一畝核實丈量丈出餘地亦仍按二百四十弓一畝計算現在張北豐鎮沽源三屬均係照此辦理該縣可以仿辦至於地價上地七錢中地五錢下地三錢業經呈奉 大總統核准載在定章礙難變更該知事局長儘可體察該地土質情形酌量降推遞減以至下則定價爲止以示體恤所請改更地價呈部核准之處礙難准行仰卽知照此令印發在案除由本總局轉令該局長知照外理合呈請都統鑒核令遵施行謹呈

墾務總局令豐鎮縣

知縣

長事

將正黃旗總管呈稱各節併案查辦迅速

具覆文

六年四月二十三日

案奉都統署第五五五號令開案據正黃旗總管巴揚孟克呈稱適奉鈞署令開據正黃旗三佐西小諾爾村兵都嘎爾等呈控一案令仰該總管卽便按照各節查明秉公核辦並將查辦情形具復以憑核辦等因奉此總管本應前往該處親臨確查惟原告人內有親屬理應另行派員前往查明當委派參領色爾鄂特確查去後茲據該參領色爾鄂特呈稱爲確查呈報事茲卑參領奉令前往三佐親臨查得都嘎爾等呈控各節以兵丁阿穆爾吉雅將東小諾爾蒙村游牧擅自賣與民人等語查東小諾爾所有村莊人等房院均各典賣與民人已於去歲經民人押荒其村子周圍地畝經兵丁阿穆爾吉雅於前清時由墾務局押荒用史清堂之名典賣於民人此項地畝於去年丈出餘地經民人押荒又剛勇堂地畝有餘

地等語係已經豐鎮墾務局委員錢文奎清丈辦理之地難以確查惟查西小諾爾蒙村游牧經阿穆爾吉雅將衆人牧場游牧圈入由清丈委員承領一頃四十畝通知書業已押荒又科爾博勒濟之墳塋地賣於民人張大事經證人甯布從中說合賣給是實等因出具甘結理應與衆人平均辦給惟兩造彼此爭執不服辦理理合據情呈請轉報等因前來總管伏思公事不但親屬雖父子亦無所徇私惟恐難免衆人嫌疑茲原告人等不服該參領秉公辦理理合呈請都統明鑒或將原被告人等提傳確查辦理或另行派員查明外再兵丁阿穆爾吉雅遞到漢文訴呈一紙一併附呈等情據此查此案前據該兵丁都嘎爾等呈控到署已令該總局查明核辦在案茲據該總管呈復前情合再令仰該總局併案查辦仍將辦理情形呈候核奪此令附抄件等因奉此查此案迭經本總局令行該縣知事局長會同查辦在案茲奉前因合再令仰該縣局併案查辦仍將

辦理情形迅速具覆以憑轉呈毋得再延致干未便切切此令

墾務總局令陶林縣

局長事

迅將鑲藍旗總管呈稱各節切實查明秉

公核辦具覆文

六年四月二十八日

案奉都統署第六百三十六號令開案據鑲藍旗總管多普端呈稱茲據兼署參領關防副參領阿凌阿呈稱以本旗九佐兵丁成額勒泰世世居住牧地及隨缺田地被十二佐有勢力之二和堂卽空銜八品筆帖式哈豐阿兵色普徵額夾佔欺壓至極據情前赴上署呈控當經署總管帶回本旗兩次傳令該九佐及十二佐並筆帖式哈豐阿兵色普徵額以便查明辦理而該筆帖式哈豐阿兵色普徵額等全未到案惟據筆帖式哈豐阿具呈內稱爲呈報事茲於三月十日接奉旗令內開以據九佐兵丁成額勒泰呈控霸佔地畝等情聽候查明辦理等因奉此查卑筆帖式並未由兵丁成額勒泰承領之地佔領耕種之事惟查前清光緒二十九年將

本旗各佐空閑荒地入官時經欽差貽派委員李光藻等前來將此項地畝入官經卑職從兄原任護軍校楊遜給予該佐地價在墾務局呈交押荒領取部照開墾耕種按年納糧迄今十有餘年茲於民國五年復丈前清時間所種各處田地經墾務局派侯委員前來復行勘丈劃分界址原將該佐撥給兵丁成額勒泰隨缺田地一頃仍舊給予成額勒泰發給部照乃兵丁成額勒泰欲討便宜反到假造將卑職前清時納糧之地重複填領部照當經卑職復在陶林縣縣長陶林墾務局局長王台前因此項地畝先年所領部照及成額勒泰新領部照彼此復行查實斷絕葛藤由兩造出具甘結畫押辦結在案茲筆帖式之孫綽克達賚業經該縣官辦結又由兩造具結並無復由兵丁成額勒泰一頃地內爭奪情事等情復據兵丁成額勒泰呈稱爲聲明冤情懇將世居牧地辦結事竊兵丁世居本佐牧地一段遵照定章指給卑兵丁留作隨缺地近有空銜八品筆帖

式哈豐阿設立二和堂名目恃其勢力藉稱由該佐買領之地霸佔等情
屢經呈報本佐在案前年據情呈報陶林墾務局由該局收取押荒發給
部照不意暗中勾串以圖給伊辦結一味勒令辦理情形具報外卑兵愚
思良久世居本佐牧地被連界之別佐蒙員哈豐阿兵色普徵額等奪佔
以致貧家猝然離移冤情前因赴口呈控上署當奉本旗總管面諭將卑
兵丁帶回本旗查辦屢次飭傳該筆帖式哈豐阿等並不到案妄行躲避
具呈卑兵丁久候至極苦情一併聲明呈報伏乞明鑒請將世居家園周
圍所有六十餘畝地還給勿令他人僥倖俾得生路叩懇等情各呈報前
來查筆帖式哈豐阿兵色普徵額理應由旗遵奉到案辦理乃含混具呈
不來實屬不合且案情關乎蒙民生計理合據情呈報都統鑒核斷辦施
行等情前來除指令外合亟令仰該總局遵照轉令該管縣局切實查明
核辦毋令該蒙兵遽失生計致滋流離仍將辦理情形呈候核奪此令等

因奉此除分令外合亟令仰該局知事會同切實查明秉公核辦仍將辦理情形迅速具覆以憑轉呈切切勿延此令

舉務總局指令涼城舉務局據呈覆該村鄉約等一再聚眾抗丈並

清丈舊地困難情形文

六年五月二日

呈悉清丈地畝係奉大總統明令舉辦各省區一例進行察區地畝遼闊辦理舉務尤屬要政該鄉約等膽敢一再聚眾抗拒實屬目無法紀仰由該局秘密偵察務將首犯姓名查實具報以便令該縣知事遵章依法懲辦至據稱清丈舊地困難情形及呈請裁併等情仰候稟承都統另案令遵此令

舉務總局指令沽源舉務局據呈爲業主餘地請從寬拋減勘丈員

考成請從寬核算文

六年五月二日

呈悉查清丈地畝如有砂石城灘實係不堪耕種者由勘丈員核實拋除

於照內加蓋戳記註明拋除數目俟墾成之日再行照章繳價升科前已頒發戳記式樣歷經辦理在案該業主餘地如有實係不堪耕種者應核實拋除註明照內不得漫無限制再查勘丈員考成條例第三條載明有特別阻障不在此例惟應詳加查核不得任令託故規避等語該局勘丈員考成應由該局長坐辦按照各該員日記詳加查核如有特別阻障准由該局長坐辦據實聲明以憑核辦仰卽遵照此令

墾務總局呈都統據沽源縣知事局長會銜呈報兩造代表結內聲叙緣由並聲明黑卯兩汛廟產及脂粉各地一律辦理等情應卽

照准請鑒核備案文

六年五月五日

案據沽源縣知事劉鐵山呈稱竊知事於本月十日招集黑卯兩汛旗戶代表榮茂亭民戶代表王文彬到署開會協議兩條辦法首由旗戶代表認定第一條而民戶一方面認爲第二條意見紛歧莫衷一是嗣由知事

反覆勸導終歸第一條丈出餘地歸旗戶承領以爲解決業經兩造具結畫押在案除由知事與墾務局局長曾紀馨據實會呈外所有旗民融洽情形理合先行呈報希紓座念是爲至幸等情正核辦間旋據委員陳元墾務局局長曾紀馨知事兼墾務坐辦劉鐵山會銜呈稱竊清丈黑卯兩汛地畝一案職等前曾據旗民兩造所陳意見各加說明擬議辦法呈請鑒核在案嗣奉鈞局指令內開呈暨附件均悉所擬清丈辦法雖屬可行惟尙未盡完善茲由本總局擬定辦法兩種發交該縣知事局長仰該知事等迅卽召集旗戶民戶各舉代表協同議決聽憑旗戶民戶就兩種辦法決定一種具結存案呈報本總局查核至該紳等煽惑愚民聚衆抗丈實屬目無法紀本應依法懲辦姑念該紳民等悔過自新呈請清丈尙屬情有可原此次本總局所擬辦法兩種已屬格外寬免該紳民等不得於兩種辦法之外再有絲毫要求除分令該委員知事知照並呈都統備案

外仰該局長卽行遵照辦理一面仍乘此春和核實清丈以重墾政仍將辦理情形迅速具復此令併辦法兩種等因奉此職等遵卽召集旗戶代表包存壽民戶代表王文彬等於本月十三日到局會議於兩種辦法內任其決定一種討論終結該代表等均願遵守第一條辦法丈出餘地由原業主遵照定章繳價領照應得四成優欸由局另欸發給但永遠不能增租奪佃並由旗民兩造代表當場各出具認可甘結畫押爲憑惟黑卯向習因各旗戶多寄居他處所有每年應繳丁糧均由民戶扣租代繳此次丈出餘地地丁改由業主自繳其原地租糧該代表等均願悉仍舊貫以免紛更故原結內有原租原糧歸民戶照舊交納之規定旗民變產時如准其撤佃恐日後旗民以變產之名爲奪佃之實各民戶將有不能安業之虞故原結內有如遇旗民變產或賣亦不能增租奪佃之規定佃戶地畝租自業主乃年湮代遠展轉私推推價愈漲愈高初次直接租地之

佃戶久已風流雲散後來接種之佃戶一旦欲退地於原業主其價較業主初租出之時價已漲至數倍或十餘倍不等業主不贖則力有未能此中蓋受無窮之痛苦是不可不預爲制限故原結內有民戶推佃只准照原價移轉不得增加押租之規定又民戶中往往有欠租不繳或偷典偷賣情事如遇此種事項發生仍不准原業主撤佃另租亦非所以保障所有權之道故原結內有如遇民戶短欠地租或偷典偷賣准業主照繳原押租撤佃另租之規定查此數端均係實在情形其實雖未載第一種辦法之內而其理由亦未越第一種辦法範圍之外故原結中均令聲明以杜異日無窮之糾葛所有此次召集旗民各戶代表會議結果及各代表甘結內聲叙各緣由是否有當除呈報都統外理合備文並照抄原結二份呈報鈞局鑒核施行再黑卯兩汛廟產及脂粉各地亦係取同一辦法丈出餘地如廟產則歸各該廟住持承領如脂粉各地則歸原業主承

領以上兩項地畝如有向未繳納丁糧者此次丈竣無論原地餘地擬令照章一律繳納合併聲明等情到局除由本總局指令呈結均悉查甘結內聲叙各種事由尙未超越本總局所擬第一種辦法之外業經兩造代表當場認可畫押在案應卽照准至黑卯兩汛廟產及脂粉各地既係事同一律亦准如擬辦理除由本總局轉呈都統外仰由該局分行該委員知事知照乘此春融仰該局長會同該縣知事迅速派員勘丈可也結存此令外理合呈請都統鑒核備案謹呈

墾務總局指令沽源墾務局據呈爲會銜呈報召集旗民各戶代表會議結果及各代表甘結內聲叙各緣由文

六年五月五日

呈結均悉查甘結內聲叙各種事由尙未超越本總局所擬第一種辦法之外業經兩造代表當場認可畫押存案應卽照准至黑卯兩汛廟產及脂粉各地既係事同一律亦准如擬辦理除由本總局轉呈都統外仰由

該局分行該委員知事知照乘此春融仰該局長會同該知事迅速派員勘丈可也結存此令

舉務總局指令鑲紅旗總管爲查明該旗十一佐地畝糾葛俟涼城

舉務局員詳細丈量劃分界址再行呈報文

六年五月八日

兩呈均悉查此案前據涼城縣知事呈稱該旗十一佐官兵將學堂官地私行賣與民人潘玉龍公和堂作價銀二百兩刻下該二戶不特不繳荒價卽欲向十一佐討要地價等情在案茲據呈稱該佐官兵並無私賣學堂地畝使用二百兩銀情事若丈有餘地請將本佐所佔兩頃地撥給以免糾葛等情仰候令行涼城縣知事舉務局局長迅速派員丈量並將此案原委詳細查明具復再行核辦此令

舉務總局令涼城縣

知事局長

究竟該鑲紅旗十一佐官兵有無私賣情

事據實查覆並迅速派員秉公勘丈文

六年五月八日

案據鑲紅旗總管孟都巴雅爾呈稱茲奉察哈爾全區墾務總局指令內開前據該縣知事呈稱該旗十一佐官兵將學堂官地私行賣與民人潘玉龍公和堂作價銀二百兩一案當由本總局呈奉都統令行該總管查明具復等因在案乃事隔一年之久未據該旗查復到局實屬不合除令該縣知事局長併案辦理外仰該總管迅將私賣官地官兵姓名查明具報並將價銀二百兩照數追出解交涼城墾務局另案存儲一面呈報本總局備查等因奉此遵查卑總管因會查此案親於四年九月間前往涼城縣縣官林茂亭尙未傳到該民正等候間據涼城縣設立墾務局局長高聲稱據本局課長沈範民函稱鑲紅旗四佐有餘地等因該佐欲行詳細勘丈而本佐護軍校訥領額攔截不准勘丈你回旗勸慰四佐地事令將該地詳細丈量以免有悞收納荒價等語且民人潘玉龍等尙未到案故將此案移付審理員哲克東額代爲辦理返回丈量頭四兩佐地畝由

餘地收納押荒辦理在案旋准審理員哲克東額移開爲移明代辦事十
一佐由墾務局押荒承領餘地內賣給潘玉龍公和堂等兩頃地與學堂
爭界糾葛地事雖與涼城縣會同辦理若不查明兩造界址則此項糾葛
地事難以斷辦現已設立專辦地事墾務局丈量學堂地畝其地是否足
敷原數俟詳查後再行斷辦相應移會本旗咨行墾務局丈量學堂地畝
將十一佐兩造界址劃分詳細丈量是否足敷原數得以斷辦等因於本
年十二月移到當經咨請涼城縣墾務局詳細丈量查明其地是否足敷
原數劃分界址轉報等因咨行在案迄今尙未詳細丈量俟墾務局員詳
細丈量得有細數劃分界址時再行呈報等情復據該總管呈稱茲據參
領等呈稱據本旗十一佐驍騎校巴圖那遜報稱奉令遵查本十佐地畝
奉鈞署派墾務局委員多普端哈當阿等前來查明四至勘丈出給餘地
荒條當經發給潘玉龍公和堂等兩頃地押荒條嗣將潘玉龍一頃地押

荒條經縣官收去本佐官兵並無私賣學堂地畝使用二百兩銀情事惟稱該縣官前來查勘學堂及本佐兩造界址將此兩頃地歸入學堂等語迄今未將學堂地畝詳細查明丈量是以尙未斷辦若丈有餘地請將本佐所佔兩頃地撥給以免糾葛等情據此除給予該十一佐驍騎校巴圖那遜公文持赴該縣請將此項地案查明外理合呈報等情據此查此案於民國四年六月據前任涼城縣知事郭景周呈報到局當經本總局稟承前任都統令該知事查明該十一佐官兵等何時私賣有無憑證據實呈覆以憑核辦迨該縣舉務局成立以後復迭經本總局令該縣知事會同舉務局局長將此案原委詳細查明具覆各在案乃爲時既久未據該縣局呈覆前來實屬不合茲據前情除由本總局指令兩呈均悉查此案前據涼城縣知事呈稱該旗十一佐官兵將學堂官地私行賣與民人潘玉龍公和堂作價銀二百兩刻下該二戶不特不繳荒價卽欲向十一佐

討要地價等情在案茲據呈稱該佐官兵並無私賣學堂地畝使用二百兩銀情事若丈有餘地請將本佐所佔兩頃地撥給以免糾葛等情仰候令行涼城縣知事墾務局局長迅速派員丈量並將此案原委詳細查明具覆究竟該佐官兵有無私賣情事據實呈覆以憑核辦勿得再延切切此令

墾務總局指令陶林墾務局據呈爲遵令前放八台官兵與劉雅勤地畝商都重行丈放他戶據稟轉呈仰祈鑒核文

六年五月十七日

呈悉仰候令行商都招墾設治局查明辦理八台荒地既經劃歸商都管轄所有關於八台地畝輻輳案件及清丈地畝清冊應遵照本總局第二九四零號指令迅送本總局以憑轉發毋得再延此令

墾務總局令商都招墾設治局據陶林墾務局呈稱八台地畝輻輳等情仰該局查照辦理文

六年五月十七日

案據陶林縣墾務局呈稱竊查職局上年遵令丈放並清理八台官兵與劉雅勤地畝一案旋悉商都行局又放給王元大喇嘛等比時職局原以八台既劃歸商都八台官兵及劉雅勤一案請令歸商都辦理誠恐節外生枝一波未平一波又起轆轤愈深則清理愈難乃鈞局仍令職局辦理並令商都招墾設治局將王元等所領之地撤銷在案職局卽不得不遵令勉爲其難現在八台官兵與劉雅勤一案辦理雖已就緒而劃撥尙未實行正設法擬辦間茲復據八台佐領高頭布多爾濟稟稱爲一地再賣呈請查明追究地歸原主事竊佐領等前以劉雅勤冒認台荒等情一案經佐領去年在墾務總局呈明該地情形本台兵丁等照章認領已經派員丈明領有通知書交過荒價在案孰料商都設治局今年又將已認出之荒地賣於王元名下現該王元在地耕種佐領赴口在墾務總局稟明原情蒙批據稟已悉查該民呈繳押款洋七百元業經本總局驗收清楚

至所請領八台蘇計花臥包等處荒地前據陶林墾務局以劉雅勤指領該台荒地四十頃已經繳清押荒等情呈報前來當經指令遵照前批均分主義切實秉公辦理在案據稟前情仰候令行陶林縣墾務局從速查照前案遵章核辦并令知商都招墾設治局查照可也此令仰見金批甚明佐領只得來案稟明查此地應歸何人再查王元是伊在後冒認一俟派員將地分別清楚佐領限日卽行交款去年因劉雅勤躲不來案地界未能分清而商都又行轉賣將劉雅勤蘇計地畝轉賣與蒙古大喇嘛佐領與劉雅勤案尙未結復又重賣二主似此一地幾賣致起風波佐領只得呈明懇請局長據情轉呈總局先行禁止王元開地究竟應歸何人抑或如何辦理之處不得已叩乞恩准轉呈等情到局除經職局批令該佐領應候轉呈核辦外據稟前情除咨行商都查復外該局已未撤銷王元大喇嘛所領地畝是否該商等藉端把持但領地有前後之分前者則

依法爲有效而後者則依法爲無效地原非私事盡屬公應請鈞局令行商都招墾設治局查照辦理實爲公便等情到局查此案前據該局呈復當經本總局指令該局長妥籌至當辦法務令各方面皆無怨言和平了結不得稍事偏袒致令纏訟不已是爲至要等因在案茲據前情除由本總局指令陶林墾務局迅將關於八台地畝轉轄案件及清丈地畝清冊送交本總局以憑轉發外合亟令仰該局查照辦理并將辦理情形具覆備查此令

墾務總局呈都統爲呈覆辦理毓公府牌民人抗丈一案情形請鑒

核文

六年五月十九日

案奉鈞署第七三三號訓令據兩翼牧場清丈行局局長林茂亭呈稱多屬毓公府牌民人屢次抗丈並無禮要求請鑒核令遵一案奉令開查人民抗丈雖屬鄉愚無知在事人員亦未必辦理盡善此風一長妨害墾政

實巨自非遴派妥員前往該地與該民等痛陳利害剴切勸導不足以資折服而利進行除指令外合行令仰該總局迅卽遵照辦理仍將辦理情形呈復核奪切切此令等因奉此查此案前據該局長呈報到局當經本總局指令呈悉查民人抗丈固由於一二地痞土棍藉端煽惑所致然在事人員如果辦理妥善事前曉以利害剴切告諭臨時開誠布公和平解勸則此等風潮未始不可消滅查閱原呈該處人民要求數端餘地之等則繳價之期限如實因年歲歉收力有未逮經該知事局長查驗屬實不妨酌量從寬以示體恤至於不堪耕種之地要求刨除一節查本區辦墾手續凡實係不堪耕種之地由勘丈員秉公丈量核實拋除暫免繳價於照內加蓋戳記註明拋除數目俟墾成之日再行照章繳價升科歷經本總局通令各縣局遵照辦理並將戳記樣式令發各局遵辦在案以上數端仰該局長會同該縣知事卽將此意明白宣布俾衆週知並由該知事

局長會同將該處大戶鄉約等先行傳案切實勸導勿再干犯法令自取罪戾至此次抗丈首犯由該知事依法懲辦一二以儆刁頑除本總局呈報都統備案並請令多倫鎮守使酌量派兵彈壓暨分令該縣知事會同該局長慎重辦理外仰卽遵照會同該縣知事妥慎辦理具覆此令並令該縣知事遵照辦理在案除俟該縣局辦理具覆再行呈復外理合先行呈報都統鑒核備案再查原呈內稱該處警察人數太少力量薄弱防衛難周自係實在情形擬請都統令多倫鎮守使酌量派兵彈壓以昭慎重是否有當理合呈請都統鑒核令遵施行謹呈

墾務總局指令兩翼牧場清丈行局據呈爲毓公府牌民人屢次抗

丈暨無禮要求請令示文

六年五月二十一日

呈悉查人民抗丈固由於一二地痞土棍藉端煽惑所致然在事人員如果辦理妥善事前曉以利害剴切告諭臨時開誠布公和平解勸則此等

風潮未始不可消滅查閱原呈該處人民要求數端餘地之等則繳價之期限如實因年歲歉收力有未逮經該知事局長查驗屬實不妨酌量從寬以示體恤至於不堪耕種之地要求刨除一節查本區辦墾手續凡實係不堪耕種之地由勘丈員秉公丈量核實拋除暫免繳價於照內加蓋戳記註明拋除數目俟墾成之日再行照章繳價升科歷經本總局通令各縣局遵照辦理並將戳記樣式令發各局遵辦在案以上數端仰該局長會同該縣知事卽將此意明白宣佈俾衆週知並由該知事局長會同將該處大戶鄉約等先行傳案切實勸導勿再干犯法令自取罪戾至此次抗丈首犯由該知事依法懲辦一二以儆刁頑除由本總局呈報都統備案並請令多倫鎮守使酌量派兵彈壓暨分令該縣知事會同該局長慎重辦理外仰卽遵照會同該縣知事妥慎辦理具覆此令

墾務總局令豐鎮縣

知事 局長

俟該民人何志等到案迅速查辦具復文

六年五月二十一日

案查本總局呈請都統飭民人何志郝廣慶火速到案以便由該局長查辦具復一案奉都統署第一千三百四十一號指令呈悉候令行豐鎮縣知事傳飭該民人何志等卽日到案候訊嗣後該民人等如再來署呈訴當再飭知回籍投案仰卽知照此令等因奉此合亟抄錄原呈令仰該縣局遵照俟該民人等到案迅速查辦具復此令

舉務總局令陶林舉務局據涼城縣知事呈稱查明北梁根一帶新地實係涼屬令該局長知照文

六年五月二十一日

案查前據該局呈稱水泉甲連界之灰騰梁北梁根一帶開出新地甚多其地當然爲陶林轄境不能爲涼城屬地請令陶涼兩縣查明以資遵辦等情到局當經本總局令陶林涼城縣知事查明具覆並指令該局知照在案茲據涼城縣知事陶樹猷呈覆遵查此案前准陶林舉務局咨同前

因知事當卽檢查西墾案卷於前清光緒三十三年節經墾務欽差派員清丈過鑲紅旗十一蘇木官荒地內有民戶趙晉璧卽趙三元認墾地四十頃八十三畝三分係慶餘堂東鏞堂名目業經升科納糧共地六段由局發給部照六張其地四至東至鑲紅旗頭蘇木草地南至灰騰梁西至鑲藍旗七蘇木民地北至陶林民地界早經劃歸涼城管轄又查西墾劃分新地界限陶林以鑲藍旗七十一一十二等蘇木所管草地並九蘇木牛心八蘇木三道營河北爲界其餘鑲紅鑲藍兩旗所屬各蘇木地段均各劃歸涼城民國四年復經涼城墾務局清丈鑲紅旗十一蘇木夾荒餘荒由東鏞堂趙三元原墾地內丈出來荒除不堪承糧外實餘地五十三頃二十九畝零六釐仍歸原戶承領照章繳納荒價發給照據各在案似此陶涼劃分地段既有紅藍旗之別而趙三元之地正餘皆係鑲紅旗十一蘇木並無陶林縣所轄鑲藍旗地址安得以距陶城十二三里遂臆斷

爲該地應歸陶林所轄且據陶林墾務局原呈謂陶林涼城地址不明實應轄至何地爲界應有確定之界綫等語是該墾局並未深考不明陶涼地址確定之界綫並非陶涼地址無確定之界綫徒以偶然涉足荒原舉目一望但憑理想妄相推測既未一徵成案尤不詳考事實我國幅員遼闊犬牙相錯尙有甲城所在之地而爲乙縣屬境者豈特距城十二三里遂爲他縣管轄之地乎查陶林區域狹小累有劃分鄰封之議迄未實行豈該墾局特借口於界綫不明而欲實行其劃分之計畫乎業將查明情形呈請都統轉飭陶林墾務局各安汛地毋相侵越免滋擾累並咨明該墾局知照在案茲奉鈞局令同前因理合具文呈請鑒核施行等情據此除指令外合亟令仰該局長知照此令

墾務總局令委分察任用縣知事劉汝棣前往松公牧廠詳查聚衆

抗丈一案文

六年五月二十五日

案據張北墾務局局長張懋呈稱該局長督率員司勘丈至松公牧廠東牌瑪圪圖村突有一二地痞糾集民戶五六百人聚眾抗丈幸經陸軍騎兵前來彈壓該局長乘機開導始行解散漸就範圍等情前來據此查清丈餘荒夾荒係奉 大總統明令舉行豈容地痞聚眾抗丈致妨要政除由本總局令飭該局長傳集各該鄉約大戶曉以利害切實勸導俾利進行毋得操切從事致生意外並一面呈報都統查核外案關聚眾抗丈情節綦重或係局員辦理不善或係地痞違章滋鬧亟應派員切實查明以憑核辦茲查有分察任用縣知事劉汝棣練達老成堪以前往合亟令仰該員即便束裝親蒞該處實地調查究竟因何起釁其倡首地痞究係何人務得確情據實具復以憑核辦此令

墾務總局令商都招墾設治局令將郝常久與劉元地畝糾葛一案

迅爲查照原案辦結文

六年五月二十九日

案據張北縣知事呈稱案奉鈞局令開民人王喜郝常久張世舉邊文寶安舉等稟請撥地換給部照一案前據該縣會同局委審訊具報到局令卽將該案原卷並地照一併檢齊移送商都招墾設治局查核辦理等因奉此查此案原卷先經咨送張北墾務局核辦在案遵奉訓令業已咨提到縣遵將原卷並地照一併檢齊咨送商都招墾設治局核辦理合具文呈覆鈞局查核備案等情到局正核辦間復奉都署第七一五號訓令開案查張北縣審理郝常久與劉元等地畝糾葛一案曾據該總局呈令行張北縣查照前案速爲辦結呈由該總局核轉在案茲據該縣知事呈稱查該地劃歸商都招墾設治局管轄已遵奉墾務總局訓令將原卷並地照一十四張咨送商都招墾設治局核辦執行等情據此除指令外合亟令仰該總局令行商都招墾設治局查照原案辦理呈由該總局核轉母任拖延切切此令等因奉此查郝常久與劉元等地畝糾葛原卷地照既

經張北縣檢送該局核辦合亟令仰該局長卽行查照原案迅爲辦結並將辦結情形從速具報以憑核轉是爲至要切切此令

都統令各局爲通令清丈地畝不分教民一律遵章清丈收價並頒

發布告文

(總務總局承辦堂稿) 六年五月二十九日

案據兩翼牧場清丈行局局長林茂亭呈稱該局清丈地畝間有地方莠民假託奉教爲名特符阻抗非不服勘丈卽拖欠荒銀種種背謬行爲實爲法律所難宥查人民信教自由本爲憲法所許一視同仁原無特異卽各神甫牧師之傳教中國亦莫不本博愛敬天爲善守法之義以爲勸導教民之中亦不乏明達之士要皆奉法惟謹惟人類不齊其不良份子往往陽假崇奉宗教之名而陰行背公怙私之實非惟國法所不宥抑亦宗教所難容值此墾務積極進行之際詎容若輩顯違定章妨害要政除由本都統剴切布告全區教民人等一體遵照毋許再行阻撓外合亟令仰

該局長坐辦遵照凡屬境內教民地畝應同普通人民地畝一律派員清丈應收地價照章催繳倘有不法之徒再敢抗違卽行照章懲罰或照章將地充公另放他人祇論其奉法不奉法不論其在教不在教遵章辦理毋稍偏歧是爲至要切切此令

墾務總局指令張北墾務局據呈報清丈情形暨地痞聚衆抗丈就

近請陸軍彈壓文

六年五月二十九日

呈悉查辦理清丈係奉 大總統明令各省區一律進行該民人等何得聚衆抗違自取罪戾仰仍責成鄉約大戶等曉以利害切實勸導該局長仍應慎重辦理不准操切從事據稱彈壓陸軍擬請准予暫住數日俟暗潮平靖卽行函送回營等情事屬可行除由本總局呈請都統并由科先函遵照外合再令仰知照此令

都統布告全區教民人等清丈地畝不分教民一律遵章清丈收價

母得阻撓致干罰辦文

(明務總局承辦堂稿)六年五月二十九日

照得本區清丈餘荒夾荒疊奉

大總統明令照准舉行凡屬本區轄

境以內所有地畝無論已放未放均應一律實行清丈未放夾荒卽時放墾已放而丈有餘荒者令原墾之戶照章補繳地價仍准管業歷經辦理在案現據兩翼清丈行局局長林茂亭呈稱該局清丈地畝間有地方莠民假託奉教爲名倚恃護符遇事阻撓非不服勘丈卽拖欠荒銀迹其種種背謬行爲不特敗壞宗教名譽殊爲有礙墾務進行查人民信教自由本爲憲法所許一視同仁原無歧異是教民對於國家所有權利義務本與普通人民絕無絲毫軒輊卽各神甫牧師之傳教中國亦無不本博愛敬天爲善守法之義以爲勸導教民之中亦不乏明達之士要皆奉法惟謹惟人類不齊間有不良份子陽假崇奉宗教之名而陰行背公怙私之實非惟國法所不宥抑亦宗教所難容各神甫牧師等類皆眞誠奉教之

人如果確知此等情形必不願以勸善之心而易爲偏袒之舉故教民中素不安分之人被其革除者所在多有徒以刁狡之徒往往捏情朦蔽遂亦不免有時或生誤會逮既明真相亦未有不痛斥其非者是可知各神甫牧師實是專一傳道奉教者尤宜愛教愛國奉法惟謹現在各舉務局行局清丈餘荒行將歲事決不能因少數教民地畝有所阻撓以致久稽時日未竟全功妨害要政爲此剴切布告全區教民人等一體遵照於各該舉務局行局派員清丈之時務須服從辦理不得再有阻撓爾等既爲中國之民卽應守中國之法且以地價繳入公家爲數有限而以田畝留遺後代世守方長此理甚明務當共曉如其怙惡不悛再有阻抗情事卽由各該舉務局行局照章懲罰或將墾地充公另放他人以符定章而重舉政本都統言出法隨慎勿輕於嘗試也其各懷遵切切此佈

舉務總局指令陶林舉務局呈爲水泉甲連界灰騰梁北根新地本

月十日以前涼城查界人員不到卽由局清丈文

九年五月二十九日

呈悉查此案前據涼城縣知事呈稱灰騰梁北根新地實係涼屬等情業經本總局轉令該局知照在案既據稱該地實係涼城管轄若由該局派員清丈勢必釀起膠轕仰俟界限劃清再行核辦可也此令

墾務總局令兩翼牧場清丈行局據鑲黃旗總管呈稱懇祈分別轉行毋使他佐任指越佔牧地等情仰該局長轉咨正白旗總管查

核具復文

六年六月十五日

案奉都署第八四六號令開案據鑲黃旗總管額色勒克們德呈稱據參領棍布車林副參領貢楚克拉什等呈稱據本旗巴爾呼棍布車林額爾德呢呼雅克等佐領下呈稱爲懇祈分別轉行將原領游牧地方毋使他佐任指越佔事適總局派出查勘正白旗地方委員前來將各該旗佐地方查勘該各佐官員等理應指查惟查勘該正白旗四佐與本十六十七

互界地方該正白旗四佐佐領嘎蘇倫車林帶領指界並不會同本佐官員等獨自擅專將本十六十七佐與該旗十三佐互界毗連地方之舊立鄂博自烏爾根圖井直達德爾山止係本佐東界與正白旗十三佐西連界自德爾山南邊察罕齊婁圖齊爾圖井經過花鄂博圖西隨路至多堆山哈達和碩東南盡頭直達高崗額布勒吉根頂舊立鄂博基誌止係本佐東南與正白旗四佐西南毗連自高崗額布勒吉根頂至西南經過察罕本巴圖向烏合爾齊婁如行繩勢有舊立鄂博基誌與本旗二佐毗連旗佐圖冊均屬顯明佐領嘎蘇倫車林將本佐與該佐真切互相連界之東南高崗額布勒吉根頂舊立鄂博基誌之處竟自隱匿刨挖入於該佐界內惟自花鄂博圖西路繞越游牧適中直達多堆鄂博止不免向內越佔入於伊佐此項越入之處有本佐人等數世住牧哈達和碩烏拉溝色勒本各甲里便於考查等情呈報再查勘本十六十七佐互界時正白旗

十三佐佐領鄂勒哲依帶同指界亦未會合本佐官員等獨自擅專將本十七佐本旗羊羣與該旗十三佐互界毗連舊立鄂博之額爾吉訥克西南經過二諾爾中間直達烏爾根圖井舊立鄂博止係本十七佐東界十六佐東北與正白旗十三佐西邊連界旗佐圖冊考查便明佐領鄂勒哲依但自額勒吉訥克繞越直達十六佐連界之德爾山止且有將本佐牧地越界佔入之處有所考查理合呈報懇祈轉行各該處毋使照依單方暗佔按照原冊秉公劃分辦理外除將此等單方越佔之處臨時奉聞該查辦委員理合一併呈報懇祈轉報等因前來理合照該參領等所呈呈報都署懇祈轉行墾務總局毋使該旗單方暗越佔入地方照依原有圖冊另行劃分辦理等情據此除指令外合亟令行該總局轉令該委員等秉公勘丈毋任侵佔致滋糾葛此令等因奉此查正白旗地界本總局未曾派員查勘該局繪送正白旗全圖有無越佔鑲黃旗游牧之處合亟令

仰該局長轉咨正白旗總管切實查核具覆勿任滋生糾葛仰卽遵照辦理具覆以憑轉呈切切勿延此令

墾務總局呈都統據張北墾務局局長呈稱聚眾抗丈現已平靖陸

續進行勘丈等情請鑒核文

六年六月十九日

案據張北墾務局局長張懋呈稱竊局長前以愚民抗丈就近咨請陸軍彈壓各緣由曾經呈報在案茲查該民等日前聚眾抗丈等情皆因誤聽一二地痞煽惑致有此舉嗣經局長切實勸導曉以利害始均平靖如常刻正在陸續進行勘丈一俟查明爲首煽惑之地痞隨時呈請核辦並仍留警察聽候調遣外所有咨請彈壓陸軍業經咨送回防以重軍政理合具文呈報鈞局鑒核備案等情到局除指令該局長仍遵照前令妥慎辦理外理合呈請都統鑒核備案謹呈

墾務總局呈都統據分察任用縣知事劉汝棣查覆瑪圪圖村民起

釁抗丈一案議具辦法請鑒核文

六年六月二十七日

案奉鈞署令開案據分察任用縣知事劉汝棣摺稱竊知事於五月二十五日奉委調查瑪坵圖村民起釁抗丈一案奉委後趕急於二十八日束裝就道秉公確查凡所經道路尖宿各店無不細心探訪加意諮詢一路已將起釁滋事之緣因藉端煽惑之首要略得大概隨卽親蒞瑪坵圖村將該村鄉保李春和保障白姓各大戶等邀集保障家逐一詢問起釁原委局員有無勒逼情事僉謂各村均係順民有郭大元者住西牌酒局村係東西牌之首事村民夙日畏服已極遇事無敢違抗東西牌伊有地二十餘頃緣東西牌松公廠之地係伊經手所放彼時以十成收價按八成授地所剩二成價欸盡飽已囊各村無敢詰問者此次清丈局清丈該東西牌之地伊恐己之黑地行將丈量無可掩飾遂藉詞煽惑東牌十三村謂當初少授二成之地可向清丈局索還並謂該局係假設等語遂遞傳

單立有罰章約定日期赴清丈局滋事至期十三村中如有一家不去罰款三十元一村不去罰款三百元十三村不從者約四五村認罰不允至五月六號約集八九十人到清丈局滋鬧均聽郭大元指揮清丈局局長前一日得有滋事風聲當卽函請住饅頭營陸軍二十餘名來村以資彈壓保護適該村民滋鬧之際正陸軍甫到之時村民瞥見陸軍益行謾罵幾釀禍端該局長並陸軍哨官長鄉約保障等見禍在眉睫設法百般勸導幸未釀成巨案郭大元見事不合遂自起自滅挺身帮同勸導隨卽解散村民照常開丈觀以上情形證以道途之論說頗覺相符其倡首之人想郭大元難辭其責並道途訪問左近村民傳說局長辦事尙無甚強迫所派辦事各員實有不洽輿情者卽今郭大元煽惑滋事係因局員中有與郭某相熟者因求好於郭某暗告爾之黑地行將開丈尙能藉端生事定可邀免遂互相勾串煽惑是非釀成極大之風潮查此情形雖毫無實

據而人言嘖嘖以郭大元自起自滅之行爲相證要亦不無可疑况起釁之前一日清丈距瑪圪圖東南三四里之洛村地丈畢後局員等因勒要該村以車馬送歸村民不允始而口角繼且行毆局員羅姓被該村民洛老三叔姪周姓夫婦將頭顱打破保障百姓受傷甚重次日始行抬回據此情事互相參觀雖屬村戶愚頑因煽惑而事生意外約亦因局員夙昔辦事不無強迫抑勒之處所致而然不然何以惡感如此之甚也所有知事調查村民起釁之緣因煽惑村民之首要謹據實繕摺呈請鑒核施行等情據此查此案既由郭大元煽惑又復起滅自由實屬玩法恃強一鄉之蠹至該局員等有意見好雖無實據而人言嘖嘖當亦不爲無因且復有口角鬪毆情事則辦事之不洽輿情更可概見合亟令仰該總局妥議辦法卽日呈復以憑核奪此令等因奉此查此案既由郭大元藉詞煽惑又復起滅自由實屬玩法已極應由該縣知事差傳郭大元到案訊究依

法懲辦據稱松公廠之地係郭大元經手所放彼時以十成收價按八成授地所剩二成價欸盡飽已囊各村無敢詰問者等情應由該縣知事會同該局局長切實查明併案訊辦再查各局員司下鄉丈地不准向民戶招搖勒索載在定章復經本總局三令五申乃該局員司因勒索該村車馬致有口角鬪毆情事其辦事之不洽輿情已可概見應由該局長查明各該員司姓名立即撤差據實呈報如查有別項違法情弊仍送交法庭依法懲辦據稱該局長辦事尙無甚強迫然所派員司不洽輿情釀起風潮該局長究屬失察已嚴令該局長對於該局員司認真防查如再有此項情事惟該局長是問除由本總局令該縣知事暨該局局長遵照辦理具覆俟呈覆到局卽行轉呈外所擬是否有當理合呈請都統鑒核令示祇遵謹呈

墾務總局呈都統據兩翼牧場清丈行局局長林茂亭呈稱派員復

丈前清丈處丈過地畝並丈出餘地情形據情轉呈鑒核文

六月

三十日

前奉都署令開准陸軍部咨開各節令卽查明苑前場長經手所放之地共有若干該價若干已收價者若干頃繳到若干欵其已發執照而尙未收價者若干頃共有若干欵該前場長所放各地經林局長重丈後有無不符之處尅日具復以憑核辦等因遵經逐一查明先後分別呈復在案惟前清丈處丈過之地當時尙未據林局長重行復丈其有無不符之處應俟迅令林局長速行復丈具復到局方能得其真相茲據兩翼牧場清丈行局局長林茂亨呈稱案奉鈞局令開爲令職局復丈前清丈處丈過地畝有無不符之處仰卽查明尅日具覆等因奉此於五月二十八日卽派員前往復丈並令據實呈報去後茲據勘丈員等呈稱竊員等於五月二十八日奉令前往右翼抬頭溝等處核實復丈前清丈處丈過地畝有

無不符之處仰該員等務須認真清丈不准稍有徇情致干未便切切並奉原文單底一冊此令等因奉此員等遵卽帶同書役前往於三十日行抵六面井當卽傳令該地戶同集當場經員等開導此次復丈情形該地戶等樂從復丈者以足多數員等詳細考察因前清丈處充繩夫者皆係兵士勘丈地畝並未查明界限故此該處地畝苦樂不均以致多有樂從復丈至三十一日員等卽赴地勘查按照原文單底查明四至卽行開繩茲丈得六面井張王兩旅長之地按照原文丈之數淨短七頃餘復又挨次清查白玉山等戶至界按照原文丈之數淨長二十餘頃以及抬頭溝大樑帳房山等處共長十餘頃除砂石道路溝渠外此次淨丈出餘地計共三十餘頃由員等當卽發給通知書限期繳價等情到局報告前來所有派員復丈前清丈處丈過地畝情形並丈出餘地緣由理合具文呈請鑒核施行等情據此理合據情轉呈伏乞都統鑒核施行謹呈

墾務總局呈都統請令催鑲白旗總管查明奎騰布拉克台地畝開具界址地名繪具圖說迅速呈復以便轉發兩翼牧場清丈行局

查核辦理文

六年六月三十日

案據兩翼牧場清丈行局局長林茂亭函稱頃據周科長鴻賓報告王勘丈員祖德此次復丈抬頭溝之地時卽擬就便清丈五十家子蒙人盜租右翼佈里音山之地及至該處該台官兵懇求勿丈並聞該處地戶有云曾花過該台銀錢如清丈局幾時清丈卽將該台所養之牲畜趕去以抵前欸王勘丈員恐釀出風潮故未清丈卽行返局復經科長將該台之蒙人傳局據云渠台之官長均赴鑲白旗會商此項地畝之事且云放地係經前任何都統批准有案科長恐此語不可靠當卽限于十日內係如何商定辦理務須答復查本局左右兩翼之地殆將丈竣急宜清查畝數預算將來每年升科並報告總共所清丈之地數該處地畝如不迅速交涉

明白何能清查國課應如何辦理請局長就近請總局令示祇遵等情前來查此項地畝曾經職局去年呈奉鈞局批示在案但至今尙未規定再該台所云奉何都統批准放地想必批准開放該台之地決不能令其任意私放兩翼牧場之地况該台站竟將右翼之地盜放一二百頃之多實於職局諸多礙難理合據情修稟仰懇鈞局鑒核示遵再職局關防刻在口外未及辦呈合併聲明等情到局查此案於民國五年九月奉鈞署第三百零四號指令呈悉查前據鑲白旗總管呈請開放奎騰布拉克台地以償公債等情業經前任都統批准並令該總管詳報有若干地畝以憑核辦暨分行該總局遵照在案茲據前情查該處五十家子地名卽係奎騰布拉克台地惟未據該總管詳報地畝圖冊前來候令行該總管迅速詳查該台地畝開具界址地名繪圖呈復到署再行令遵照卽轉令遵照此令等因奉此當經本總局轉令該局遵照在案茲據函稱該台站竟將

右翼之地盜放一二百頃等情理合轉呈都統鑒核令遵並請令催該總管確實詳查該台地畝開具界址地名繪具圖說迅速呈復以便轉發該局查核辦理謹呈